

UTL AT DOWNSVIEW



D RANGE BAY SHLF POS ITEM C  
39 15 18 05 09 011 1



FL 5-5-66

PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---

PL	Cevet Ahmet, pasa
175	Belagat-i 'Osmaniye
C4	
1905	

2








بلاغت عثمانیه




عموم مکاتب اعدادیده تدریس اولئق اوزره معارف  
نظارت جلیله سی طرفندن انتخاب و قبول بیورلر

Belāgat-ı 'Osmanīye  
اثر خامه احمد جودت



بشنجی طبع



ناشری:




معارف نظارت جلیله سنک فی ۲ محرم سنه ۱۲۲۳ و فی ۲۴  
شباط سنه ۱۲۲۰ تاریخلی و ۱۸۷۳ نومرولی  
رخصتنامه سیله طبع اولمشدر.

استانبول

شرکت مرتبیه مطبعه سی — باب عالی جاده سنده نومرو ۵۲

۱۳۶۳





PL  
175  
C4  
1905



1007195



بِسْمِ اللَّهِ الرَّحْمَنِ الرَّحِيمِ

طوائف متمدنه کنند و لسانلرینک قواعدینی جمع ایله  
برفن مخصوص اوله رق تدوین ایده کلمشلر در. بوکا ال  
زیاده اعتبار ایدن عربلر در. چونکه اساس دیانت  
اسلامیه اولان وفصاحت و بلاغتک طبقه قصواسنده  
اولمغله معجزات باهره دن بولنان [قرآن کریم]، لسان  
عذب البیان عربی اوزره نازل اولدیغندن آنک قواعدینی  
خللدن وقایه، بر خدمت دینیله اولمغله علمای عربیه  
بوکا فوق العاده اعتنا ایتشلر ایدی.

لسانمزلک بر باشلوجه، أخذی لسان عربی اولدیغنه مبنی  
بوراده آنک قواعدندن بر آز بحث ایتک لازمکیور.  
علمای عربیه لسان عربینک قواعدینی جمع ایدرک  
«علم نحوی، تدوین ایتشلر ایدی که کلمه نک احوالندن



بحث ایدن بر علم، دیمکدر. صکره علمای متأخرین  
 بونی ایکی فنه تقسیم ایدوب برینه: «علم صرف»  
 دیگرینه: «علم نحو، تسمیه ایتدیلر.

علم صرف ذات کلمه نك احوالنندن بحث ایدن  
 بر فندر.

علم نحو کلمه لرك حین ترکیبده عارض اولان  
 احوالنندن بحث ایدن بر فندر.

بویکی فن ایله کلامک اصل معنای افاده سی کیفیت  
 بیلنور؛ ایکیسی دخی بر مقصده خدمت ایتدیکی جهتله  
 حقیقت حالده بر علم دیمک اولور.

بعضیلر مسائل اشتقاقی دخی بر فن مستقل اعتبار  
 ایتمشلردر؛ لکن اکثری آنی فن صرفده داخل  
 قلمشلردر. لسان فارسینک قواعدی قلیل و مضبوط  
 اولوب جمله سی بر فن اوله رق تدوین اولمشدر.

لسان عثمانینک قواعدی قواعد فارسیه یه نسبتله



دها زیاده در. بعض قواعد فارسیه بی استعمال ایله برابر،  
 بر چوق قواعد عربیه به دخی رعایه مجبورز. ولسان  
 عثمانینک صیغ تصریفیه سی هر لساندن اوسع و مکملدر.  
 بو جهته مسائل صرفیه سی خلیجه واسعدر؛ فقط  
 مسائل نحویه سی لسان عربینک نحوی قدر کثیر  
 و واسع دکلدر. بو جهته صرف و نحوینی تفریق حاجت  
 یوقدر. بناءً علیه بز دخی لسان عثمانینک قواعد صرفیه  
 و نحویه سنی جمع ایله، بر فن اولق اوزره برلشدیروب  
 «قواعد عثمانیه» نام کتابی تدوین ایتشیدک، که لسان  
 عثمانینک قواعدی حقنده اک ابتدا یازلمش اولان  
 کتاب اودر. بعده آنی اختصار ایله «مدخل قواعد»  
 نام رساله نی و صکره آنی تلخیص ایله «قواعد ترکیه»  
 نام رساله جکی تألیف ایلدک.

بونلری تدرس و تعلم ایدنلر لسان عثمانی اوزره  
 اصل معنایی طوغریجه سویلیوب یازمغه مقتدر اولورلر؛

اما فصیحانه و بلیغانه افادهٔ مرام ایده بیلیمک ایچون  
«علم بلاغت» ی بیلیمک لازمکاور.

قواعد عثمانیه نك آخرنده بلاغت عثمانیه نك تدوین  
و تألیفی وعدا و لنمشیکن حال و زمان، بو وعدك انجازه  
مساعد اولمدی.

بعده معارف عمومیه ناظری ایکن، مکاتب عمومیه  
و خصوصیه نك درس جدولارینی ترتیب ایچون تشکیل  
ایلدیکم قومسیون طرفندن تألیفی عهدده مره تحمیل  
و تکلیف اولنان کتابلردن بری ده لسان عثمانی یه مخصوص  
اولمق اوزره بر «فن بلاغت»، کتابنك تألیفی ایدی.  
بو کتابلردن بعضیلرینك تألیفنه موفق اولدیغم حالده  
اشبو «بلاغت»، کتابنك تدوین و تألیفنه موفق اوله مدم.  
مکر قوه دن فعله کله جك برچوق نوادر آثار ایله  
برابر، بودخی اریکه پیرای خلافت وجهانبانی پادشاه  
حقایق اکنتاه بی مدانی ﴿سلطان عبدالحمید خان ثانی﴾



افندیز حاضر تترینک عصر محاسن حصر هایونلرینه  
مرهون ایمش . ایشته شمدی اول وعدک انجازینه  
ابتدار اولنمشدر .

علمای عربیه بلاغت ایچون ایکی فن یامشلردر . بری :  
« علم معانی ، در ، که آنکله کلامک مقتضای حاله کیفیت  
تطبیقی بیلنور . ایکنجیسی : « علم بیان ، در ، که ادای  
صرامک طرق مختلفه سنی بیلدیرر . یعنی : تشبیه ، مجاز  
و کنایه دن بحث ایدر .

سجع و جناس کبی کلام بلیغه زینت ویرن بر طاقم  
وجوه تحسین کلام واردر که آنلره ده : « صنایع بدیعه ،  
ذیلور . آنلری تعریف ایچون دخی علم بلاغته ذیل اولمق  
اوزره برفن یاپوب « علم بدیع ، تسمیه ایتشلردر .

ادبای عربیه دن بعضیلری بو اوچ فنک مجموعنی :  
« علم بیان ، تسمیه ایدوب بعضیلری دخی اولکنه « علم  
معانی ، دیگر ایکدسنه یعنی : بیان ایله بدیعه « علم بیان ،

واوچنه بردن «علم بدیع» دیمش لر در. بعضیلر دخی معانی  
ایله بیان «علم بلاغت» دیر لر.

بز، اوچنی بر علم اعتبار ایدرک «علم بلاغت» تسمیه  
ایلدک. اول اعتباره کوره شم دی بو علمی تعریف ایدم.  
«علم بلاغت» کلامک مزایاسنی بیلدیرن برفندر.  
کلامک مزایاسی، مقتضای حاله تطبیقی وتشبیه ومجاز  
وکنایه لرینک حقیله اداسی و «صنایع بدیعه» ایله تزینی  
خصوصلریدر.

لسان عثمانی اوزره اشبو علم بلاغتی بیان ایچون  
بورساله یی بر مقدمه ایله اوچ باب به تقسیم و بمنه تعالی  
باب اولده: «فن معانی» یی، باب ثانیده: «فن بیان» یی  
و باب ثالثده: «فن بدیع» یی بیان ایده جکز.

بوده معلوم اولسون که علوم عربیه اون ایکی فن  
اولوب بونلره «علوم ادبیه» دخی دنیلور. بونلرک  
سکزی «اصول» دردی «فروع» در.



اصول عثمانیه: لغت، صرف، اشتقاق، نحو، معانی،  
 بیان، عروض و قافیه فنلریدر. فروع اربعه: انشاء،  
 فروض، شعر، محاضرات و خط یعنی: املا فنلریدر.  
 بونلرک تفاصیلی «بیان العنوان» نام رساله مرزده اولمغله  
 اورایه مراجعت اولنه.

قواعد عثمانیه ده لسانمزلک: مسائل صرف، اشتقاق،  
 نحو؛ و اصول املاسی مندرج اولمغله، اصول عثمانیه دن  
 اوچنی و فروع اربعه دن، برینی حاویدر.

دردست تدوین اولان «علم بلاغت» دخی معانی  
 و بیان فنلرینی مشتمل اوله جنی و جهله، بوایکی فنده:  
 «فنون اثنی عشر» دن آلتیسی مندمج اوله جق دیمکدر.  
 من الله التوفیق وعلیه التکلیل



# مُقَدِّمَةٌ

فصاحت، الفاظك تلفظ واستماعی طاتلو، معناسی ظاهر،  
یعنی: تلفظ اولنور ایکن معناسی ذهنه متبادر اولمقدر. بونك  
علامتی دخی الفاظك قواعد لسانه موافق والسنة ابداده کثیر  
الاستعمال اولمسیدر.

چونکه اهل لسان اولان ادبا لسانی اینجه الکنن کچوروب  
او مثللو الفاظی تحری و انتخاب ایدرلر. لسانه ثقیل، قولاغه  
کریه کلان ومعناسنی آ کلامق ایچون لغت کتابنه وفکر ایله  
ذهنک انعابنه محتاج اولان الفاظك استعمالندن اجتناب ایدرلر.  
«کلامک احسنی اودرکه عوام آنک معناسنی آ کلار؛ خواص  
دخی فضل و مزینتی تقدیر ایله» دیرلر.

بلاغت - سوزك فصیح اولمق شرطیله - مقتضای حاله  
مطابق اولمسیدر.

فصاحت ایله کلمه وکلام و متکلم متصف اولور. بلاغت ایله  
یالکز کلام و متکلم متصف اولور. بونلرک ماهیتلرینی کرکی کبی  
ایضاح ایچون هر برینی بشقه بشقه تعریف ایدلم:

کلمه نك فصاحتی کلمه نك تنافر حروفدن، غرابتن و قیاسه  
مخالفتدن سالم اولمسیدر.



تفاوت حروف کلمه نك لسان اوزره نقلتی وتلفظك عسرتی  
ایجاب ایدن برکیفیتدر، که حس وذوق ایله بیانور. «مرتفع»  
معناسنه «مستشزر» وایستاستیق کلمه لری، «ایشسز، کوچسز»  
لفظلری کبی.

غرابت کلمه نك وحشی اولسی، یعنی: مانوس الاستعمال  
وظاهر المعنی اولمامسیدر.

مثلا: «آتش» لفظی میانه مزده زبانزد اولمشدر. عربیسی  
اولان «نار» لفظی دخی مستعملدر. اما اصل ترکیه سی اولان  
«اود» لفظی مهجور اولغله آنده غرابت واردر. شمعی  
استانبولده «اود» دینلسه اکثر ناس آکلاماز.

کذلک لسان عربیده: «اجتناب» و«تجنب» برمعنایه کلور  
ایسه ده لسانمزده «اجتناب» لفظی مانوس الاستعمال اولوب  
«تجنب» لفظی زبانزد دکندر.

کذلک آینه نك اصل ترکیسی اولان «کورکی» لفظی  
مهجوردر. عربجه: آینه یه «مرآت» و«سجنجل» دنیلور.  
لسانمزده ایسه «مرآت» لفظی مستعملدر. «سجنجل» لفظی  
ایسه لغات غربیه دندر.

لااله الاالله عباره شریفه نك اصل ترکیه سی:  
«یوقدر طایه حق چالابدر آنجق» عباره سیدر. ترکیه «چالاب»  
لفظه جلاله نك ترجمه سیدر، لکن شمعی لسانمزده مستعمل  
دکندر.

قیاسه مخالفت کلمه نك قواعد عثمانیه و اهل لسانك استعماله مخالف اولمسیدر .

«كلمك» یرنده : «كلمق» ، «یازدق» یرنده : «یازدك» ، «ادبسنلك» یرنده : «ادبسنلق» ، «او یغونسزلق» یرنده : «او یغونسزلك» ، «بندك» یرنده : «بندكیت» ، «یازمه ماز» یرنده : «یازمه بيلمز» ، «تحریرات وارده» یرنده : «تحریرات موردوده» ، «اهالی ساكنه» یرنده : «اهالی مسكونه» ، «مطبوعات موقوته» یرنده : «مطبوعات موقته» دینلمك كبی كه «برالشام» یرنده : غلط اوله رق «بریه الشام» یازمغه باشلانیدینی ائنده بویله برچوق غلطلر اوراق رسمیه ده كورلمكه باشلامشدر .

«منضم اولدی» ذیلجهك یرده : «انضمام ایتدی» ، «منقضى اولدی» ذیلجهك یرده : «انقضا ایتدی» دینلمك دخی بو قییلندیر ؛ چونكه انفعال بابی دائما لزوم و مطاوعت ایچوندور . بناءً علیه «اولمق» ماده سیله تركب ایدر . «ایتمك» ، «ایلمك» ، «قیلمق» ، ماده لر یله تركب ایتمز . مكر كه مجازاً بر بشقه معناده مستعمل اوله . نته كیم : «انكسار» لفظی بددغا معناسنده مستعمل اولدینی حالده ، «انكسار ایتدی» دینلور . اما قیرلمق معناسنه اولدینی حالده «منكسر اولدی» دینلور . «انكسار ایتدی» دینلمز . كلامك فصاحتی اجزاسی اولان كلمه لر فصیح اولمغه برابر تنافر كلماتدن ، ضعف تألیفدن و تعقیددن سالم اولمسیدر . تنافر كلمات بعض كلماتك اتصالاتندن لسانه ثقلت كلمكدر .



مثلاً : «چوق کاسه لیسر آنک نان خوار خوان نعمتیدر»  
 عبارہ سنده کی کلمہ لر هپ لسانمزدہ مأنوس الاستعمال ایکن بریرہ  
 کلدکارنده، زیاده تنافر حس اولنه یور .

«اشچی اش پشمشمی» عبارہ سی، «اللی لیرا» ترکیبی، و :

میلن اول سرو روانک سوی اغیاره کوروب

ایلش مشیاش زبان حال ایله ایهام صو

یتتک مصراع نایسی دخی بو قیلدندر . بو مثللو تنافر الفاظ  
 بین الشعرا مذموم ایسه ده بعضاً هجو و تزییف مقامنده استعمال  
 ایدر . نته کیم : [سروری] بویولده :

قاره قوری قاری آلدی نعمان

تاریخی سویلمشدر .

علمای عربیه دن بعضیلری کلامک فصاحتده علی الاطلاق  
 تتابع اضافندن سالم اولسنی شرط ایتمشلردر . بعضلری «تتابع  
 اضافات اکثریا تنافری ایجاب ایله فصاحتی اخلال ایدر»  
 دیمشلردر . لسانمزدہ تتابع اضافاتک فصاحتی محل اولدیفی  
 درکاردر .

تتابع اضافات اوچدن زیاده کلمه لرک متوالیا بربرینه مضاف  
 قلنمسیدر . «فلانک قوناغنک قپوسنک کلیدی» کبی که درت کلمه  
 یکدیگره مضاف قلنهرق اوچ اضافت متوالی اولمغله ، فصاحتہ  
 خلل کلمشدر .

[فضولی] نک «حدیقه السعدا» ده :

ابکار انجم، تاب نظاره مصائب خواتین حرامسرای نبوت ،

کتوره میوب پرده حجابہ کیردی .

عبارہ سہندم : الی کلمہ بربرینہ مضاف قلنمغله ، فصاحتدن  
دوشمشدر .

ضعف تألیف ، کلامک ترکیبی قواعد عثمانیه و بین الادبا  
مرعی اولان اصوله مغایر اولمقدر .

چونکہ انسانک لسانی قلبک ترجایدر . عرض و مرانی  
افاده ایچون ، مناسب کوردیکی عبارہ لری ذهنده فصل تصویر  
ایدر ایسه ، الفاظی دخی اکا کوره ترکیب و ترتیب ایلر . ایشته  
قواعد لسانیہ الفاظک بو وجهله تراکیبی بیلدیرر . وقاعدہ  
تقدیم اولنه جق کلمه لری تقدیمی ایله کلامک سبکنه خال کلور ؛  
زیرا الفاظک ترکیبی معاینک ترتیب ذهنسنه مخالف دوشر .  
بوجهتله عبارہ ریک اولور . نته کیم : « بازاره کیتدم » دنیله جک  
یرده : « کیتدم بازاره » دینلمک کبی که متعاقات فعلک تقدیمی  
قاعدہ لسانمز اقتضاسندن ایکن ، بوراده مفعول الیه تأخیر  
اولنمشدر . [ نهالستان ترکیسی ] دیباجه سنده کی : « حمامه حمامه  
موزون ترانه دلکش آواز معرفت پرداز » عبارہ سنده مشبهک  
مشبه به مضاف قیلنمسی قاعدهیه مخالفدر ؛ زیرا لسانمزده  
مشبه بهک مشبهه اضافتی شایع اولوب اما عکسی معروف دکلدرد .  
بناءً علیه بو عبارہ فصاحتدن عاریدر . واکر « حمامه موزون  
ترانه دلکش آواز حمامه معرفت پرداز » دنیلسه قاعدہ لسانه  
موافق اولور .

کذلک [ شفیق نامه ] نک « سلطان هفت اقلیم زرین دیهم



آفتاب « عباره سی دخی ریکدر؛ چونکه «زین دیهم» ترکیبی سلطانک صفی اولدینی حالد، آره لرینه سلطانک مضاف الیهی کیرمشدر؛ حالبوکه «سلطان زرین دیهم هفت اقلیم اولان آفتاب» دینلسیدی، عباره رکاکتدن سالم اولوردی.

«درمیان ایتک»، «درپیش ایلک» یرنده: «درمیان ایل»، «درپیش ایل» و «رخصت کامله» یرنده: «رخصت کامل» دینلمک و «لاجل الفروخت» عباره سنده اولدینی کی کله فارسیه اوزرینه لام تعریف کتورمک دخی ضعف تألیف قیلندندر.

[تصویر افکار] غزته سنک: «پرتوژکا نوع بشرک باشنه» قونمش برنورانی هادرکه سایه سعادتیی تعمیم ایده جک واسطه «بولماز؛ الاکه لزومی قدر نهال مطبوع الاندامی حکمکنده اولان «صحائف مطبوعه نک وسعت وانتشاریدر. شهبال دکل او بر «برات اقبالدرکه قنی ملته مقارن اولسه رفته رفته ظلام جهالتک زنجیر اسارتندن آزادینه حجت اولور» مقاله سنده کی «اندام» «کله سی فارسی اولدینی حالد اوزرینه لام تعریف کتورلمسی فصاحتی اخلال ایتمشدر. «آزادینه حجت اولور» ترکیبی دخی «درمیان ایل» قیلندندر.

بروجه بالا متعلقات فعلک تأثیری سبک عباره ۱۰ خلله

کتورمکله کلام منشورده جائز اولماز ایسهده اشعارده جائز و شایعدر .

چونکه شعرای روم اوزان فارسیه یی استعمال ایتدکلی کبی قواعد فارسیه یه توفیقاً اشعارده فعلک فاعلی و متعلقاتی اوزرینه تقدیمی دخی تجویز ایتمشلردر . نته کیم :

شهد راحت کسب ایدر تدبیر منزل ایلیان  
آلدی ارباب حکم بو صبرتی زنبوردن

بیتک مصرع اولنده : « کسب ایدر » فعلک فاعلی تأخیر و مصرع ثانیسنده : « آلدی » فعلی کنندی فاعلی و مفعوللری اوزرینه تقدیم اولمشدر .

اشعار عثمانیهده بو مثللو تقدیم و تأخیرلر کثیر و شایعدر ؛ فقط موجب تعقید اولور ایسه نثرده جائز اولمدینی کبی شعرده دخی تجویز اولماز .

تعقید ایکی قسمدر . بری : تعقید لفظیدر ، که بروجه بالا عبارهنک سبکنده واقع اولان خللدن ناشی کلامک معنای مراده دلالتی ظاهر اولماقدر .

« سنی کوردکده پک زیاده ممنون اولیورم » دنیله جک یرده « پک زیاده سنی کوردکده ممنون اولیورم » دینلمک کبی ، که « زیاده » لفظی « ممنون اولیورم » فعلک قیدی اولدینی حالدله آنک یاننده کتورلیوبده متعلق اولان « کوردکده » جمله سنک اوست طرفه کچورلمکله کلام معقد اولمشدر .



و : تلخ ایدر آدمک البته مذاق عیشتن  
 باده نوش ایله بوکون ایله فکر فردا  
 بیتدن شاعرك مرادی «باده نوش ایله بوکون ایلمه فکر فردا که  
 فکر فردا آدمک مذاق عیشتنی تلخ ایدر» دیمکدر . حالبوکه  
 «تلخ ایدر» فعلی بیتک اولننده و «فکر فردا» ایلمه فعلندن  
 صکره آخرنده بولغله کلامنده «تعقید لفظی» واردر .  
 فهم افندینک :

شرابدر دهرک صوندی باکه ساقی جام  
 حواس خمس ایله حس اولندی باده تمام  
 بیتی دخی بوقیلددر، که شراب ایچیلور ایکن طعم و رایحه سی  
 طوییلور . رنکی کورینور و قدح اله آندقدده صانکه حس لمس  
 دخی حصه دار ایدلمش اولور . یالکیز حس سمع محروم قالور  
 ساقی «شرابدر» دیجک او دخی حصه سنی آور . بو حالده باده  
 حواس خمس ایله حس اولنش اولور . لکن بومعنایی افاده  
 ایچون «قدحی اله آلم و شرابی کوره رک و رایحه سی طویه رق  
 ایچدم» دیمک لازم کلور . یوخسه بوجمله لر هی محذوف اولدینی  
 حالده یالکیز «شرابدر دهرک» سوزندن بو معنایه انتقاده  
 صعوبت اولدیغندن کلامک معقد اولدینی درکاردر .

تعقید معنوی بحسب اللغة من فهم اولان معاندن متکلمک  
 مرادی اولان معنایه ، یعنی : معنای حقیقیدن معنای مجازییه ،  
 یا معنای کنائییه ذهن سامعک انتقالنده واقع اولان خللندن  
 ناشی کلامک معنای مقصوده دلالتی ظاهر اولما مقدر .

در که لطفه کلمم زیرا  
سنی مردم کوره بیلیم دیرم

بیتنده اولدینی کبی که جانانک درگاهنه کلمک اوراده بولنمائی  
اقتضا ایتدیکنه مبنی ، کلمکی نفیدن دائماً اوراده بولنق معناسی  
مراد اولنمشدر؛ یعنی: «سنک درگاهدن آیولم؛ زیرا استرم که  
دائماً سنی کوره بیلیم» دیمک اولور؛ لیکن اورایه کلمکی نفی  
ایتمکدن اوراده بولنمائی نفی ایتک، یعنی: «دائماً اوراده بولنق»  
معناسنه انتقال ایتک پک بعیددر .  
کذلک :

ایلمشکن و صلاک اقرار ایله اسحاقه کرم  
واری اول لطفی بحال انکاره الله عشقنه

بیتنده دخی وصلی اقراردن آنی وعد ایتک معناسی مراد  
اولنمشدر؛ چونکه بر حق اقرار ایدن کیمسسه ضمناً آنک  
ایفاسنی وعد ایتش دیو ادعا اولنه بیلور؛ لیکن ذهنک بومعنایه  
انتقالنده صعوبت وارد؛ چونکه «اقرار» لفظی «چشمشده  
بر حالک وقوعنی اعتراف» دیمک اولوب «آئیده ایفاسنی وعد»  
یرنده قولالانماز . و کذلک :

صباحه قلله شمعز یوسف آسا اوله دامنش  
بزم انکشمزدن دستمز ای ماه کوتهدر

بیتندن شاعرك مرادی «بز عاجرز» بزدن بیهوده دامنش  
اجتناب اوله» دیمکدر. چونکه صباحه قارشو مومک اوست  
طرفی یانمش اولور و دیپی قیصه قالور که شاعر آنی دسته واول



حاله اوزانان قیلنی دخی انکشته تشبیه و دستک قیسه لقی  
عجزدن کنایه ایتمشدر ؛ لکن بونده پک زیاده تعقید واردر .  
تنافر حروف و کلمات ذوق و حس ایله بیلنور . غرابت ایسه  
علم لفته ، قیاسه مخالفت فنّ صرفه ، ضعف تألیف ایله تعقید  
لفظی فن نحوه عائددر . خارجده تعقید معنوی قالب آکا  
دخی علم بیان متکفل اولور ؛ چونکه تعقید معنوی معنائی مجازیه  
وکنایهده بولنور . بونلر ایسه علم بیان ایله بیلنور .

متکلمک فصاحتی برملکه در که آنکله متکلم کندو مقصدینی  
الفاظ فصیحیه ایله افادهیه مقتدر اولور .

متکلم فصیح ابتدا کلمات فصیحیهیی تحرّی و انتخاب ایلر .  
ثانیاً هر کلهیی مشاکل و مناسبی اولان کله ایله مزج و ترکیب  
ایدر ؛ چونکه کله لر ذاتاً فصیح اولدینی حالدّه حسن ترکیب  
ایله کلامه فصاحت کلز . متناسب اولمیان کله لر ذاتاً فصیح اولسه لر  
بیله یان یانه کتورلدکلری تقدیرده بربرندن متناظر اولورلر .  
بو ایسه « تنافر کلمات » دیمک اوله رق کلامک فصاحتی اخلال  
ایدر و کله لر نقدر متناسب اولورلر ایسه کلامک سلاستی او قدر  
زیاده اولور .

سلاست ؛ کلامک لسان اوزره سهولت ایله جریان ایدیشیدر .

( بیت طهره )

بیور مجلس انسه ای مست ناز  
فی و می مهیا کان دلنواز

کبی

بعض ادبای عربیه نك بیانیه کوره ، کلمات فصیحہ ، ایکی  
قسمه منقسمدر و هر قسمك موقع مناسبی واردر .

قسم اول ؛ « الفاظ جزله » یعنی : قالین و آخر لفظلردر .  
« جلادت » ، « خطابت » ، « قضا » ، « اقتضا » ، « تیغ  
غدر » کبی .

قسم ثانی ، « الفاظ رقیقه » یعنی : لطیف ، خوش ، نازك  
و ملایم لفظلردر . « زلف سمنبوی » « سرو ناز » « ماه سیما » کبی .  
الفاظك قولانغه طوقونمسی ، اشخاصك كوزه کورنمسی  
کبیدر . شویله که : الفاظ جزله ، وقور و مهیب اشخاص کبی  
تخیل قلنور . حرب و ضرب و تقریع و تهدید کبی مقاملره  
یا قیشور . الفاظ رقیقه . مزاجی لطیف و مشربی ملایم اشخاص کبی  
تخیل اولنور و تغزل ، تلطیف ، جلب موذت و استعطافه دائر  
اولان کلاملره یا قیشور . بناء علی ذلک ، فصحاءدن بعضیلرینك  
الفاظی ، سلاحرینی طاقنمش ، حرب حاضر نمش انسانه بکزره .  
بعضیلرینك الفاظی ، کوزل کینمش ، انواع حلی طاقنمش نساء  
حسانه بکزره . اولکی سفندن اولنلر ، الفاظ جزله استعمالنه  
مألوف اولوب او یولده کسب ملکه و سائره تفوق و تقدّم ایدنلر



دیمک اوله رق ، متین قصیده لر سویلر لر ؛ لکن غزل طرزنده کلاملری ، اوقدر اعلی اولماز. صنف ثانیدن اولنلر ، الفاظ رقیقه استعمالنه مأنوس اولوب او یولده کسب ملکه و تقدم ایدنلر دیمک اوله رق ، لطیف غزللر سویلر لر ؛ لکن متاتجه کلاملری ، اول مرتبه اعلی اولماز .

قرآن کریم ایسه ایکی یولده دخی فصیحایی عاجز قیلمشدر. زیرا الفاظ جزله ورقیقه دن هر بری ، مقامیله متناسب اوله رق مستعملدر. مثلاً: « یوم قیامت » و « عذاب جهنم » کبی شدت مقامنده ، الفاظ جزله و رحمت ، مغفرت ، لطف و تسلیت مقامنده ، الفاظ رقیقه وارد اوله رق ، اولکی صورته اولان آیات کریمه ، غایت متین و ایکنجی صورته اولان آیات کریمه ، غایت لطیفدر .

کلام متین ، اول کلامدر که الفاظ جزله دن ترکیب ایدر و ترکیبی مفرغ اولور ، یعنی : قالب دن دوکه کبی ، کلمه لر بربرینه طبیعی مربوط کورینور ؛ دوکوک صاحیق اولماز . نفعینک :

دکلدر کهکشان جلاد قهری تیغ عدلیله  
چاوب چاک ایلدی فرق سرچرخ ستمکاری

بیتی کبی .

کلام لطیف . اول کلامدر که الفاظ رقیقه دن ترکیب ایدر . وطبعه انبساط ویره جک معانی بی متضمن اولور . فغانینک :

شعب کاکن آلمش نسیم کلشنده  
دیمشکه سنبله سنده امانت اولسون بو

فعل قاعده ت فعل فعل

بیتی کبی .

سلاست، بعضاً متانت ایله و بعضاً لطافت ایله مجتمع اولور.

نته کیم: فهم افندینک :

کثرت حرص و امل خاطر پیرانده در

مار و مورک یومسی خاه ویرانده در

یتی هم سلیس و همده متیندر و آگاهک :

نه شیشهیم نه سبوی میم نه آینه

دوشرمی سنک ملامتدن احتراز بکا

یتی، هم سلیس و همده لطیفدر .

سلاست و جزالت، یارقت و متانت، یالطافت حسبیلکلامک

درجات مختلفه سی وارددر که حس و ذوق ایله بیلنور .

قرآن کریمک اصل اعجازی، اگرچه معناسی اعتباریله در؛

لکن الفاظ قرآنیه، درجه قصوای فصاحتده اولوب سلاست

و متانت و یالطافتی اعتباریله دخی فصاحتی عربی <sup>بی</sup> عاجز

قیلمشدر .

کلامک بلاغتی، مقتضای حاله مطابقتیدر. یعنی : مقامه

مناسب اولان وجهله تصویر و ترتیب اولنمسیدر، فقط فصاحتی

دخی شرطدر. فصاحت بولنمیان کلامده، بلاغت دخی بولنماز.

ادیب اولان کیمسه، شاعر اولسون، منشی اولسون،

قیومجی به بکزر؛ نصل که قیومجی، حلیاتدن بر شی پایه جق

اولدینی حالده اوللا : درر وجواهری سچر، ثانیاً : آنلرک

متناسب اوللرینی یان یانه دیزرایسه ادیب دخی کلمات فصیحیه پی

سچرو آنلری یکدیگرندن متنافر اولمیه جق وجهله دیزر. ایشته



آنک بوا یکی ایشی فصاحت دیمکدر؛ فقط قیومجینک بروظیفه سی  
دها وارد رک یاپه جنی شیئک نره یه طاقله جغنی بیلوبده آکا کوره  
ایشله سیدر. یوخسه کردنلک بیچمنده بر بیوک کوبه یاپار ایشه  
ایشه یاراماز. ایشته بوا مرثالث دخی مقتضای حاله مطابقنک  
مثالیدر.

بوراده حالدن مراد، حاصل معنای افاده ایله برابر بر  
خصوصیتی اعتباره سبب اولان شیدر، که آکا «مقام» دخی  
دینور، کلامک او یله بروجه مخصوص اوزره ایراد اولمنسندن  
مقصود اولان اغراضه: «معانی» ثوانی «ترکیبک مجموع  
مدلولاته: «معانی» اول «دنیلور».

مثلاً: بر خواجه، چوجقلمره عقاید دینه تعلیم ایدرکن  
«انسان اولدکن صکره دیر یله جکدر» دیر و بو خصوصده  
چوجقلمر، خالی الذهن اولدقلمندن کلامی تأکید محتاج اولمیوب  
بو یله اطلاق اوزره براغور؛ اما آخرتی منکر اولان کیمسه یه  
خطاب ایده جک اولدیغی تقدیرده: «انسان اولدکن صکره  
البته دیر یله جکدر» دیو کلامنی تأکید ایلر. بوصورته «البته»  
قیدی، اصل معنی اوزرینه زائد بر خصوصیتدر و مجموع عبارته نک  
مدلولی، معانی اولدندر و مخاطبک انکارینی رد ایتک،  
معانی توانیدندر؛ که کلامک مؤکد اوله رق ایرادندن  
غرض اودر و مخاطبک انکاری، مقام تأکیدر؛ یعنی:  
کلامک تأکیدینه سبب اولان بر حالدر و کلام مؤکد، بوجال  
و مقامک مقتضاسیدر.

كذلك ، مخاطبك فطانت وغباوتی برر حالدر، که هربری  
 كلامك بوجه مخصوص اوزره ایراد اولنمنی اقتضا ایدر .  
 شویله که : فطین اولان کیمسه به برطاقم دقیق و نکته لوسوزلر  
 سویلنور که غبییه سویلنمنسی مناسب اولماز. هر برینه مناسبی  
 وجهله سوز سویلمك ، مقتضای حاللریدر . [ کماوا الناس  
 علی قدر عقولهم ] حدیث شریفی ، بو دقیقهیه اشارتدر .  
 شهریلر ایله قرویلری دخی خطابده بووجهله فرق وتمیز  
 ایتک وهر برینه، درجه فهم وادراکاری قدر سوزسویلمك  
 لازم کلور .

كذلك سوزی بعضاً ایجاز، بعضاً اطناب ایلمك دخی  
 برر حال ومقامك مقتضاسیدر .  
 متكلامك بلاغتی، بر ملکه درکه متكلم ، آنکه تالیف  
 كلام بلیغه مقتدر اولور .

كلامك حدّ داننده حسنی وعندالبغا مقبولیتی ،  
 مقتضای حاله مطابقتی حسبله در . مقتضای حاله مطابقت  
 ومصادفوسی تقدیر اتم اولور ایسه او مرتبه بلیغ واعلی  
 اولور . حسن و مقبولیتده انحطاط درجه سی دخی بو  
 خصوصده اولان نقصانی ایله متناسبدر . مقتضای حاله  
 مطابق اولمیان كلام ایسه عندالبغا « اصوات حیوانات »  
 قیلندن عد اولنور .

علمای عربیه نك بیان ایتدکری وجهله بلاغتک ایکی



اوجی واردرد. بری: اڤ آشاغی درجه سیدر که آنک مادونی،  
 بلاغتن عاری دیمک اوله رق، عندالبلغا اصوات حیواناته  
 ملحق اولور. دیکری: اڤ اعلا درجه سیدر که قابل تنظیر  
 اولیان درجه سی دیمک اوله رق، قرآن کریمه مخصوصدر.  
 الفاظک سلاستی و جزالت یارقتی دخی موجب فضیلت  
 و مقبولیت اوله رق، بر وجه بالا امر اعجازی مؤید اولور  
 ایسه ده قرآنک اصل اعجازی بو خواص معنویه ایله در.  
 ایشته بوابکی اوجک آره سنده بلاغتنک درجات متفاوته سی  
 واردرد. بعضاً بر مضمونی قاج شاعر، یامنشی بیان ایتدکلرنده،  
 کوریلور که یکدیگره درجه درجه تفوق ایدرلر. بودرجه لر،  
 کلامک مقتضای حاله مطابقتی حسبیه تعیین ایدر؛ چونکه  
 اشخاص نصل که صور مخصوصه لریله متشخص و متمیز  
 اولور ایسه کلامر دخی خواصیه متمیز و ممتاز اولورلر.

کلامک خاصیتی ایسه معانی اولی، ذهنده معانی توانییه  
 انتقال اولنه بیله جک صورته تصویر والفاظی دخی آکا کوره  
 ترتیب ایتدکدر. بو دخی کلامی، مقتضای حاله تطبیق دیمکدر.  
 کلامک مقتضای حاله کیفیت تطبیق، « فن معانی » ایله  
 بیانور. دیمک اولور که اصل بلاغتی بیلدیرن، فن معانیدر؛  
 فقط کلامده تشبیه، مجاز و کنایه بولنور ایسه آنلرک دخی حقیله  
 ایراد اولنمی لازم اولور بوا یسه « فن بیان » ایله معلوم اولور.  
 چونکه طرق ادای مراد اوچدر. حقیقت، مجاز، کنایه در.

حقیقت، موضوع الهنده مستعمل اولان لفظدر. مجاز، موضوع الهی اولان معنائک اراده سی جائز اولمیوب دیگر معناده مستعمل اولان لفظدر. کنایه، اول لفظدرکه موضوع الهی اولان معنائک اراده سنه بر مانع اولمدینی حالد، آندن دیگر معنی اراده اولنور. ساده جه و دوزجه حقیقت وجهله مقتضای حاله مطابق اوله رق ایراد اولنان کلام بلیغ اولور؛ فن بیانیه تعلق ایدر جهتی اولماز. اما بعض مخیلات ایله کلامی زنکین ایتک ایچون بعض تشبیهات کتوریلور ایسه قواعد بیانییه توفیقی لازم کلور. تشبیه اتده نیجه لطائف ونکت بیانییه بولنور. وتشبیه، بر نوع کنایه قیلمندن عد اولنور. مثلاً: «فلانک یوزی بدر کیدر» دینلدکده، اگرچه بو موضوع الهنده مستعمل ایسه ده مفهوم وضعیمی مراد اولمیوب بلکه «یوزی پک کوزل وغایت لطیف» معنایی اراده اولنور. کنایات و مجازات ایسه هب بو مثالو نکت و لطائفه مبتیدر.

الحاصل معنای حقیقیدن بشقه بر معنا اراده اولندینی حالد کثیث دلالته اصولنه رعایت اولنق لازم اولوب بو دخی «فن بیان» ایله بیلنور.

فن بیانجه معانی حقیقیه «معانی اول» وتشبیه، کنایه و مجازات ایله اراده اولنان معنالر «معانی ثوانی» عد اولنور. بناءً علی ذلک، بعض علمای عربیه بلاغتی: «متکلمک تأدیة معناده خواص ترا کیمک حقنی ایضا وانواع تشبیه، مجاز و کنایه یی

حقیقه ایراد ایده بیله جك حده بالغ اولمسیدر، دیوتعریف ایلمشدر.  
تفصیلات سابقه دن آکلاشدی که فصاحت ایله بلاغت بیننده  
عموم و خصوص مطلق واردر. هر بلیغ فصیحدر، اما هر فصیح جك  
بلیغ اولسی لازم گلر. نتیجه فصیح آدم لر واردر که سوزی  
مقتضای حاله تطبیق ایتیوب زائد، ناقص و صدودن خارج  
سوزلر سویلدکاری جهتله آنلره بلیغ دنیلمز.

بروجه مشروح، کلامك حسن ذاتیسی، بلاغیدر.  
وارتفاع شان و اعتباری بلاغتی حسبیه در. سجع و جناس کبی  
صنایع بدیعیه دخی تزینات قییلندن اولوب کلام بلیغه «حسن  
عارضی» کتورر؛ اما حسن ذاتیسی، یعنی: بلاغتی اولمیان کلامی  
صنایع بدیعیه ایله تزین ایتك برچرکینه حلی کرانها طابق کیدر.  
اسلاف ادبا بلاغته زیاده اعتنا ایدوب صنایع بدیعیه یه  
بك او قدر اعتنا ایتمز لردی. متأخرین بونلره زیاده اهمیت ویردی.  
صکره لری بلاغته قوت و مهارت آزالدجه صنایع بدیعیه یه  
لزومندن زیاده اعتنا ایدیلور اولدی. اشعار و منشآت مزه پ  
طائسز طوزسز صنایع بدیعیه ایله طولدی. بوکا سبب دخی  
ادبامزك میدان بلاغتمده راجل اولملریدر که قصورلری ستر  
ایچون کلاملری تزینات بدیعیه یه بوغارلر. بو بیچاره لر؛ ظن  
ایدرلر که صنایع بدیعیه قدر چوق اولور ایسه کلام او قدر کوزل  
اولور. ادبا ایسه دیمشلدردر که: «صنایع بدیعیه یوزده کی بنلر کیدر؛  
برایکی اولور ایسه کلامه حسن ویرر. چوق اولور ایسه قبیح اولور.»



برده، لفظ معنایه تابع اولمق لازم کاور ایکن، نیجه منشیلر  
عکسینی التزام ایله سجع بولمق ایچون تکلیف و معنایی محسنات  
لفظیه فدا ایدرک بلاغت کلامه خلل کتوررلر .

قالدی که کلام مسجع شعر کبی خیالی و مصنوع حکایاته  
واخوانیاته ، یعنی : اخوان و یاران آره سنده تعاطی اولنسان  
مراسلاته یاقیشور؛ اما علوم و فنونه دائر اولان کتب و رسائل،  
فرمانلر، عمومه خطاباً یازیلان اوامر سلطانیه و اثر محررات  
رسمیه، صکوک شرعیه و قانونیه هپ ترسیل یولنده یازلملیدر .  
چونکه علوم و فنونه دائر اولان کتب و رسائلده مقصد  
آنحقی مسائلی اک واضح یولده تعلیم و تفهیم اولدیغندن بونلرده  
تزینات لفظیه یاقشماز . و سجع برنوع تکلف دیمک اولدیغندن  
محررات رسمیه آندن ابا ایدلملیدر . صکوکده ایسه قواعد  
شرعیه و قانونیه مک مقتضاسی نه ایسه آنی عینیه یازمق لازم  
کاور . زیاده و نقصان قبول ایتمز . بودخی کلام مسجعه الویرمز .  
بناءً علی ذلک بونلرده سجع مکروهدر؛ مکروه طبعیه بر سجع  
دوشمش اوله . منشیان و کتابمز ایسه بروقتدیر و شاهراه بلاغتی  
اونوتدیلر . محررات رسمیه ده هپ طریق تسجیمی التزام ایتمیلر .  
بناءً علیه رسمیاتده کی بوسجع مراقی محکمه لره دخی سرایت ایدوب  
بو جهتله نیجه حجج شرعیه مک اصول صکی بوزولدی . ایشته  
بو حاللر لسانمزک بلاغتجه کیر و قالمسینه سبب اولمشدر .



## ❧ لاحقہ ❧

کلام بر نسبت نامہ یہ دلالت ایدن جملہ در. شویاہ کہ: بر حال  
وصفت بر شیئہ نسبت اول نور و مخاطب آدن فائدہ نامہ حاصل  
ایدوب آنک اوزرینہ سکوت ایتک صحیح اولور. ایشتمہ او  
نسبتہ اسناد و طرفیندن برنجیسنہ «مسند الیہ» ایکنجیسنہ  
«مسند» دنیلور.

کلامک مدلولی اولان اشبو نسبتک خارجده مطابق، یا غیر  
مطابق اولہ جنی بر نسبت وار ایسہ اول کلامہ: «خبر» و «جملہ»  
خبریہ» دنیلور.

مثلا: «خواجہ افندی مکتبده در» کلامی بر خبردر کہ  
خواجہ فی الواقع مکتبده ایسہ بو کلامک مدلولی اولان نسبت  
خبریہ آکا مطابق اولور، دکل ایسہ مطابق اولماز. اگر اولیہ  
بر نسبت خارجیه بولنماز ایسہ «انشاء» و «جملہ» انشائیہ» دنیلور.  
مثلا: «کسون»، «کسیدی» کی طلب و نمئی فعللرینک  
مدلوللری اولان نسبتدن قطع نظر ایله خارجده بشقہ بر نسبت  
یوقدر. صیغ عقددن اولان «آدم» «صائدہ» فعللری دخی  
انشاء اولوب اگرچه بونلرک مدلولی اولان نسبتلردن بشقہ  
خارجده دخی نسبتلر واریسده بونسبت خارجیه لر اول صیغہ لر  
ایله ایجاد اولور؛ یوخسه آنلرک مدلوللری اولان نسبتلرک  
مطابق اولوب اولیہ جنی نسبت خارجیه دکلردر. اما «دون

فلان مالی صاندم» دنیلده کده دون واقع اولان عقد بیعی حکایه  
 دیمک اوله رق «خبر» اولور و دون او یله بر عقد بیع واقع اولمش  
 ایسه بو خبرک مدلولی اولان نسبت آکا مطابق و اگر واقع  
 اولماش ایسه غیر مطابق اولور.

کذاک «صانارم»، یا «صاتیورم» و یاخود «صاته جغم»  
 صیغهلری اخبار اولمغله بونلرک مضمونی اولان نسبت ذهنیه دن  
 بشقه زمان حالده، یا مستقبلمده بر عقد بیع بولنق لازمکلور.  
 «نسبت خبریه» که برشی واقعدر، یاخود واقع دکلمدر،  
 یعنی: «برشی دیگر شیئه ثابتدر». یاخود «ثابت دکلمدر» دیمکدر.  
 بونسبت اگر نسبت خارجیهیه مطابق ایسه «صادق»، دکل ایسه  
 «کاذب» دنیلور. بناءً علیه «خبر، صدق و کذب محتمل اولان  
 کلامدر» دیو تعریف اولنور.

«نسبت خبریه» نک ایکی جهتی که وقوع و لا وقوعدر.  
 اگر عقل بوجهتلردن برینی ترجیحاً تصدیق ایلر ایسه «یقین»  
 تسمیه اولنور. و خبر، اگر ظنی مفید اولور ایسه، «قضیه ظنیه»  
 و یقینی مفید اولور ایسه، «قضیه یقینیه» دنیلور.

قضیه ظنیه قرائن و اماراتدن مأخوذ اولان قضیهدر، که  
 عقل آنی ظن غالبه مبنی حکم ایلر ایسه ده نقیضنی دخی تجویز  
 ایلر. بوجهتله ظنیاتک جمله سی نظر یدر. اما قضیه یقینیه، یا «بدیهیه»  
 و یاخود «نظریه» در.

نظریه، عقلاک بر دلیل ایله تصدیق ایله یکی قضیهدر، که دلیلک



مقدماتی ہب یقیناً تندن ایسہ «یقینہ» والا «ظنیہ» در . مثلاً :  
 کیجہ قرا کلقدہ طولاشان بر شخص حقندہ : «بو آدم خرسزدر»  
 زیرا کیجہ قرا کلقدہ طولاشیور . بویلہ قرا کلقدہ طولاشان  
 کیمسہ خرسزدر . «دنیلدکدہ عقل اول شخصک خرسز  
 اولدیغنه حکم ایلر ایسہدہ نقیضنی دخی تجویز ایلر؛ چونکہ  
 قرا کلقدہ طولاشمسی بر سبب فوق العادیہ مبنی اولمق دخی  
 عقلاً محتملدہ . بوجہتله دلیل «ظنی» اولمغلہ اول قضیہ دخی  
 «ظنیہ» در .

اما «برمثانک اوچ زاویہ سی ایکی قائمہ مساویدر» قضیہ  
 نظریہ سنی اثبات ایدن برہان ہندسینک مقدماتی ہب یقیناً تندن  
 اولمغلہ بو «قضیہ نظریہ» دخی «قضیہ یقینہ» در . «قضیہ  
 بدیہیہ» دایل ایلہ اثباتہ محتساج اولقسزین عقلک جزماً حکم  
 وتصدیق ایلدیکی قضیہدر ، کہ ایکی قسمہ منقسمدر . بری :  
 «بدیہیہ عقلیہ ، دیگرکی : «بدیہیہ حسیہ» در . بدیہیہ عقلیہ اول  
 قضیہدر کہ عقل آنک تصدیقندہ خارجہ داشماز وحواسک  
 توسط واعانہ سنہ محتساج اولمز ؛ بلکہ مجرد موضوع و محمولی  
 تصور ایدیجک ، بینلرندہ کی نسبت حکمیہ یی جزماً تصدیق  
 ایدیورر . بولرہ : «علوم متعارفہ» دنیلور .

مثلاً : «کل جزئندن بیوکر» ، «کل مجموع اجزاسنہ  
 مساویدر» ، «بر مقدارہ مساوی اولان مقدارلر متساویدر» ،  
 «دائرہ مربع دکلدر» ، «برایکینک یاریسیدر» ، «بر اوچ دکلدر» ،

شایان آنجق بو « بدیهه اساسیه » ایله آندن تولد ایدن « بدیهیات  
عمومیه خمسہ » درہ دیگر « بدیهیات عقلیہ » ده ، درجہ درجہ  
دلایل بکزر تنبہلر بولنور .

اما « بدیهیات حسیہ » مشاہدات ، حدسیات ، مجربات  
ومتواتراتدر . « مشاہدات » اول قضیہ لردرکہ مجرد حس ایله  
جزماً تصدیق اولنور . « آتش یاقیجیدر » « قار صوغوقدر »  
« تیموریموشاق دکلدر » قضیہ لری کبی .

« حدسیات » اول قضیہ لردرکہ بعض مشاہدات اوزرینہ  
حدس ایله دفعه ، یعنی : سنوحات قیلندن اولہرق ذهنده حاصل  
اولان قیاس خفی واسطہ سیلہ عقل آنلری جزماً تصدیق ایلر .  
« قمرک ضیاسی کونشدن مستفاددر » قضیہ سی کبی کہ قمرک کونشہ  
نسبتلہ اوضاعی تبدل ایتدجکہ تشکلات نورانیہ سنک اختلافی  
مشاہدہ اولنہ جق . « اکر قمرک نوری کونشدن منعکس  
ومستفاد اولسہ ، اوضاعی تبدل ایتدجکہ تشکلات نورانیہ سی  
مختلف اولمز ایدی » دیو دفعه قلبہ سنوح ایدن قیاس خفی  
واسطہ سیلہ عقل اول قضیہ یی جزماً تصدیق ایلر .

« مجربات » اول قضیہ لردرکہ تکرر مشاہدہ ایله عقل آنلری  
جزماً تصدیق ایلر . « مغنریا مسہلدر » قضیہ سی کبی ، کہ  
لای التجربہ ہر نہ زمان مغنریا ایچلسہ ، اسہال ایلدیکی کوریلنجہ ،  
عقل آنک « مسہل » اولدیغنی جزماً تصدیق ایدر .

متواترات اول قضیہ لردرکہ آنلری کذب اوزرینہ اتقاقاری

عقلاً محال اولان جم غفیر خبر ویرمکه جزماً تصدیق اولنورلر.  
 [مکه] و [بغداد] ی کورمدن، موجود اولدقلرینی تصدیق ایتمک کی.  
 «بدیهیات عقلیه» ده حکم آنجق موجود ذهنی و مفروض  
 اوزرینه اولوب موجود خارجی و محقق اوزرینه دکلدر. مثلاً:  
 «دائرة مربع دکلدر» دیدیکمزده، دائرة نك خارجده موجود  
 اولوب اولماسی آرانمیوب، دائرة موجود اولسون اولسون،  
 موجود اولدینی تقدیرده «مربع دکلدر» دیمک اولور. بناء علیه  
 بدیهیات عقلیه ده محمولك موضوع ایله اتحادی، یا خود عدم  
 اتحادی عقلاً ضروریدر. نقیضلری محال عقلیدر.

اما «بدیهیات حسیه» ده حکم موجود خارجی اوزرینه  
 اولوب محمولك موضوعه ثبوتی بویه ضروری دکلدر. عقلاً  
 استثنا قبول ایده بیلور؛ کلیتاری ملاحظه کوتورر. بوجهته  
 نقیضلری محال عایددر؛ چونکه مشاهداتده غلط و خطا احتمالی  
 وارددر. مثلاً: بر پارچه سی صوایچنده بولنان دکنک قیریق کی  
 کورینور. بوايسه غلط حس بصردر. بناء علی ذلك مشاهداتده  
 نظره اولایه آلدانمیوب حقیقت حالی تحری و تحقیق ایلمک لازم  
 کلور. حالبوکه بالذات مشاهد اولان شیلرده بویه غلط و خطا  
 احتمالی اولنجه، تجربه واسطه سیله مشاهداتدن مأخوذ و منتزع  
 اولان قضایای کلیه یی کافه احتمالات عقلیه دن قورتارمق مشکلدر.  
 مثلاً: مغزیانك مسهل اولدینی مجزوم ایکن، بعض موانع حیلولتیه  
 حکمی تخلف ایتمک عقلاً ممکندر.



«مقدمات یقینیه» یولنسه بیله، مجرد مخاطبک عندنده مسلم اولدیجی جهتله قوللانیلور. آخره تعدی ایدن کمنه نی «جورقیی حدر» دیو اقناع ایتک؛ و حضرت عیسی (علیه السلام) ک باباسز اولدیغی انکار واستبعاد ایدن بریهودی یی حضرت آدم (علیه السلام) ک هم باباسز، هم آناسز اولدیغی بیانیه اسکات ایلمک کی.

وغرض اکر ناسه وعظ ونصیحت ایسه، «خطابه» دینور. ومقبولات وظنیاتدن مرکب اولور. واعظ وخطیب لک نطق لری کی. خطابتک ناسه حسن تأثیری اولمق حسبله فواید عظیمه سی واردر. وغرض اکر قوه نطقیه ایله ترغیب، یانفیر یولنده مخاطبک ذهننده بر تأثر حاصل ایتک ایسه، مخیلاتدن ترکیب اولنور. واهل منطق اصطلاحنجه: «شعر» دنیلور؛ کک منظوم اولسون، کک منشور اولسون. اما علمای عربیه اصطلاحنجه، شعرك موزون ومقفا اولسی لازمدر. موزون ومقفا اولمدیغی حالده مخیل اولسه بیله «شعر» دنیلمیوب «نثر» دنیلور. بویه مخیلاتدن مرکب اولان نثرلرده اکثر یا سجع وجناس کی «صنایع بدیهیه» یه رعایت اولنور. وهمیاته کلنجه: متکلم اکر بونلری عن اعتقاد درمیان ایلر ایسه، آنلردن مرکب اولان دلیلله «سفسطه» دینور. واکر مجرد مخاطبی تغلیط ایچون سویلر ایسه، آنلردن مرکب اولان دلیلله «مغالطه» دنیلور.

بو بحثلر علم منطق مسائلندن اولمقله تفصیلی ایستیانلر «معیار

سداد» نام رساله مزه مراجعت ایلسون.

مغالطہ مذمومدر . سفسطہ ایسہ ، « جہل مرکب » دیمک  
اولدینی جہتلہ آندن تخلیص نفس ایتنک چارہ سنہ باقلیدر .  
مخیلات تشبیہ ، مجاز و کنایہ قبیلندن اولغلہ « علم بیان » عائد  
مسائلدندر .

خطابہ نک ناسہ حسن تاثیر حاصل ایتسی ایچون ہر فقرہ سنک  
مقتضای حالہ تطبیقی الزمدر . وا کثریا « ترسیل » یولندہ ایراد  
اولنوب « سجع » التزام اولنماز .

جدلدہ یقینیات آرانماز . برہاندہ ظنیات قبول اولنماز ؛  
بلکہ مبہشک ایجابنہ کورہ یقینیاتک نوعنہ دخی دقت اولنق لازم  
کلور . مثلاً : « حکمت طبیعیہ » دلیلارندہ « بدیہیات حسیہ » یہ  
استناد اولنور . اما « براہین ہندسیہ » نک کافۃ علوم متعارفہ یہ  
مستند اولسی لازمدر . « برہان ہندسی » ایلہ بر مسئلہ اثبات  
اولنہ جق یردہ « پرکار » ایلہ اثبانہ حیقیشیلور ایسہ صدردن  
حیقلمش اولور .

چوق دفعہ دلیلارک بعض مقدماتی طی اولنور . بودخی « فن  
معانی » نک ایجاز بختہ دائر اولان مسائلدندر .

علم « منطق » مجرد افکارک میزانی اولق حسیلہ علوم لسانیہ دن  
دکدر . اما « علم بلاغت مزایای کلامک کیفیت افادہ سندن ،  
طرق اداسندن وکلام بلیغک وجوہ تحسینندن باحث اولغلہ ، علوم  
لسانیہ دندر . دیباجہ دہ اشعار اولدینی اوزرہ بو رسالہ اوچ  
بابہ منقسمدر .

- باب اوّل : کلامک مقتضای حاله تطبیق کیفیتنی بیلدیرر .  
 باب ثانی : « تشبیه » « مجاز » و « کنایه » دن بحث ایدر .  
 باب ثالث : « صنائع بدیعه » بی تعریف ایلر .





# بَلَاءُ عُمَانِيَّة

## باب اول

کلامك مقتضای حاله مطابقی مقدمه اولوب بر مقدمه

ایله بری فصلی مستمدر

.....

### ﴿ مقدمه ﴾

ترکیب، ایکی قسمدر. قسم اول: «ترکیب ناقص» و قسم ثانی: «ترکیب تام» در.

ترکیب ناقص نسبت ترکیبیه بی مفید اولان ترکیبدر نته کیم: «کوله رک کلان افندی نک اوشاغی» عباره سنده کی «حال ترکیبی» و «ترکیب وصفی» و «ترکیب اضافی» کی.

ترکیب تام نسبت تامه بی، یعنی: اسنادی مفید اولان ترکیبدر که بالاده بیان اولندی بی اوزره «کلام» تسمیه اولنور. و آکا «جمله» دخی دنیلور.

فقط «جمله» ایله «کلام» بیننده عموم و خصوص مطلق وارد. شویله که: ترکیب متضمن اولدی بی اسناد اکر مقصود بالذات ایسه ایکی سی مجتمع اولور. دکل ایسه یالکیز «جمله» دنیلور، «کلام» دنیلمز.

مثلا: «عدالت کوزلدر» ترکیبی هم کلام، هم جمله در. اما [فضولی] ناک:

«او ماهیار که دریا ایچره در، دریایی بیلمز لر»

مصراعی ایکی جمله یی متضمن بر کلامدر . و مقصود بالذات اولان اسناد آنجق « بیلمز » فعلنک « ماهیلر » اسنادیدر . و « دریا ایچره در » جمله سی ماهیلرک صفقی اوله رق اسنادی مقصود بالذات اولدیغندن آکا « کلام » دنیلمز .

کذلک : « فلان افندی مجله » احکام عدلیه او قور ایکن چوق چالیشوردی « ترکیبی ایکی جمله دن مرکب بر کلامدر . و مقصود بالذات آنجق « چالشمق » فعلنک مسند الیه اسنادی اولوب « مجله او قور ایکن » ترکیبی ، بر « مجله » حالیه « اوله رق اسنادی مقصود بالذات دکلدر .

بعضاً جمله لر مفرد ایله مأول و مفرد لر کی نسبت تقیدیه یی مفید اولور . « صیغه صله » کی .

کلامک اجزاسی « عمده » و « فضله » دیو ایکی قسمه تقسیم اولنور « مسند الیه » ایله « مسند » « عمده » در . آنلرک « مضاف الیه » و « صفت » کی قیدلری ایله ، « متممات جمله » دخی « فضله » در .

کلامک متضمن اولدینی اسناد دخی - بالاده بیان اولندینی اوزره - « خبر » و « انشا » قسملرینه منقسمدر . کله لر یکدیگری اوزرینه عطف اولندینی کی جمله لر دخی بعضاً عطف ایله یکر یکرینه وصل و بعضاً یکدیگرندن فصل اولنور . و لنکته سوز بعضاً قیضه سویلنور .

ایشته بو موادک هربری ان شا الله تعالی بشقه بشقه فصللرده بیان اولنه جقدر .

## ﴿ فصل اول ﴾

احوال مسند الیه بیاننده در

مسند الیه کلامک برنجی رکنیدر . بر قاعده مسند اوزرینه  
تقدیم اولنور . بعضاً « قصر » معناسنی افاده ایچون تأخیر قیلنور .  
نته کیم : « اودر بوکا سبب » دینور که « سبب آنجق اودر » دیمک  
اولور و بعضاً وزن و قافیه ایچون تأخیر ایدیلور .

مضارع طحیره :

« یا قشماز اهل کمال و وقاره فرط مزاج » کبی

بعضاً دخی قرینه ظاهره یه مبنی ، مسند الیهک ذکر  
عبث کوریلهرک ، حذف اولنور .

نته کیم : « فلان آدم نصلدر » دیو سؤال اولندقده ، مسند  
الیه حذف اولنهرق « ایدر » دیو جواب و یریلور .

بعضاً مسند الیهک اسمنی مخاطبک بشقه سندن کتم ایتمک ،  
یا خود لدی الحاجه انکاره مجال اولمق کبی بر نکسته یه مبنی حذف اولنور .

نته کیم : بر مجلسده حضاردن بری بر ذاتک ورودینه منتظر  
اولان کیمسه یه : « کلدی » دیر ؛ سائر حضاردن بری کتم ایتمک  
ایچون مسند الیهی ذکر ایتمز .

کذلک بر مجلسده موضوع بحث اولان بر کمنه حقنده  
حضاردن بری « فاسق و فاجردر » دیوب لدی الحاجه « بنم مرادم  
او دکل ایدی ، بشقه سی ایدی » دیه بیتمک ایچون مسند الیهی  
ذکر ایتمز .



کذلک آوجیلردن بری بر آهو کوردکده : « بو آهودر؛  
صیدایدیکز » دیه جک یرده ضیق وقت حسیدیه مسند الیهی حذف  
ایدرك « آهودر » دیر .

مسند الیه بر فعلک فاعلی اولوبده ذکرى استنمیدی  
حالده، « معلوم » صیغه سی « مجهول » صیغه سنه تبدیل اولنور .  
نته کیم : « حیدودلر صلب اولندی » دنیلور؛ چونکه مقصد  
اصلی حیدودلرک دفع مضررتی اولدیغندن صلب ایدنلرک ذکرینه  
حاجت کورلمیوب مجهول صیغه سیله ایراد اولنور .

بعضاده قرینه پک ظاهر اولدیغی حالده، مسند الیه تعظیم و  
یا اسمیه تبرک، یاخود تلذذکی بر نکته یه مبنی ذکرى التزام اولنور .  
مثلا: « یاوز سلطان سلیم کیمدر؟ » دنیلدکده: « یاوز سلطان  
سلیم برنجی خلیفه عثمانیدر » دنیلور. و « عبد القاهر جرجانی  
کیمدر؟ » دنیلدکده: « عبد القاهر جرجانی علم بلاغتک امامیدر » دنیلور.  
کذلک مجالس مصاحبت احباده متکلم، اکثریا سوزی  
اوزاتقی ایستمکه مسند الیهک ذکرینی التزام ایلر .

کذلک بر شخصک استنطاقنده - بر امری آتیده انکاره  
مجال قلمامق اوزره - سوزینی تسجیل ایچون مسند الیهک  
ذکرى التزام اولنور .

ضمیر فعلی ونسبیلر مسند الیه دلالت ایتدکلرندن متکلم  
ومخاطب صورتلرنده اکثریا مسند الیه ذکر اولنماز : نته کیم :  
« کلام » و « کاورسک » دنیلور.

بیت طحمره :

بی وجودم چون نگاه اما یرم وار دیده ده  
سایه بخت سیاه آلتده بولدم رفعتی

دخی بوقیلندکه « بن بی وجودم » و : « بن بولدم » دیمکدر.  
بعضاً مسند الیهک شاننه اعتنا واهتمام ایچون ذکر الی التزام  
اولنور . نته کیم : « ایشته بن کلدیم » و : « ایشته سن بویله  
یاپارسین » دنیلور .

بیت طحمره :

سن کتور باری ستانبولدن حوادث ای صبا  
جانمه کار ایتدی ؛ زیرا خار زار انتظار

دخی بوقیلندکر .

مسند الیهده اصل اولان معرفه اولمقدر . نته کیم : « فلان  
افندی » ، یاخود : « او افندی کلدی » دنیلور .  
بعضاً نکره اولور . وبر وجهله تخصیص اولنور نته کیم :  
« بوکون برافندی کلدی » ، یاخود : « سوز آ کلار بر آدم  
کلیور » ویاخود « بر محکمه محضری گلش » دنیلور .  
بعضاً ادات تعریف و تنکیردن عاری براسم عام اولور .  
« انسان غافلدر » دنیلیدیکی کی .

بعضاً براسمک بعض افرادینه دلالت ، یاخود کافه افرادی  
احاطه واستغراق ایچون اولنه آدات سور کتوریلور . نته کیم :  
« بعض ناس نا کس اولور » دنیلیدیکی کی .

استغراق ایکی قسمدر . « حقیقی » و « عرفی » در . استغراق  
حقیقی لفظک بحسب اللغة شامل اولدینی جمیع افرادی احاطه در .

« هر کس کندی فائده منی آراز » قضیه مسنده اولدینی کبی .  
 استغراق عرفی بحسب العرف لفظدن منفهم اولان افرادی  
 احاطه در . نته کیم : « هر قیو مجی بوالماسی کوردی » دنیلور که :  
 « بلده من قیو مجیلرینک هربری کوردی » دیمک اولور .  
 ضمیر لر ، اسم اشارت لرایله علملری یعنی : اسم حاصل رهپ معرفه در .  
 واسم عامک اولنه « او » کتوریلور ایسه « معرفه » و « بر »  
 کتوریلور ایسه « نکره » اولور . مثلاً : « اوشی » و « اودات »  
 معرفه ، و « برشی » « برذات » نکره در .  
 بعضاً « او » یرینه « معهود » لفظی کتوریلور . « معهود  
 خواننده » کبی که « سنک بیلدیکک خواننده » دیمک اولور .  
 واسم عام معرفه یه اضافتله « معرفه » اولور . و نکره یه اضافت  
 ایله « تخصیص » اولنور . مثلاً : « فلان افندینک خزینه داری »  
 معرفه ، و « برافندینک خزینه داری » « نکره مخصوصه » در .  
 تعریف و تنکیرک اسبابنه کانهجه : مسند الیهک ضمیر اوله رق  
 ایراد اولنسی مقامک . تکلم ، یا خطاب و یا غیبت موقعی اولسنه مبیدر .  
 شویله که : مفرد متکلم ایسه « بن » جمع متکلم ایسه ، « بز »  
 و مفرد مخاطب ایسه ، « سن » جمع مخاطب ایسه ، « سز » دینور .  
 اما غائب صورتنده : ضمیر غائب ، یا اسم اشارت و یا خود  
 اسم خاص و یا اسم عام کتوریلور .  
 ضمیر غائب آنجق ذکر ی سبق ایتدیکی تقدیرجه ایراد اولنور .  
 نته کیم : اولجه اسمی سویلنمش اولان کیمسه حقنده « او » دنیلور .



واسم اشارت اوله رق ایراد اولنسی حاضر و مشاهد اولدینی تقدیر جه در .

بودخی آنی اکمل وجه اوزره تمیز ایچوندر . نته کیم :  
محکمه ده حاضر اولان مدعی و مدعا به اشارت ایله «شومال بو  
آدمکدر» دیو شهادت اولنور .

بعضاً تعظیم ، یا تحقیر و یا ترجم ایچون اولور . نته کیم :  
تعظیم مقامنده : «فلان محاربه یی ایشته بو قوماندان قازاندی .»  
دنیلور . تحقیر مقامنده : «شو حریفی بزمه بحث ایده جک ؟»  
دینور . ترجم مقامده : «بو یچاره لر نلر چکدی» دنیلور .

بعضاً مسندالیه متکلم ایله مخاطب بیننده معلوم اولدیغندن  
«او» دیو تعریف اولنور . نته کیم : ورودینه انتظار اولنان  
بر آدم حقنده : «او آدم کلدی» دنیلور . بونده دخی تعظیم ،  
تبرک ، تحیر کبی معنالر قصد اولنور . نته کیم : «اودات» ،  
یا خود «اودات شریف کلدی» و یا خود «او حریف کلیور» دنیلور .  
مسند الیهک علمیتله تعریفی : یعنی : اسم خاص اوله رق  
ایراد اولنسی آنی دفعهً بعینه : یعنی جمع مشخصاتیه سامعک ذهنه  
کتور یویرمک ایچوندر .

مدح و ذمی مشعر اولان لقباردن بعضاً مدح و ذم دخی  
قصد اولنور نته کیم : «ابوالخیر افندی خیری سور برذاتدر»  
و «قره چایی فنادر» دینلور .

واضافتی بروجّه بالا تعریف ، یا تخصیص ایچوندر و بعضاً

تعظیمی، یا تحقیری مشعر اولور. «فلان پاشانک اوغلی» و «محله بکجیسینک اوغلی» کبی. بعضاً دخی مجرد «تشریف» ایچون اولور. «بیت الله» کبی.

قاعده ترکیه اوزره مضاف الیه دائماً مضاف اوزرینه تقدیم اولنور فقط بعضاً وزن ایچون تأخیر قیلنور.

آیاغندن بو بزمک ال چکوب دور اولمازیکدر  
مصرغنده اولدینی کبی.

اما مسندالیهک تنکیری وحدت ایچوندرد. «برکشی کلیور»  
دنیلدیکی کبی؟

بعضاً تفخیم، یا تصغیری مشعر اولور. نته کیم: «آکا بر حال اولدی» دنیلور که «بیوک حال اولدی» دیمک اولور. «آنک بر سوزی سنی احیا ایدر» دنیلور و «چوک سوزی» اراده اولنور. سیاق نفیده «نکره» عمومی افاده ایدر مثلاً: «جیمده بر پاره یوقدر» جمله سی «قضیه سالبه کلیه» در. و بعضاً مؤکد اوله رق «هیچ بر» دنیلور.

چونکه کلامده: مسندک مسندالیه ثبوتندن فضله هر نه درلو قید بولنور ایسه، مناط حکم و غرض اصلی اودرد. بوجهتله نفی دخی قیده توجیه ایدر. بناء علیه «هرکس کندو فائده سنی آرار» جمله سی «قضیه موجهه کلیه» اولدینی حالده «هرکس نا کس دکدر» جمله سی رفع ایجاب تکلی قیلندن اوله رق «قضیه سالبه جزئی» در.

تعریف و تنکیردن عاری اولان اسم عامدن بعضاً ماهیت مجرده

قصد اولنور. «طول عرض، وعمقی اولان شیدر» دیوتمریف اولنان مفهوم جسم کبی .

وبعضاً افراد مطلقه ضمنده تحقیقی مراد اولور . نته کیم : «انسان یر، ایجر» دنیلدیکی کبی .

وبعضاً قرینته حالیه ایله «فرد معین» قصد اولنور. نته کیم : اوشاغنی بر محله کوندروبد و رودینه منتظر اولان افندی یه : «اوشاق کلدی» دنیلدکه «او اوشاق کلدی» دیمک اولور . ینه بو قبیلدن اوله رق بر افندی خدمتکارینه : «چانطه یی کتور» دیوبده بینلرنده معلوم و معین اولان چانطه یی مراد ایلر . شویله که : چانطه اکر میدانده ایسه «شو چانطه یی کتور» دیمش اولور و اکر بشقه محله ایسه «معهود چانطه می کتور» دیمش اولور . مسند الیهک توصیفی بعضاً مجرد تخصیص ایچون اولور . «شاهد عادل» «بیوک چانطه» «اوزون بویلی آدم» «توتونجی احمد افندی» ترکیبلی کبی .

وبعضاً مجرد کشف و ایضاح معنی ایچون اولور. «طول ، عرض و عمقی اولان جسم» دنیلدیکی کبی .

وبعضاً وصفدن مدح، ذم و یا ترحم قصد اولنور. «درایتلو ذات» «جاهل حریف» «بیچاره آدم» کبی .

صفت ایکی نوعدر. نوع اول: وصف ذاتی یعنی: موصوفک گندی صفتیدر . آتف الذکر مثالدرده اولدینی .

بو مقامده بعضاً «ضمیر وصفی» قولانیلور. «اوده کی بازار چارشویه اویماز» مثلنده اولدینی .



و بعضاً دخی «فرع فعل» قوللانیلور . «مکتوبی یازان»  
 «یازیلان مکتوب» «ولی النعم» ترکیبلی و «روز کارک اوکنه»  
 دوشمیان آدم یوریلور «مصر عنده کی» «دوشمیان آدم» ترکیبی کی .  
 نوع ثانی : و صف سبیلدر . یعنی : موصوفک کندی  
 صفقی اولیوب بلکه بر صفت اعتباریه دره . بودخی ایکی صنفدر .  
 صنف اول : بر شیئی مضافنک وصفیه توصیف ایتدکدر .  
 «یوزی قاره اولان کیمسه» ترکیبی کی که قاره یوزک وصف  
 ذاتیسی اولوب آنک سبیلله صاحبی دخی توصیف اولنور .  
 «صاچی اوزون» «اخلاقی کوزل» ترکیبلی دخی بوقییلندر .  
 بو مقامده فرع فعللر دخی قوللانیلور . «صاچی قیر قلمش»  
 «قویروغی کسیک» «مقطوع الذنب» «ستوده صفات» «مددوح الشیم»  
 صفتلری کی . «طالعی یار اولانک یار صارار یاره سنی» مصرعی  
 دخی بوقییلندر .

صنف ثانی : فاعلی متعلقات فعلدن برینک وصفیه توصیف  
 ایتدکدر .

ایشته بومقامده «صیغه صله» استعمال اولنور . «بیلدیکم  
 ذات» «عطیه ویردیکم افندی» «اوروج طوتدینمز وقت»  
 ترکیبلی کی .

بیت طحمره :

تجلی خانه خولیا ده قالدی جودتا آنجق  
 باقوب صرأت رخسارینه حیران اولدینم برلر

ذکر اولنان اوچ صورتده دخی صفتلر بعضاً جمله اوله رق  
 فارسیدن مأخوذ اولان «که» اداتیه موصوفه ربط اولنور .

نته کیم : «او ماهیلر که دریا ایچره در دریایی بیامزله.»  
 مصرعنده «دریا ایچره در» ترکیبی «آنلر دریا ایچره در» دیمک  
 اوله رق، ماهیلرک وصف ذاتیسی اولان برجه اولوب «که» ایله  
 ربط اولنمشدر. وبو جمله وصفیه نك معناسی «دریاده کی ماهیلر»  
 یاخود «دریاده اولان ماهیلر» دینلمکه دخی ادا اولنه بیلور.  
 و«شهر شهیر استانبول که هواسی فوق العاده لطیفدر؛ اهالیسی  
 اولنبتنده ذکی و ظریفدر» دیدیکه زده «هواسی لطیف اولان استانبول  
 اهالیسی ظریفدر» دیمک اوله رق وصف سببینک صنف اولندن اولور.  
 «شهر شیرین استانبول که آنی ابتدا ۱۲۵۵ سنه می اوائلنده  
 کوردیم؛ الله دها زیاده شن و آبادان ایلسون؛ چوق صفاسنی  
 سوردم» دیدیکم زده «ابتدا فلان تاریخده کوردیکم استانبولک  
 چوق صفاسنی سوردم» دیمک اوله رق، وصف سببینک صنف  
 نانیسندن اولور.

طویل الذیل اولان صفتلر اکثریا بواسلوب اوزره ترکیب  
 اولنه رق : «که» اداتیه موصوفلرینه ربط اولنور.  
 نته کیم : [ ترکیبی ] نك «پادشاهلر که وجود بهبودلری،  
 جود مصور و همیشه کارو کردارلری بذل و وسیم و ایثار تحف  
 و کهردر؛ عند التحقيق سکان هفت اقلیمک جمیع اعمار صد  
 ساله لرنده بذل و نثار ایتدکری مجموع اموال تحت نشینان  
 سلطنتک بر لحظه کهرتقین ایثار ایتدکری اندک عطیه لرینه  
 برابر اولیوب فی نفس الامر آثار حسان احسان اول

سعادتنهایلرک لازمه شان سماحت نشانلری اولدیغندن آه»  
فقره سی وصف سببینک صنف اولندندر.

وینه [ ترکیسی ] نک

شهر خوش آب وهوا یعنی استانبول که اگر  
طرحی کورسه بهشتی اونودردی آدم  
محط رحال قرار وهبانه ملازمته چند روز منزلکه کاربارمن  
اولدقده آه « فقره سنده کی «خوش آب وهوا» صفتی وصف  
سببینک صنف اولندن و «که» اداتیه ربط اولنان «جمله شرطیه»  
وصف سببینک صنف ثانیندندر .

ترکیب وصفیلر بوجه بالاتعریف وتنکیدن عاری اوله رق  
ایراد اولندقلری کبی بعضاً دخی ادات تنکیر ویا تعریف ایله  
ایراد اولنورلر .

شویله که: ادات تنکیر ایله ایراد اولندقلری تقدیرده، اگر  
فارسی و عربی ترکیبی ایسه ، ادات تنکیر دائماً تقدیم اولنور .  
«براسب کرانبها»، «برشاهد عادل» ترکیبلری کبی .

واگر ترکیبه ترکیب ایسه بعضاً ادات تنکیر کذلک تقدیم  
اولنور . «برکوزل آت» «بروسعتلوخانه» «برسودیکک ذات»  
ترکیبلری کبی .

وبعضاً وصفک شاننه اعتنا واهتمام ایچون ادات تنکیر تأخیر  
قلنور «کوزل برآت» «واسع بر خانه» «سودیکک بر ذات»  
ترکیبلری کبی .



ادات مبالغه ایله ، یاخود ادات تفصیل اولان : «دها»  
لفظیله ایراد اولنان صفتلر دخی کذلک ادات تنکیر اوزرینه  
تقدیم اولنور. «پک کوزل بر آت کتور» «بوندن دها کوزل  
بر آت ویر» ترکیملری کبی .

وادات تفصیل اولان «اڭ» لفظیله ایراد اولنان صفتلر  
دائماً مهمل براغیلور . «آنلرک اڭ کوزلی بودر» ترکیبی کبی .  
«که» اداتیه ربط اولنان وصفلرده ادات تنکیر دائماً  
تقدیم اولنور . مثلاً : «برشی که» «برذات که» «برکیمسه که»  
دنیلور . اما ادات تعریف اولان «او» مه حالده تقدیم اولنور .  
نته کیم : «اوشاهد عادل» «او کوزل آت» «اوسودیکک ذات»  
«اوشی که» «اوذات که» دنیلور .

«او» یرینه بعضاً «اول» یاخود «شول» کتوریلور . «اول  
شاهد عادل» «شول کوزل آت» کبی .

و بعضاً ضمیر مبهم مسند الیه اولوب «که» اداتیه ربط  
اولنان بر جمله ایله توصیف و تعریف ایدیلور . «اولکه واقع  
الحالدر حضور عالییرینه اعلام اولندی» عباره سنده اولدینی  
کبی . بعضاً دخی موصوف حذف اولنهرق صفی اولان فرع  
فعل آنک مقامنه اقامه اولنور .

بودخی اکثریا تعمیم ایچون اولور . نته کیم : «دنیایه کلان  
کیدر» دینیلیرکه «هرکیم اولور ایسه اولسون» دیمک اولور .  
و بعضاً مسند الیه ذکر قبیح اولدینی ایچون بویله

حذف ایله صفت آنك مقامنه اقامه ایدیلیر . یاخود «شی» کی  
برلفظ اعم کتیریلیر . نته کیم : «سبیلندن چیقان نجسدر» یاخود  
«چیقان شی نجسدر» دینیلیر .

مسند الیهک بر منوال مشروح فرع فعل ، یاصیفه صله  
ویاخود جمله ایله توصیف و تعریفی اکثر یا مخاطبک عندنده بشقه وجهله  
معلوم اولمادیغندن ناشی اولور . نته کیم : «دون فلان یرده سلام  
ویرن کیمسه عالم وفاضل بر ذاتدر» دینیلیر که مخاطبک عندنده  
اول کیمسه نك بشقه حالی معلوم اولمادیغندن متکلم آنی  
اولوجهله تعریف ایلر .

وبعضاً حکمک سببینی مشعر اولور . «تحصیل علم و هنر  
ایدن مسعود اولور وایتمین خائب و خاسر قالیر» عبارته سنده  
اولدینی کی .

و بعضاً بر خطایی اقرار و بعضاً مخاطبک خطاسنی اخطار  
ایچون اولور .

بعضاً دخی دیگر نکته لر ملاحظه اولنور . مثلاً : «برفی  
بیلیمیان آدم اوفندن بحث ایده بیلیر می ؟» دنیلیدیکی صروده :  
«فقه بیلیمیان آدم فقهدن بر کتاب یاپدی یا» دنیلیر و حکم  
خبرک تزیینی قصد اولنور .

مسندالیه بعضاً تأکید اولنور . نته کیم : «ستری بی بر ماهر  
درزینک دیکدیکنی افاده سیاقنده : «بوستری بی فلان درزی  
دیکدی» دنیله جلك اولسه شایدکه مجازا آنك شاگردی دیکمش

اولمق معناسنه حمل اولنه دیو مؤکد اوله رق : «فلان درزی کیندو دیکدی» دینیلیر. کذلک : «فلان مکتبک طلبه سی کلدی» دیناسه اکثریا طلبه مراد اولمق محتمل اولدیغندن مؤکد اوله ق : «فلان مکتبک طلبه سی کافه کلدی» دینیلیر .

بعضاً دخی مسند الیه مقامنده بر لفظ کتیریلوب بعده آندن بدل اوله رق حقیقت حالده مسندالیه اولان اسم کتیریلیر. نته کیم : «برادریکز علی افندی کلدی» دینیلیر که مقصد اصلی علی افندینک کلدیکنی خبر ویرمکدن عبارت اولدینی حالده : «برادریکز» لفظی توطئه اوله رق ذکر اولندقدن صکره اسم خاصی ذکر اولنمشر .

کوکلر اوغریسی بر یار بی امام وار

مصرعی دخی بوقیلدندر. وبعضاً بالعکس اصل مسند الیه ذکر اولندقدن صکره آنی بیان وایضاح ایده جک بر اسم کتیریلیر. نته کیم : «سودیککز فلان افندی کلدی» دینیلیر که مقصد اصلی مخاطبک دوستی اولان برذاتک کلدیکنی اخبار اولوب آنجق ایضاح ایچون آلت طرفنده اسمی ایراد اولنور. وبعضاً مسند الیه «یعنی» ایله تفسیر اولنور. نته کیم : «دون واپور ایله کلان مامور یعنی : فلان افندی ذکی برذاتدر» دینیلیر .

مسائل سابقه کلامی هپ مقتضای ظاهر حاله کوره ایراد ایلمک ایچون مصرعی اولان قواعددر که اول صورتلرده مقتضای حال ایله مقتضای ظاهر حال مجتمع اولور . وبعضاً مقتضای



حال بشقه اولمغله ظاهرک مقتضاسی ترک اولنور. شویله که  
متکلمک عظمت شاننه مبنی، ضمیر مفرد متکلم یرنده جمع  
قوللانیلیر. نته کیم فرمانلرده «بن» یرنده «بز» دینیلیر.  
وبعضاً متکلم کندوسندن بر شخص تجرید ایله آکا یغنی:  
کندو کندویه خطاب ایلر. بوکا تجرید دینیلیر [فهم] افندینک:  
خواهشک واردر قباى جاه واقباله فهم!  
بن سنی تحقیر ایچون کیدم ملامت جبهه سن  
بیتمده اولدینی کی.

بو مقامده شعرای فارس وروم اکثریا کندو کوکلرینی  
شخص آخر فرض ایدرک آکا خطاب ایدرلر.

بیت طحیره :

ندن اولدک بو قدر یأسله نالان کوکل  
یوقی عالمده سنک دردیکه درمان کوکل

کی.

تواضع، هضم نفس و مخاطبه تعظیم ایچون متکلم کندوسندن  
بر اسم ایله تعبیر ایلر. نته کیم: «بنده کز» یاخود «داعیکز»  
ویاخود «بوفقی» ویا «بوعبد عاجز» دینیلیر. وبعضاً مخاطبی تحذیر  
ایچون ضمیر مفرد متکلم یرنده اسم قوللانیلیر. نته کیم:  
قوماندان بر عسکره: «قوماندان سکا بویله امر ایدر» دیوب  
«امره مخالفت ایدر سهک قانون عسکریجه جزا کوررسین» دیو  
آنی اخافه و تحذیر ایلمش اولور.

وبعضاً تعریض ایچون خطاب مقامنده ضمیر متکلم

قوللانیلیر. نته کیم: درسنه چالشمیان برچلبی یه ناز کانه نصیحت ایچون خیر. خواهلرندن بری «سن نیچون بویله تنبلک ایدیورسین» دیه جک یرده نیچون بویله تنبلک ایدیورم دیرو آنک تقصیرینی کندوسنه عزوایلر.

واکثریا مخاطبه تعظیم واحترام ایچون ضمیر جمع مخاطب قوللانیلور. «سن» یرنده «سز» دنیلور. ودها زیاده تعظیم قصد اولنور ایسه ضمیر مفرد مخاطب یرینه، براسم کوریلور. «ذات عالیکز» «افندیمز» دنیلدیکی کبی.

وبعضاً قابل خطاب اولان هرکیم اولور ایسه اولسون هر برینه فرداً شامل اولمق اوزره مفرد مخاطب ضمیری قوللانیلور.

کوردک زمانه اویمادی؛ سن اوی زمانه

مصرعنده اولدیغی کبی.

وبعضاً اشارت عقلیه اشارت حسیه منزله سنه تنزیل اولنه رق ضمیر غائب مقامنده اسم اشارت قوللانیلور. مثلاً: «علم معانی بیلن مقامه مناسب سوز بولور» و «علم بیانده ماهر اولان طرق مختلفه ایله ادای مرام ایده بیلور» «صنایع بدیعیه اوکرنلرک سوزی مزین اولور» «ایشته بونلر فن انشاده کسب کمال ایده بیلورلر» دنیلدکده: «بونلر» «اول اوصاف ایله موصوف اولنلر» دیمک اولور. بناءً علی ذلک، علمای عربیه «ضمیرلر یالکیز ذاته واسم اشارتلر ذات مع الوصفه دلالت ایدر» دیرلر. وبعضاً مشارالیه بعید اولدیغدن اسم اشارت یرنده: «او»

قوللانیلور وبر اوزاق شیئه اشارت ایله : «اوشی» دنیلور .  
 بعضاً دخی مشار الیه قریب اولدینی حالده متکلمک مجهولی  
 اولدینی جهته غائب منزله سنه تنزیل قیلنور . نته کیم : «مخاطبک  
 النده کی شیئه اشارت ایله : اوندی» دنیلور .

وبعضاً مسند الیهک ذکر ی سبق ایتدیکنه نظراً ضمیر  
 غائب ایله تعبیر اولونه حق ایکن ، سامعک ذهنده زیاده تمکین  
 وتثبیت ایچون اسمی تکرار اولنور . نته کیم : «الله تعالی عادلدر»  
 و«الله تعالی عزیز ومنتقمدر» دنیلور .

الحاصل ، اسلوب کلام اوچدر : تکلم ، خطاب وغیبتدر .  
 ومقام تکلمده ضمیر متکلم ، مقام خطابده ضمیر مخاطب ومقام  
 غیبتده ضمیر غائب یاخود اسم کتوریلور . مکرکه مقتضای ظاهرک  
 خلافتی موجب برنکته اوله . وبراسلوب اوزره ایراد کلام  
 اولنور ایکن دیگر اسلوبه انتقال اولنور ایسه «التفات» دنیلور .  
 بودخی کلامده تفنن ایله سامعک نشاطنی تازملک ودقت نظرنی  
 جلب ایله آنی ایقاظ ایلمک کبی نکت ولطائفه مبنی اولور .  
 نته کیم : «بن سمره چوق نصیحت ایتدم دکه مدیکر» دیدکدن  
 صکره تکلمدن غیبته انتقال ایله : «سمر بوفقیرک قدرینی صکره  
 آکلار سکره» دنیلور .

کذلک «نه موطلو بزله بر پادشاه حمید الخصالک  
 انواع نعم وفیره سیله هر آن متنع اوله یورز وعلوم ومعارفک هر  
 درلو اسباب تحصیلنی آماده بوله یورز» دنیلدکدن صکره غیبتدن  
 خطابه التفات ایله [پادشاهم چوق یشا] دنیلور .



## انظراد

مقتضای ظاہرک خلافتہ ایراد کلام ایلکم مسند الیہک  
احوالہ منحصراً اولیوب بعض نکات و لطائفہ مبنی دیگر  
موقعلرہ دخی واقع اولور .

بونلردن بری: کلامی منکامک مرادی اولیان معنایہ حمل  
ایتمکدر. نتہ کیم: مقام تحذیرده «باق بن سکا نلر ایدہ حکم» دین  
کیمسہ یه: «لطف واحسانکیز مبدولدر؛ سزدن چوق عنایتلر  
اومارزہ دنیلدکده «سزہ لایق اولان بودر؛ فنالقی ایتکم شانکیزہ  
یا قشمازہ دیمک اولور .

سائلک سؤالہ مطابق جواب ویرمیوبده حالہ موافق  
جواب ویرمک دخی بوقیلدندر. نتہ کیم: «صیتی پرهیز اوزرہ  
بولن ان خستہ بادنجانانی سادہ یاغ ایلہ می پیشورتلمی؟ یوخسہ  
زیت یاغیلہ می؟» دیو سؤال ایتدکده طیبیک: «بوکون سادہ  
صوبہ چوربا ایچکیزده یارین باقہلم ات صوی ایلہ پشمش چوربا  
ایچہ بیلور میسکیز؟» دیو جواب ویرمسی کبی. ینہ بو قیلدن  
اولہرق برشیئک سیننی سؤال ایدن کیمسہ یه فائدہ سنک بیانیلہ  
جواب ویریلور. نتہ کیم: بلوتلردن یاغورلرک نہ وجهلہ حاصل  
اولدیغنی سؤال ایدن چقتیجی یه: «یاغور فائدہ لی شیدر؛ انکله  
اکیئر بیور، چمنلر تازہ لنور» دیو جواب ویریلوب، «سنک  
حکمتدن دم اورمق نہ گہ لازم؛ سن یاغوردن استفادہ ایتہنک

یولنی دوشون « دیمک اولور . قاب ، یعنی : کلامک اجزاسندن  
برینی دیکرک مقامنه قویق دخی مقتضای ظاهرک خلافتنه ایراد  
کلام ایلیمک قیلندندر . نته کیم : « صوی آته کوستردم »  
دینله جک یرده « آتی صویه کوستردم » دینلمک و پارمغمی  
یوزوکه کچوردم « دنیله جک یرده » یوزوکی پارمغمه کچوردم  
دیمک کی .



## ﴿ فصل ثانی ﴾

احوال مسند بیاننده در

مسند الیه کبی مسند دخی قرینه ظاهره یه مبنی حذف  
اولنور . نته کیم : « بو مکتوبی کیم یازدی ؟ » دین کیمسه یه  
جوابا : « علی افندی » دنیلور . ویازدی لفظی حذف اولنور .  
وبعضاً قرینه پک ظاهر اولدینی حاله بر نکته یه بناء مسند  
ذکری التزام اولنور . نته کیم : بر کیمسه غایت کوزل یازو  
یازان بر کچوک چوجقک یازوسنی کور ویده « بونی کیم یازدی »  
دیو سؤال ایتدکه « بر چوجق » دیمک کافی ایکن سننه نظراً  
اول یازو آنک اولدیفه اینانیمیه حق مرتبه کوزل اولدیفندن  
تعجیب ایچون « ایشه بو چوجق یازدی » دنیلور .

کذا : « عالمی کیم یاراتدی ؟ » دین کیمسه یه جواباً :  
[ الله تعالی ] دیمک کافی ایکن سائلک غباوته تلمیح ایچون :  
[ الله تعالی یاراتدی ] دنیلور .

وکذلك « سوتی کیم دوکدی ؟ » دین کیمسه یه : « بن »  
دینلمک جواب کافی اولور ایکن ؛ « نه یاه بیلور سین ؟ » مقاضده  
تهدید ایچون : « بن ، دوکدم » دنیلور .



كذلك بر کیمسه طلبه دن برینه : « درسكه چالك رسین

دیمكه او دخی « کیم ؟ » دیچك : « سن » کافی ایکن تو یخ  
ایچون : « سن چالشمیورسین » دنیلدیکی کی .

مسند ، اکثریا ادات تمریفدن عاری اولور . « علی افندی

کاتیدر » « حسن افندی شاعر در » جمله لرنده اولدانی کی .

وبعضاً فائده اتم اولق ایچون اضافتله یاخود وصف ایله

تخصیص اولنور .

چونكه كلامده خصوصیت نقدر زیاده اولور ایسه فائده

او قدر تمام اولور .

نته کیم : « فلان افندی محکمه کاتیدر » یاخود « کاتب

ماهر در » ویا « کتابتده مهارتی مسلم بر ذاتر » یا « يك

سودیکم بر آدمدر . » ویاخود : « اول ذاتر که دون سیر

یرنده بزه سلام ویرمشیدی . » دنیلور .

وبعضاً ادات تنکیر ایله ایراد اولنور . بو دخی وحدت

ایچون اولور . نته کیم : « بو قلمتراشی یایان بر آدمدر » دنیلور که

ایکی دکدر دیمك اولور .

یاخود تفخیم ایچون اولور .

فقر وضرورت بر بلاد

دنیلور که « بیوک بلا » دیمك اولور .

ویا خود تصغیر ایچون اولور. نته کیم: « بنی احیا ایده جک سنک برسوزکدر » دنیلور که « کچوک سوزک » دیمک اولور. و بعضاً مسند الیه کبی مسند دخی معرفه اولور. شویله که: بر جهته معلوم اولان برشیئک اوزرینه دیگر برجهته معلوم اولان برشی ایله حکم اولنور.

مثلاً: مخاطب برافدینک اسمنی و بر ذاتک کیتدیکنی بیلوب آنجق او افدینک، اوکیدن ذات اولدیغنی بیلمز ایسه « فلان افندی اوکیدن زاندر » دنیلور. و بالعکس بر ذاتک کیتدیکنی اوکرنوبده کیم اولدیغنی بیلمز ایسه « او کیدن ذات فلان افدیدر » دنیلور.

و بعضاً ادات تعریف و تنکیدن عاری اولان براسم مسند الیه اولوب آکا بر معرفه مسند قیلنور. نته کیم: [نفی] نک: باطل همیشه باطل و بیهوده در ولی مشکل بودر که صورت حقدن ظهور ایدره. بیننده اولدیغنی کبی.

مسند الیه کبی مسند دخی بعضاً « کندو » لفظیله تأکید اولنور. نته کیم: « بوکا سبب اودر » دنیله جک یرده: « سبب کندودر » دنیلور.

و بعضاً « عین » کله سنک اضافتیله تأکید اولنور. نته کیم: « او بونک عینیدر » یا خود « اراده کز عین کرامتدر » دنیلور.

بیت مؤلفه :

تنزل عین رفعتدر؛ انکچون صنع یزدانی  
مقام کاکلی بالای چشم عزت ایتشددر

بوقیلدندر .

مسندالیهده جاری اولان بدل، بیان وتفسیر اصولی مسندده  
دخی جاری اولور . نته کیم : « او کلان ذات برادر یکز علی  
افندیدر » یاخود « دوستکز علی افندیدر » ویاخود : « برکوزل  
آدم یعنی علی افندیدر » دنیلور .

مسندک مجرد مسندالیهه اثبات واسنادی مراد ایسه امثله  
سابقهده کورلدیکی اوزره مسند اسم اوله رق ایراد اولنور و بوندن  
اعانه قرائن ایله اکثر یا دوام واستمرار معناسی دخی مستفاد  
اولور . نته کیم : « فلان اوزونددر » یا « قیصه در » یاخود « عالمدر »  
و یا « کاتبدر » و « تکبر وعظمت الله تعالی حضر تلرینه مخصوصدر »  
دینور .

واکر مسند الیهه ثبوتندن بشقه زمان حدوثی و صیغ  
افعالک متضمن اولدینی سائر خصوصیتلری جملاً و مختصراً افاده  
قصد اولنور ایسه « فعل » اوله رق ایراد اولنور . نته کیم :  
« درسمی او قودم » « مکتوب یازیورم » « قلمه کیده حکم » « بن  
لایحه اعتراضیه می یازیوردم » « اوباقه قالدی » دنیلور .

وبعضاً فعل مضارعدن « استمرار تجدیدی » معناسی قصد  
اولنور . نته کیم : « فلان افندی کوزل یازار » دنیلور که « هر



وقت کوزل یازار « دیمک اولور ؛ فقط یازمق دائماً تجدد ایدر برعملدر .

صیغ افعالک خواصنه یک زیاده دقت اولمق لازمدر .  
مثلا : لسان عربیده فعل ماضی صیغه بی ماضی شهودی ایله  
ماضی نقلی بیننده مشترکدر . لسانمزده ایسه سماعا معلوم اولان  
برفعلاک بیانی ایچون ماضی شهودی صیغه بی کتورلمک غلط  
ولسان عربینک بو یولده ترجمه سی خطا در . شوقدر وار که  
مورخلر بیان ایتدکلری وقایع تاریخیه بی کورمش وایچنده  
بولنمشجه سنه صحتی ادعا ایدرک اکثریا ماضی نقلی مقامنده  
ماضی شهودی قولالانورلر .

و فعل اگر نکره یه مسند اولور ایسه جنسه یاخود واحده  
تخصیصی افاده ایدر . نته کیم : « برسواری کلدی » دنیلدکده « کلان  
سواریدر ، پیاده دکلدر » یاخود « کلان بردر ، ایکی دکلدر »  
دیمک اولور . مقامنه کوره بوایکی معنادن بری قصد اوانور  
ودیکری مسکوت عنه کی قالور .

مفرد و جمع اولمقده مسندک مسندالیه مطابقی لازمدر . فقط  
جمع غائب صورتنده بو مطابق شرط دکلدر . نته کیم : آنلر  
کلایلر دنیلدیکی کی مفرد صیغه سیله « آنلر کلدی » دیمک  
دخی جائز اولور .

وبرده مسندالیه مفرد اولدینی حالده مسند بعضاً تعظیم ایچون  
جمعلنور . نته کیم : « افندیمز تشریف بیوردیلر » دنیلور .

تکلم و خطاب و غیبتده دخی مسندك مسند الیه مطابقتی شهر طدر .  
مکرکه بری دیگرینك اوزرینه تغلیب اولنه . تغلیب بینلرنده  
تناسب و اختلاط بولنان ایکی شیئك برینی آخرك اوزرینه تغلیب  
و ترجیح ایله تعبیرده آکا تابع قیلمقدر .

لسان عربیده بوتغلیب چوق واقع اولور . نته کیم : والد  
ووالدهیه « والدین » ، و « ابون » وشمس ایله قره « قرین » ،  
وابوبکر ایله عمره « عمرین » و حسن ایله حسین « حسنین »  
و سعدالدین تفتازانی ایله سید جریانییه « سعدین » دنیلور .

لسانمزده دخی بعضاً بوتغلیب اصولی حاوی اولور . نته کیم :  
« بنده کنز یازارم » دنیلور که بنده غائب صورتی اولدینی حالده  
معنی متکلمدن عبارت اولدیغندن جانب معنی جانب لفظه ترجیح ،  
یعنی : تکلم صورتی غائب صورتی اوزرینه تغلیب اولنور .

کذلک خطاب صورتی غائب صورتی اوزرینه تغلیب ایله :  
« افندیمز احسان ایدرسکنز » دنیلور .

ینه تغلیب قییلندن اوله رق بر طائفه نك وکیللرینه « سز شویله  
یایدیکز » دنیلور و خطابدن اوطائفه نك مجموعی قصد ایدیلور .

### فأمره

ظرفلر مسند مقامنده بولندیغنی حالده مسند الیه اگر  
معرفه ایسه « موجود » یا « واقع » ویا « کائن » کبی بر فعل  
تقدیر اولنور و بوکا « ظرف مستقر » دنیلور . مثلاً : « حسن  
افندی قوناقدده » ، یاخود « دکدر » دنیلدکده « قوناقدده

موجوددر « ، یاخود » موجود دکلدر « دیمک اولور .  
 ومسندالیه اکر نکره اولور ایسه ظرف آنک اوزرینه  
 تقدیم اولنهرق « وار » ، یاخود « یوق » لفظلری مسند اولور .  
 نته کیم : « قوناقدہ بر آدم واردر » ، یاخود « یوقدر » دنیلور .  
 ادات تعریف وتنکیدن عاری اولان اسم عاملر حقندہ  
 دخی اکثریا نکره کبی معامله اولنور .

### شعر طوْلَف

ظن ایتمه همان چهره زردمده اثر وار  
 هجران المندن دل زارمده نلر وار  
 تقریر ایدهم سوز دل و درد درونم  
 سویلتمه بنی خاطر زارمده کدر وار

وبعضاً اسم عام ظرف اوزرینه تقدیم اولنور واول  
 حالده قصری مفید اولور . نته کیم :

اهل ماتم کربده کتاب قمت خنده ده  
 جانستانک ویردیکی معجون دو خاصیتلیدر

بیتندہ « اهل » لفظنک تقدیمی کبی .

## فصل ثالث

متممات جمله بیاننده در

متممات جمله که حال ، تمیز ومتعلقات فعلدر ، کلامک بونلر  
 ایله تقيیدی تزئید واتمام فائده ایچوندر .



چونکه بر کلامده نه قدر چوق قید بولنور ایسه فائده  
 او قدر اتم اولور؛ فقط بوباید مخاطبک حاله نظر اولنور.  
 مخاطبک مقصدی اکر مجرد مسند الیه ثبوتی و یا عدم ثبوتی  
 او کرمک ایسه متممندان برشی علاوه اولماز. اکر مقصدی  
 بر فضله قید ایسه اول قیدک علاوه سی لازم کاور. وفصل اولده  
 بیان اولدینی اوزره، کلامده مناط حکم اول قیددر. ومنفی  
 ایسه نفی دخی اول قیده توجه ایدر. مثلاً: بوغاز ایچی  
 واپورلرندن برینه بنک اوزره ساحله طوغری سکردن  
 کیمسه نك غرضی آنجق واپورک قالقوب قالقمه یغنی  
 او کرمکدر آکا: «واپور قالقدی»، یا خود «قالقمدی»  
 دنیلور. بشقه سوز علاوه اولنور ایسه مقتضای حاله  
 مطابق اولماز. اما برواپورک یوم حرکتی او کرمک ایستین  
 کیمسیه «واپور فلان کون قالقه جق»، یا خود «قالقمیه جق»  
 دینور.

قیدلر متعدد اولدینی حالده مناط حکم صکره کی قیددر.  
 نته کیم: «فلان افندی بوکون عربه ایله بک اوغلنه کیتدی»  
 دنیلده مناط حکم اول کیمسه نك سمت عزیمتیدر و «کیتمدی»  
 دنیلسه نفی دخی آکا توجه ایدوب اول کیمسه اول کون  
 عربه ایله بشقه سمت کیتمش اولسه، بوقضیه سالبه کاذب اولماز.  
 حال یا فاعلک هیئتتی مبین اولور. «فلان افندی یا غموردن  
 ایصلانمش اولدینی حالده کلدی» کلامنده اولدینی کی. ویا

مفعولك هيئتني مبین اولور. «بن آنی یازی یازارایکن کوردم»  
کلامنده اولدینی کی .

وبعضاً دخی فعلك حالت صدور و تملقنی مبین اولور.  
نته کیم: «بن اسکلهیه واردم: حالبوکه واپور هنوز قالقاماشدی»  
یاخود «واپورایسه هنوز قالقاماشدی» و «ساعت بشده ایکن  
واپور قالقامدی» و «ساعت بشه کلاماش اولدینی حالده  
واپوری قالدردیلر» دنیلور .

و حالك وقوعی چندان مأمول دكل ایسه، «حالده» یرینه  
«نقدیرده» کتوریلور .

نته کیم: «فلان افندی بورجنی ویرمدیکی تقدیرده بن  
ویریرم» دنیلور، که «بورجنی ویرمه مسی مأمول دكل ایسه ده  
شاید که ویرمزایسه بن ویریرم» دیمك اولور .

فاعلك هيئتني مبین اولان حال اکثریاحال ترکیبی صیغه سیله  
ایراد اولنور، که حالك زماناً فعله مقارنتی افاده ایلر . نته کیم:  
«فلان افندی یاغموردن ایصلانه رق کلدی» و «کوله رك کیتدی»  
دنیلور .

وبعضاً براسم عربینك آخرینه تنوین علاوه اولنه رق  
حال ترکیبی مقامنده قوللانیلور . نته کیم: «آله جغنی نقداً  
آلدی»، «منوناً کیتدی» دنیلور، که «نقد اوله رق» «منون  
اوله رق» دیمك اولور .

و حال بعضاً مکرر اولور. «بوکتابی جزء جزء باصدیره جغز»  
ترکیبنده اولدینی کی .

وفعل التزامینک « صابه یول » ترکیبده اولان « صابه » لفظی کبی صفت اوله رق استعمالی نادر ایسه ده مفرد غایی چوق دفعه مکرر اوله رق حال اولور . وعملک تکررینی افاده ایلر . نته کیم : « کوله کوله کیتدی » ، « چالیشه چالیشه مراغنی حاصل ایتدی » دنیلور .

صفت کبی حال دخی بعضاً « سببی » اولور . نته کیم : « فلان افندی آیاقلری بربرینه طولاشه رق کلدی » دنیلور .

ذی الحاله نسبتله حال موصوفه نسبتله صفت کبدر . شوقدر وارکه ذی الحالاک فعله مباشرتی حالنده ، حال ایله اتصافی قصد اولنور . بوجهته فعلک کیفیت وقوعنی بیان ایدرک فعلک قیدی دیمک اولور . صفتدن مقصود ایسه موصوفک فعله مباشرت ویاعدم مباشرتندن قطع نظرله وصفک آ کاتبوتیدر .

حال ایله صفت ایکسی ده مسنده بکزرلر . شوقدر وارکه بونلرک نسبتلری مقصود بالتبع اولمغله « نسبت تقیدیه » در . مسندک مسندالیه نسبتی ایسه مقصود بالذاتدر . بوجهته « اسناد » دنیلور .

تمیز بعضاً اسنادک قیدی اولور . نته کیم : « بن آ کامعلوماتجه فاقم » دنیلور . بعضاً برنسبت تقیدیه نک قیدی اولور . نته کیم : « بنم آ کامعلوماتجه تفوقم مسلمدر » دنیلور .

وبعضاً جمله لر « صیغه صله » ایله تمیز مقامنده ایراد اولنور . تفصیلی قواعد عثمانیه ده در .



متعلقات فعلک تفصیلاتی دخی قواعد عثمانیه ده مندرجدره  
تکرار تفصیله حاجت یوقدر ؛ فقط علم بلاغته عائد اولان  
مسائلک ایرادینه بوجه آتی ابتدار اولنور .

شویله که : بعضیلرینک قرینۀ ظاهره یه مبنی ذکر ی عبث  
کبی کور یله رک حذف اولنور .

نته کیم : « سن بغداده کیتد کی ؟ » دین کیمسه یه جواباً :  
« کیتدم » دینلور ، که « بغداده کیتدم » تقدیرنده در .

کذلک « اوطه یه نه چوق کیروب چیقیور سین ؟ » دینلور که  
« اوطه یه نه چوق کیروب اوطه دن نه چوق چیقیور سین ؟ »  
تقدیرنده در . حذف بعضاً بعدالابهام بیان ایچون اولور . نته کیم :  
« بن امر ایتدم ؛ او یازدی » دینلور که « یازمنی امر ایتدم »  
تقدیرنده در و « امر ایتدم » فعلنک مفعولی حذف ایله مبهم  
براغیلوب بعده « یازدی » فعلیله بیان اولنمشدر .

و بعضاً تعمیم ایچون اولور . « الله تعالی حضرتلری  
دارالسلامه دعوت ایدیور » جمله سی کبی ، که « هر کسی دعوت  
ایدیور » دیمک اولور .

و بعضاً لدی الحاجه انکاره مجال اولوق کبی دیگر نکته لره  
مبنی اولور .

و بعضاً مجرد اختصار ایچون . « کتور کوریم » دینلیدی کبی .  
بعضاً دخی فعل متعدی فعل لازم منزله سنه تزیل قیلنور  
شویله که : فعلک مفعول بهه تعلقندن قطع نظر اولسورق مجرد

فاعله اسنادی قصد اولنور واول حالده مفعول به تقدیر اولنماز.  
نته کیم: « بیلن ایله بیلمین بر دکدر » دنی-لور . و بیلمنک  
بر مفعوله تعلقی ملاحظه اولمیوب مجرد فاعله اسنادی قصد  
اولنور .

مسند الیه معرفه ایسه متعلقات فعل اوزرینه تقدیم اولنور.  
نته کیم: « فلان افندی دون بورایه کلدی » « فلان افندی بوکتابی  
بکا ویردی » دنیلور .

ققط بعضاً قصر ایچون مسند الیه تأخیر قیلنور . نته کیم :  
« دون بورایه فلان افندی کلدی » دنیلور ، که « بشقه سی  
کلدی » دیمک اولور . و « بوکتابی بکا فلان افندی ویردی »  
دنیلور ، که « آنجق او ویردی » دیمک اولور .

بعضاً دخی مسند الیهده متعلقات فعلدن بر بنه عائد ضمیر  
اولدیغندن ناشی تأخیر قیلنور . نته کیم : « فلان افندی پی یدری  
تکدیر ایلدی » دنیلور .

اما مسند الیه معرفه اولدیغنی حالده هپ متعلقات فعلدن  
صکره کتوریلور . نته کیم : « دون بورایه بر افندی کلدی » « بو  
کتابی بکا بر افندی ویردی » دنیلور .

مفعول به دخی معرفه اولدیغنی حالده مفعول الیه اوزرینه  
تقدیم اولنور . مثلاً: « بن اوکتابی سکا ویردم سن ده بوکتابی بکا  
ویر » دنیلور .

و بعضاً قصر ایچون تأخیر قیلنور . نته کیم : « سکا بونی ویردم »

دنیلور، که «سکا ویردیکم آنجق بودر» دیمک اولور «بن سکا بو سوزی سویلدم» دنیلور که «بشقه سوز سویلدم» دیمک اولور. و بعضاً مفعول بهده مفعول الیهه راجع ضمیر بولندیغندن تأخیر قلنور. نته کیم: «فلان ذاته ایشلیدیکی جرمی عز و ایتیشله» دنیلور.

بعضاً دخی وزن و قافیه ایچون تأخیر اولنور:

بیت طحیره :

ای شانه قیل وقال ایله تل قیرمدن واروب  
شرح ایله یاره حال پریشانی موبو

کبی.

اما مفعول به معرفه اولمیدیغی حالده تأخیر قلنور و علامت مفعولیت اولان کسره دن عاری اوله رق فعله وصل اولنور و فعل آنکله ترکب ایدک افعال مرکبه دن اولور نته کیم «بن سکا باردن ایدرم»، «سندن یاردن ایدرم» دنیلور.

بومنوال اوزره مرکب اولان فعلک ترکیبی فسخ اولنه رق ایکی جزئی آره سنه متعلق اتندن بری کیررایسه قصری مفید اولور. نته کیم: «یاردمی سکا ایدرم» «یاردمی سندن ایدرم» دنیلدکه آنجق منعاسی مستفاد اولور.

برده اسم عامدن قرینه حالیه ایله بر فرد معین مراد اولنور ایسه فعل ایله ترکیب اولنه ماز. مثلاً: متکلم علی الاطلاق کتاب ایستر ایسه «بکا کتاب ویر» دیر. اما مخاطب ایله بینلرنده معلوم



اولان کتابی ایسترسه « کتابی ویر » دیمسی لازمکلور.  
 بعضاً فاعلك هیئتتی مبین اولان حال دخی وجه مشروح  
 اوزره فعل ایله ترکیب ایلر. نته کیم : « یایان کلدی. » ، « راجلاً  
 کلدی » ، « یالکز کلدی » ، « آنسزین کلدی » ، « بغته کلدی. » دنیلور.

بیت محرره :

ضبط اولنماز عنان آه سحر  
 چاره سز کشف راز ایدر کوکلم

دخی بوقییلندرد .

بو مثلوافعال مرکبه نك موقع استعمالی پك مختلفدر .  
 شویله که : جزء اولی بروجه بالا بعضاً مفعول به حال اولدینی  
 کبی بعضاً دخی اسم مصدر اوله رق اصل فعلی مؤکد اولور .  
 نته کیم : « براوروش اوردی که تعریف اولنماز » دنیلور .  
 بعضاً اصل فاعلك وصف ونوعنی مبین اولور . نته کیم :  
 « کوزل یازدی » « سرعتلی یورییور » دنیلور .

وبعضاً تأکید ایچون فعل مرکبك جزء اولی تکرار قلمور .  
 نته کیم : « احسان ایت افندم احسان » دنیلور .

مسند الیه ایله مسندده جاری اولان بدل ، بیان وتفسیر  
 اصولی متعلقات فعلده دخی جاری اولور . نته کیم : « برادریکز  
 فلان افندی بی استانبولده شهزاده یاشنده کوردیم » ، « دوستکز  
 فلان افندی یه فلان محله تصادف ایتدم » ، « دون سیریرنده ،  
 یعنی : کاغذخانه ده فلان افندی یه راست کلدیم » دنیلور .

متعلقات فعل دائماً فعل اوزرینه تقدیم اولنور؛ فقط  
مقدمه ده بیان اولندیغی اوزره اشعارده تأخیرلری چاژ اولور.  
نته کیم :

جلوه نقش خیال یاره ثقلندر دیو  
خواب کلز دیده بیدارمه اندیشه دن

ییتنده مفعول الیه اولان دیده بیدارمه تأخیر اولندیغی کبی.  
وبرده نادر آفعلک شاننه اعتنا و اهتمام ایچون تقدیم اولنور.  
نته کیم: تعجب مقامنده «شاشارم بوایشه» دنیلور.

نتمه

افعال شرطیه برر جمله خبریه ایسه ده اسنادلری مقصود  
بالذات اولدیغندن کلام اولیوب جمله جزائیه نک قیدی کیدر. بلکه  
شرط ایله جزا ایکیمی بر قضیه در. مثلاً: «کونش طوغارایسه  
کوندوز اولور.» دندلکده «کوندوزک وجودی کونشک  
طلوعنه لازمدر» دیمک اولور.

«الله نصیب ایدرسه بر بلاغت رساله سی یازه جغم» جمله سی  
دخی بوقیلدندر.

شرط «حالی، ایسه، حال مقامنده بولندیغی جهتله مابعدنده کی  
جمله نک قیددر. نته کیم: «فلان مأمورک اگرچه بعض  
تقصیراتی وارایسه ده ایشنه مقدم اولدیغی جهتله شایان عفو در»  
دنیلور که «جزئی قصوری اولدیغی حالد بیله شایان عفو در»  
دیمک اولور.

قضیہ شرطیہ بر منوال سابق « مطلق » اولور ایسہ ،  
« قضیہ مهملہ » و « ہرنہ زمان » و « دائماً » کی بر قید ایلہ مقید  
اولور ایسہ « قضیہ کلیہ » و « بعضاً » یا « اکثریاً » کی بر قید ایلہ  
مقید اولور ایسہ « قضیہ جزئیہ » اولور .

« صیغہ توقیتیہ » دخی کلیہ مقامندہ قوللانیلور .

« طویولاز لطف واحسانہ ، فناعت کلز انسانہ

کرم کوردکجہ ای باقی ! کدالردن رجا آرتار »

بیتندہ اولدینی ، کہ « ہرنہ زمان کرم کورسہ » دیمک اولور .

ومدخل قواعدده بیان اولندینی از رہ « جہ » یرینہ « دہ »  
کتوریلور ایسہ علی الاطلاق وقتہ دلالت ایدر . وبوحالده « قضیہ  
مهملہ » اولور . نتہ کیم : « موسم بہار کلدکدہ سیرہ کیدرز »  
دنیلدیکی کی .

بومقامدہ بعضاً « صیغہ صلہ » قوللانیلور . « آنلر بورایہ

کلدکلرندہ بزہ مسافر اولورلر » دنیلدیکی کی .

الحاصل ، « صیغہ توقیتیہ » ایلہ « صیغہ صلہ » ، « صیغہ

شرطیہ » یرینی طوتار . شوقدر وارکہ صیغہ شرطیہ وقوعی  
مشکوک اولان شرطلرده و آنلر ایسہ وقوعی مجزوم اولان  
شرطلرده قوللانیلور .

نتہ کیم : « تموزدہ یاغور یاغار ایسہ سکا شوقدر قیہ

سبزہ ویریرم » ، « روز حضر کلدکدہ سکا شوقدر غروش

ویریرم » و « حاجیلر عودت ایتدکلرندہ سکا برتسبیح آلیویریرم »

دنیلدیکی کی .



بعضاً «تجاهل» کبی بر نیکتمیه مبنی ، مجزوم الوقوع اولان شرطده «صیغه شرطیه» قوللانیلور.

نته کیم: بر قوناغه بر مسافر کلوبده: «افندی ایچروده میدره؟» دیو خدمتکاردن سؤال ایتدکده: «افدینک قوناقدہ اولدینی خدمتکارک معلومی ایکن افندیسندن خوف ایله: «قوناقدہ در» دیموبده «باقیم ، اکر ایچروده ایسه ، سکا خبر ویریرم» دیدیکی کبی.

کذلک ، موسم بهار حلول ایتمشیکن هوالر آچلمدیغندن جانی صیقیلان کیمسه «ا کر بهار کلور ایسه شویله یاپارزه دیر . کذلک ، مخاطبک جزمی اولمدیغنه مبنی متکلم کندوسنجه مجزوم اولان شرطک افاده سنده: «صیغه شرطیه» قوللانیلور . مثلاً: «کندوسنک صدقنه اینانیمان کیمسه یه: «ا کر صادق چیقار ایسم نه یاپارسین؟» دیر .

بعضاً شرطک وقوعنی جزم ایدن مخاطب علمیه عامل اولمدیغندن ، متکلم آنی جاهل منزله سنه تنزیل ایله «صیغه شرطیه» استعمال ایلر . نته کیم: باباسنه اذا ایدن کیمسه یه «ا کر باباک ایسه اذا اتمه» دنیلور .

بعضاً «جمله شرطیه» حذف اولنهرق یالکیز جزای ذکر اولنور . نته کیم: «درسه چالیش ! فیض آلورسین» دنیلور ، که «چالیشور ایسه ک فیض آلورسین» تقدیرنده در . کذلک و «قتکی بیهوده ضایع اتمه! نادم اولورسین» دنیلور، که

« ضایع ایدرسهك نادم اولور سین » تقدیرنده در . و كذلك  
« قوناغکز زرده در ؟ زیارتکزه کلورم » دنیلور ، که « زرده  
اولدیغنی بیلدیرر ایسه کز ، زیارتکزه کلورم » دیمک اولور .  
بعض « جل شرطیه » معنای تعقیبی متضمن اولور . [نفی] نك :

« اسنجه باد قهری بحر وبریکسان اولور ؛ زیرا

اورر بر بیرینه امواج دریا کبی کهساری »

یبتنده اولدیغنی کبی .

افعال شرطیه نك انواعی قواعد عثمانیه ده مفصلاً مذکور  
اولوب هربری موقع مناسبه کوره استعمال اولنق لازم کلور .  
بوراده تکراره حاجت یوقدر .

### تذییب

بالاده مواقع متعدده ده بیان اولندیغنی اوزره ، مسند الیهك  
و حق تقدیمی اولان بعض متعلقات فعلك تأخیری قصره دلالت  
ایدر . بودخی فحوای کلامك دلالتیدر . دلالت وضعیه دکلدردر .  
بعضاً قصره موضوع اولان ادات حصر قوللانیلور ، که  
حکمی مدخولنی انبات ایله ماعداسندن نفی ایدر . نته کیم :  
بن آنجق اسکداره کیتدم دینلور که اسکداره کیتدیکنی و بشقه  
سمته کیتمدیکنی افاده ایلر .

بعضاً بو انبات ونفی تصریح اولنور . نته کیم : « اسکداره  
کیتدی بشقه یره کیتمدی » دینلور .  
بعضاً بو مقامده ادات اضراب اولان « بلکه » قوللانیلور .

نته کیم: « بزبو کون بک او غلنه کیتمدک؛ بلکه اسکداره کیتدک » دینلور.  
 بعضاً بومعنی استثنای طریقیله ادا اولنور. نته کیم: « فلان  
 افندی بو کون اسکداردن بشقه ( یاخود ) اسکداردن ماعدا  
 محله کیتمدی » دینلور.

کذلک اوزاقدن بر شخص کورندکده « بودکل ، الافلان  
 افندیدر » دینلور.  
 کذلک « فلان افندی هیچ درسنی ترک ایتمز؛ مکر منحرف  
 المزاج اوله » دینور.

بیت لمجره :

شمس رخ یاره نه ممکن نظر  
 عینک رنگین اوله کوزده مکر

بیتی بوقیلدندر.

« مکر » ایله استثنای صورتندم بعضاً مستثنای منه مقرر اولور.  
 ینه مؤلف حقیرک :

مکر سرمایۀ شادی ایمش کوی دلاراده  
 سرشکم نقدی خاک ایله مغشوش ایتدیکم دملر

بیتده اولدینی کبی ، که « اودملر هیچ دکل ، الاسرمایۀ شادی  
 ایمش » دیمکدر.

قصر بر موصوفی بر صفته ، یاخود بر صفتی بر موصوفه  
 حصر و تخصیص ایلمکدر.

نته کیم: « فلان افندی کاتبدر؛ شاعر دکدر » دینلور.  
 مسندالیله کاتبک صفته حصر ایدلمش اولور.



و « بو حقہ کومشدر . فاقفون دکلدرد » دینلد کده حقہ  
گومش اولمق وصفنه حصر ایدلمش اولور .

« بوبلدهده شاعر آنجق فلان افندیدر » دینلد کده شاعریت  
صفتی اول افندی یه حصر ایدلمش اولور .

قصر یا حقیقیدر ، یا ضافیدر . قصر حقیقی حقیقت حالده  
ونفس الامرده مقصورک مقصور علیہدن ماعدایه تجاوز ایتمه مسیدر .  
نته کیم : بربلدهده یالکز بر شاعر بولندیغی حالده : « بوبلدهده  
شاعر آنجق فلاندر » دینلدیکی کبی .

بعضاً بشقه شاعر لر بولندیغی حالده مبالغه آنلر شعرا دن  
عد و اعتبار ایدلمه رک « شاعر آنجق فلاندر » دینلور . ایسته  
بوکا : « قصر حقیقی ادعائی » دینلور .

قصر اضافی اوچ قسمه تقسیم اولنور . شویله که : مخاطب  
اگر بر شیک ایکی شیده اشتراکنی معتقد اولوبده برینه حصر  
اولنور ایسه : « قصر افراد » دینلور . نته کیم : مخاطب بر  
ذاتک : هم کاتب ، هم ده شاعر اولدیغنی معتقد اولدیغنی حالده آکا :  
« اوزات آنجق شاعر در » دینلدیکی کبی .

مخاطب اگر حکمک عکسنی معتقد ایسه ، « قصر قلب »  
دینلور . نته کیم : بر حقہ نک کومش اولدیغنی اعتقادیدن کیمسه یه :  
« بو حقہ فاقفوندر کومش دکلدرد » دینلدیکی کبی .

مخاطب اگر متردد ایسه « قصر تعین » دینلور . نته کیم :  
بر حقہ نک کومش ویا فاقفون اولدیغنده شک و ترددی اولان  
کیمسه یه : « بو حقہ فاقفوندر ؛ کومش دکلدرد » دینلدیکی کبی .

## فصل رابع

اسناد خبری بیانده در

اکثرا اسناده دلالت ایدن آنحق هیئت ترکیبیه در؛ فقط  
 اسناد خبرینک غائب صورتنده اسناده دلالت ایتک اوزره  
 ادات خبر قوللانیلور . و فعل ماضی نقلی و مستقبل ایله فعل  
 وجوبینک غائب صورتلرنده تأکید ایچون ادات خبر مملو و اولنور .  
 نته کیم : « فلان آدم کلش » دینلور ایسه : « مجرد  
 کلدیکنی ایشتم » دیمک اولور . « کلشدر » دینلور ایسه :  
 « البته کلش اولمق کرکدر » دیمک اولور . کذلک « کله جکدر »  
 دینلدرکده : « بهر حال کلور » دیمک و « کلیدر » دینلدرکده :  
 « البته کلسی لازمدر » دیمک اولور .  
 « وار » ، « یوق » ، لفظلری دخی اکثریادات خبر سزمسند اولور لر .

لمحمره :

زبان بیتاب و دل پرتاب و چشم حسرتم بخواب

مجال اشتکا یوق ناله شبکیر وار دله

بیتنده اولدینی کی .

واسنادک تأکید مراد اولدینی حالد : « واردر » ،  
 « یوقدر » دینلور . نته کیم : « بنم او ایشدن خبرم یوقدر » دینلدیکی کی .  
 اسناد خبری بر مفهومک دیگر مفهومه ثبوتی ، یا خود عدم  
 ثبوتی ایله حکم ایتمکدر . بوندن مقصد دخی مخاطب معلومی اولیان بر  
 حکمی ، یعنی : برشیئک وقوع و یا عدم وقوعنی خبر ویرمک ، یا خود آنی

بیلدیکنی بیلدیرمکدر . اولکیسنه : « فائده خبر » ، ایکنجیسنه :  
« لازم فائده خبر » دینور .

مثلاً : خواجه نك مکتبده اولوب اولمديغنی بیلدین شا کرده :  
« خواجه مکتبده در » ، یاخود « دکلدر » دیو خبرویرن متکلمك  
مقصدی فائده خبردر . اما مخاطبه : « سن زنکینسین » دین  
متکلمك مقصدی لازم فائده خبردر ، که « سنك زنکین  
اولدیغنی بیلورم » دیمك اولور .

خبر بعضاً بویله ساده ، یعنی : تأکیددن خالی اوله رق  
ایراد اولنور . بعضاً دخی تأکید اولنور .

نته کیم : بروجه بالادات خبر بعضی واقعه « تأکید » ایچون کلور .  
وبعضاً تأکید ایچون جمله خبریه تکرار اولنور . مثلاً :  
« حقکز وار ، حقکز وار » دینلور . بعضاً دخی الفاظ  
تأکیددن بری علاوه کلام قیلنور .

« البته » ، « شبهه سز » ، « محقق » ، « تحقیقاً » و « تحقیق  
علی التحقیق » ، « حقیقت » ، « صحیحاً » ، « طوغریسی »  
الفاظ تأکیددندر .

الته بو حالدن او یارک خبری وار

مصر عنده کی : « البته » لفظی کی .

« اینانکه » ، « الله بیلورکه » ترکیبلی و « الله حقیچون »  
کی یمنلر دخی اکثر یا اسناد خبری بی تأکید ایچون استعمال اولنور .



« اصلا » و « قطعاً » لفظی بنی مؤکد اولورلر : « بو ایشه اصلا و قوئم یوقدر » دینلیدیکی کی .

« آ » ، « نه » ، « یا » ، حرفلری دخی کلامک آخینه علاوه اولندقلرنده اسنادی تأکید ایدرلر . « اوسنک دوستکدر آ ! » ، « سنی خیلیجه اوزدی یا ! » عبارتله لرنده اولدینی کی .

ادات تنبیه دخی کلامی مؤکد اولور . « ایشه سوزک صاغی بودر » ترکیبنده اولدینی کی .

مادام که متکلم مقصدی مخاطبه خبرک حکمنی ، یا خود لازمی افاده در ، هر حالده مخاطبک حاله رعایت ایلمسی و سوزی آکا کوره علی قدر الحاحه سویلمسی لازم کلور ؛ چونکه سوز ناقص اولور ایسه افاده قاصر اولور و زیاده اولور سه کلامده حشو و لغو بولنور .

ایمدی مخاطب اگر خالی الذهن ایسه ، یعنی : کندوسنه القا اولنه جق خبرک مضمونی حقنده برکونه حکم . ترددی یوق ایسه کلامی تأکید حاجت اولیوب « فلان شی بویله در » ، یا خود « دکدر » دینلور .

و مخاطب اگر اول خبرک حکمنده متردد ایسه ، کلامی كذلك اطلاق اوزره ، یعنی : بلا تأکید ایراد ایلمک جائز اولور ؛ فقط تأکید مستحسندر .

« فلان شی بویله میدر ؟ » دیوسؤال ایدن کیسه مترددیمک اولدینی جهته آنک جوابی دخی بوقیلنددر ؛ یعنی : « اویله در » دیمک

کافی اولور؛ فقط « نه شبهه ! اويله در » ديو تا کيد اولنسه  
مستحسن اولور .

و مخاطب اکر حکمی منکر ايسه کلامی تا کيد ايلمک لازم  
کلور . مثلاً : منکر اولان مخاطبه : « البته فلان شی بويله در »  
ياخود « دکلدر » دینلور .

و اکر انکارنده اصرار ایلرا یسه « الله بیلور که » ،  
« صحیحاً بويله در » ديو زیاده تا کيد اولنور .

الحاصل ، مخاطبک ظاهر حالنه نظر آکلام ، اوچ و جهله  
ایراد اولنور که تا کيددن خلوی واستحساناً تا کیدی و تا کيدک  
وجوبیدر . اولکیسنه : « ابتدائی » ، ایکنجیسنه : « طلبی » ،  
اوچنجیسنه : « انکاری » دینلور . اشبو وجوه ثلثه اوزرینه  
ایراد کلام ایلمک مقتضای ظاهر اوزرینه سوز سویلمکدر .  
نیجه دفعه لر ايسه اقتضای حاله کوره ظاهرک مقتضای ترک  
اولنور . شویله که : بعضاً مخاطبه ایراد اولنان کلامده بر خبره  
ایما اولنور ؛ اودخی آکا مترقب بولنور . بناءً علیه سائل دکل  
ایکن سائل حکمنده طوتیلور و آنک اوزرینه ایراد اولنان  
خبرک تا کیدی مستحسن اولور . مثلاً : « اوتنبل شا کردلرک  
لاقرديسنی ایتمه ! علی التحقيق آنلر جزایه مستحقدرلر »  
دینلور که « اوتنبل شا کردلرک لاقرديسنی ایتمه » دینلرکده  
آنلرک حقنده بر فنا حکم اولدیغنه ایما ایدلش اولور .

مخاطب دخی : عجباً بو حکم نه اوله ! « ديو صانکه سائل

متردد کی مترقب اولور. بوجهته سائل منزله سنه تنزیل قیلنور.  
و «آنلر جزایه مستحقدر» کلامی «استحساناً علی التحقیق» دیو  
تأکید اولنور.

وبعضاً منکر اولمیان مخاطبده اماره انکار کورلمکله منکر  
حکمنده طوتیلور و کلام مؤکد ایراد اولنور.

مثلاً: اولومک انکاری قابل اولمدینی جهته «اولوم وار»  
جمله سی تأکید سزکتورلمک مقتضای ظاهر ایکن اصلاً اولومی  
دوشونمز مرتبه غفلته طالمش اولنلر اولومی منکر کی اعتبار  
اولنهرق آنلره خطاباً: «البتّه اولوم واردر» دینلور.

وبعضاً منکر اولان کیمسه غیر منکر حکمنده طوتیلهرق  
آکا ایراد اولنهرق کلام بلا تأکید کتوریلور.

شویله که انکار ایلمدیکی کلامک صحتی ظاهر اولدیغندن بلا  
تأکید «فلان شی شویلهدر» دینلور که «تأمل ایدرسهک»،  
او حکمک صحتی تسلیم ایلرسین، شبهه و تردیدی دکلدر» دیمک اولور.  
آما خبرک حکمی مخاطبک معلوم و مصدق ایه، بو خبرک  
آکا القاسی معلومی اعلام قیلندن اوله جنی جهته جائز اولماز  
ایسهده بعضاً مقتضای ظاهرک خلافتیه اولهرق اخبار اولنور.  
شویله که: مخاطب کندو علمنک مقتضاسنه منافی بر حالدّه  
بولندینی جهته بیلیمز مقامنده طوتیلور.

نته کیم: تارک صلات اولان بر عالمه افاده خبر سیاقنده:  
«نماز فرضدر» دینلور. و نمازک فرض اولدیغنی بیلیمز منزله سنه



تزیل اولنور. بونده برفائده تحقیقیه یوق ایسه ده افاده تزیلیه بولنور. کذلک سنک الکنده کتاب اولدیغنی بیلن کیمسه «اوندر؟» دیو سؤال ایتدکده «کنادر» دیو جواب ویررسین؛ چونکه نه اولدیغنی بیلدیکی جهته صور مامسی لازم کلور ایکن بر بجه کر زکاه اولمق اوزره سؤال ایدیجک، سن دخی آکا کتاب اولدیغنی بیلمیور کبی معامله ایلر سک.

اننای محاوره و مصاحبتده بو مثللو «ادعائی» و «اعتباری» افاده لر چوق و قوع بولور.

## فصل خامس

### انشا بیاننده در

انشا ایکی قسمدر. بری : «انشاء طلبی» در، که «آخردن بر شیء طلب ایتک» معناسنی متضمندر. دیگرى : «انشاء غیر طلبی» یعنی : «انشاء ایقاعی» در، که «موجود اولیان بر معنای ایقاع ایتک» در.

انشاء طلبی «تمنی»، «استفهام»، «امر»، «نهی» و «ندا» در. انشاء ایقاعی : «ترجی»، «تعجب»، «مدح»، «ذم» و «صیغه عقد» کبی «انشا» معناسنه نقل اولنان خبرلردر. تمنی «آرزو ایتک» معناسنه در که لسان ترکیده «نولیدی» و «اولسه» دیو افاده اولنور. فارسیده تمنی ایچون «کاشکی»

لفظی قوللانیلور که ترجمه تحریف ایله « کشکه » دینور. ترجی  
« اومق » مغناسنه در. یعنی : « حصولی محقق وموثوق اولیان  
امر مرغوبه مترقب ومنتظر اولق » دیمکدر . بونک ایچون  
« اومارم که » ، « اوله که » ، « مأمول که » ، « شاید که » کبی  
لفظلر استعمل اولنور . مثلاً : « مأمول که یارین بو خسته  
افاقت بوله » دینلور .

بعضاً دخی ترجی مقامنده « انشاء الله » ترکیبی قوللانیلور.  
نته کیم : « انشاء الله قریباً بوخسته کسب صحت ایدر » دینلور.  
اما حصولی قطعی ومحقق اولان شیده ترجی جاری اولماز .  
مثلاً : اوله که بو آخشام کونش غروب ایده » دینلمز .

ترقب وانتظار اولنان شی اکر بر امر مخوف ومکروه ایسه  
« اشفاق » تسمیه اولنور. مثلاً « قورقارم که » ، یاخود « خوفم  
بودر که بوخسته یارین فوت اولیویرر » دینلور .

« ترجی » کبی اشفاق دخی « انشاء ایقاعی » قیلندندر .  
وایکیسیده مستقبله مخصوصدر .

« تمنی » ایسه بروجه بالا : « انشاء طلبی » قیلندن اوله رق  
ماضی ومستقبله جاریدر .

شویله که : تمنی مقامنده زمان ماضی ایچون فعل التزامینک روایت  
وحکایه صیغه لری ومستقبل ایچون فعل التزامی شرطی قوللانیلور.  
نته کیم : « کاشکی وقتيله درسه چالیشیدم » ، یاخود « چالیشه ایتیم »  
و « کنجلمک عودت ایتسه ده درسه دوام ایتیم » دینلدیکی کبی .

ممكنك امكانى شرط دكلدره. بلكه اكثريا محال اولور.  
مذكور مثالرده اولديغى كى .

وبعضاً ممكن اولور ؛ فقط حصولى منتظر ومأمول اولماز .  
نته كيم : « بر عظيم دفينه بولسه مده شويله پايسم » ديو خوليالر  
قورمق كى .

واكر حصولى منتظر ومأمول اولور ايسه تمنى ترجى يه منقلب  
اولور ؛ بناءً على ذلك فعل التزامى شرطى تمنى ايله ترجى  
بينده مشترك اولور .

مثلا: ورودى مأمول اوليال برذات حقنده «فلان كلسهده  
شو دوكونده بولنسه» دينلور ايسه تمنى اولور . واكر قدومنه  
انتظار اونان برذات حقنده «بو واپور ايله كلسهده بودوكونه  
يتشسه» دينلور ايسه ترجى اولور.

وبعضاً ترجيدن «تمنى» معناسى تولد ايدر. نته كيم: بروسه يه  
كيتمك اوزره وداع ايجون بر كيمنسه نك يانسه كلان بر هندلويه  
اول كيمنسه : « انشاءالله بنده بروسه يه كيدوبده سزى زيارت  
ايدرم » ديسه ترجى اولور ؛ فقط آنك بروسه يه كيتمى پك  
مستبعد اولديغى جهتله محالاته مشابه اولديغدن بوكلامى «تمنى»  
معناسنى اشعار ايدر؛ لكن كلامينه معنای موضوع لهنده مستعمل  
اولمغله اول معنى «مستتبعات تراكب» قىيلندن اوله رق مستفاد اولور.  
كذلك ادات اضراب اولان «بلكه» بعضاً «احتمالكه» مقامنده  
مستعمل اولوب بودخى بعضاً محاورات ناسده «ترجى» معناسنى  
مستتبع اولور .



استفهام او کر نمک ایچون صور مقدر. ادات استفهام «می»  
اداتیدر، که بعضاً طالب تصور ایچون، یعنی: اجزاء جمله نک برندن  
سؤال ایچون اولور. و دائماً مسؤل عنیه ملتحق و متصل اولور.  
نته کیم: «فلانی کلدی؟». «فلانیی صوردی؟». «مرا می  
مصاحبتمیدر؟ یوقسه عرض مصاحبتیمیدر؟» دینلور. «فلان،  
یا خود فلان کلدیمی؟» دینلوب «ایکیسندن بری کلدیمی» دیمک اولور.  
و بعضاً طلب تصدیق ایچون، یعنی: اسناددن سؤال ایچون  
اولور. و ضمیر فعلیلردن صکره و ادات رابطه ایله ضمیر  
نسبیلردن مقدم کتوریلور.

نته کیم: «مکتبه کیتدکی یوقسه کیتمدکی؟» و «فلان  
افندی مکتبده میدر یوقسه دکلیدر؟» و «سن قلمه کیده جکمیسین  
یوقسه کیتیمه جکمیسین؟» دینلور.

«می» اداتی فعله ملتحق اولدقده تصدیق و تصویره محتمل  
اولور. و قرائن ایله فرق و تمیز اولنور.

شویله که: شبهه اگر اصل فعل فعلک وقوع و عدم وقوعنده  
ایسه طالب تصدیق ایچون اولور. نته کیم: «فلانی دو کدکی؟  
یوقسه دو کدکی؟» دینلدیکی کی.

و شبهه اگر مسند اولان اصل فعلک تعیننده ایسه مسندک  
تصورینی طالب ایچون اولور. نته کیم: «فلانی دو کدکی» دینلدیکی کی.  
بوا احتمال دخی آنجق افعال بسیطه ده اولور. اما افعال  
مرکبه ده مقصد اگر «طالب تصدیق» ایسه ادات استفهام فعلک

آخرینه الحاق اولنور. مثلاً: «فلانی ضرب ایتدکمی؟»، «سب ایتدکمی؟» دینلده ضرب و سبک وقوع و عدم وقوعندن سؤال اولغله ایکسی ده «طلب تصدیق» ایچون اولور.

و مقصد اکر طلب تصور ایسه اداستفهام فلک جزء اولنه الحاق اولنور. نته کیم: «فلانی ضربمی ایتدک؟ یوقسه سبمی ایتدک؟» و «فلانه پاره می ویردک؟ یوقسه هدی می ویردک؟» دینلور. و بوجهله تکراریدن فعللرک ایکنجیسی چوق دفعه اختصار ایچون حذف اولنور. مثلاً: «پاره می ویردک؟ هدی می؟» دینلور. كذلك اداستفهامدن صکره تکرار اولنان اداستفهامدن ربطه نك دخی بعضاً ایکنجیسی حذف اولنور.

اداستفهام بعضاً ماضی منفی به لاحق اولدقده «تندیم؟» یعنی: «مخاطبی نادم ایتک» معناسی قصد اولنور. نته کیم: «درسه کیتدکمی؟» دینلدیکی کی.

و مضارع منفی به لاحق اولدقده «تخضیض» و «اغرا» معناسی قصد اولنور. نته کیم: «مسلکم خانه سی اوکندن کلوب چکمک اوزره اولان برافندی به: «افندی! بزه اوغراماز میسین؟» دیدکده «تکلیفه حاجتمی وار؟ تشریف ایتلی دکلیمسکز؟» دیمک اوله رق بر نوع توییخی متضمن اولور.

و بعضاً توییخدن عاری اوله رق مجرد نازکانه بر تکلیف ایچون اولور؛ بوکا: «عرض» دینلور. نته کیم: «بیوریکز!» «دپو دعوت مقامنده: «افندم تشریف ایتمز میسکز؟» دینلور.

استفهام بعضاً مسؤول عنی مخاطبه اقرار ایتدیرمک ایچون اولور. نته کیم: متهمه: «سن فلانی دوگد کیمی؟» دنیلور. وبعضاً انکار ایچون اولور؛ آندن دخی یا تکذیب قصد اولنور؛ نته کیم: «تقریر نامه یی امضا ایچون سکا جبرمی ایتدیلر؟» دنیلور. ویاخود توغ قصد اولنور. نته کیم: «پدریکه عاصیمی اوله جقسین» دنیلور.

وبعضاً وعید ایچون اولور. نته کیم: ادبسنرک ایدن کیمسه یی تحذیر ایچون: «بن فلانی تأدیب ایتدیمی؟» دنیلدیکی کبی. بعضاً نه کیم ایچون اولور. نته کیم: «محکمه جه ویریلان قرارک تبدیلی یکی کلان ممیز افندی می امر ایدیور؟» دنیلور. بعضاً تمنی ایچون اولور. نته کیم: اصلاً شفیع اولیان کیمسه نک: «کشکه بکا بر شفیع اولسه» دیه جک یرده «بکا بر شفیع وارمی؟» دیمسی کبی. کیم، نه، قاج، قچان (خاچان)، قفی (هانی)، قنخی (هانکی)، لفظلری دخی بالوضع استفهامه دلالت ایدر. وهیسی «طلب تصوّر» ایچون اولور.

شویله که: «کیم» بر شخصدن، «نه» برشیدن، «قاج» عدددن، «قچان» زماندن، «قفی» مکاندن، «قنخی» بر امرده مشارک اولنرک تعیین وتمیزندن سؤال ایچون اولور.

نته کیم: «کیم کلدی؟»، «نه کتوردی؟»، «قاج غروش ایستیور؟»، «قچان کلدی؟»، «قفی بو دکانک صاحبی؟»، «بو قماشلرک قنغیسنی بکندک؟» دنیلدیکی کبی.



### فضولینک

نهدن اول شیوه رفتار ایله اول پیکر موزون  
کورن حیران قالدور آثار صنع حق تعالی به  
بیتی دخی بوکا بر مثالدر .

«نه» لفظی «اصل» ایله ترکیب اوله رق: «نصل» دینلد کده،  
کیفیتدن سؤال ایچون اولور. وقاچ مقامنده: بعضاً «نه قدر»  
وچقان مقامنده: اکثریا: «نه زمان»، یا: «نه وقت» ویا: «نه دم»  
دنیلور. مکاندن سؤال ایچون دخی شمعی اکثریا: «نره» لفظی  
قوللانیلور و «نره ده؟»، «نره دن؟»، «نره یه؟» دنیلور .

بوکات استفهامیه دخی بعضاً استفهامک غیری معنالرده  
استعمال اولنور. اولحاله: «انشاء ایقاعی» قیلندن اولور.  
نته کیم تحقیر مقامنده: «بوکیم؟» و تهدید مقامنده: «سن کیم  
اولیور سین؟» دنیلور .

تعجب مقامنده: «نه عجیب»، یاخود «نه عجایب» و مقام  
مدحده: «نه کوزل» و مقام ذمده: «نه چیرکین» و مخاطبک یا کلش  
یوله کیتدیکنی اخطار ایچون «نره یه کیدیور سین» و مقام استبعادده  
«آکا کوره متنصح اولمق نره؟» دنیلور. كذلك انشاء کثرت  
ایچون: «بواسکله یه کونده نه قدر فایق کلوب کیدر» و «بو بلده یه  
نیجه عالم وفاضل آدم لر کلوب کیتمشدر» دنیلور .

کذلك: «سنی قاچ دفعه چاغردم» دنیلورده «کیج کلدک»،  
«بطائت ایتدک» معناسی قصد اولنور .

امر، علی وجه الاستعلا برایشک ایشانمسنی طلب ایتمکدر، که

متکلمک مادونندن طلب ایتسمیدر. نته کیم: بر آدمک خدمتسکا-  
رینه: «سائسه سویله آتی اگرسون!» دیمسی کبی که: «سویله»  
امر حاضر «اگرسون» امر غائبدر.

«امر صیغه لری» بعضاً علی وجه التضرع طلب ایچون استعمال اولنور. و بوکا: «نیاز» و «استدعا» دنیلور. نته کیم:  
متکلمک کندوسندن بیوک برذاته «لطف ایدیکیز»، «عنایت  
بیوریکیز» دیمسی کبی.

وبعضاً متکلمک اقرانندن طای ایچون استعمال اولنور.  
بوکاده «التماس» دنیلور. نته کیم احبابندن برینه: «یارین ارکنجه  
تشریف ایدیکیزده مصاحبت ایدلم» دینلمک کبی. و بعضاً اباحه  
ایچون اولور. نته کیم: برکیمسه نک طعافنی یمکه رخصت ویرمک  
مقامنده آخره «بیوریکیز» دیمسی کبی. بعضاً تسویه ایچون اولور.  
نته کیم: «سن قبول ایت، یاخود ایتمه! محکمه نک قراری بودر،  
دنیلور، که: «سنک قبول وعدم قبولک سیاندر» دیمک اولور.  
بعضاً تحذیر ایچون اولور. نته کیم: «بوکون درسکی یامه  
صکره کوررسین!» دنیلور.

بعضاً عجزه نسبت ایچون اولور.

نته کیم: بر غزلی تنظیردن مخاطبک عاجز اولدیغنی بیان  
مقامنده: «بو غزلی تنظیر ایت» دنیلور، که «ایده مزسین» دیمک  
اولور. بعضاً اهانت ایچون اولور. نته کیم: «هایدی ییقل کیت»  
دینلیدیکی کبی.

وبعضاً تمنی ایچون اولور .

فقط بعضاً دخی تضرع ایچون اولور . نته کیم : « یارب ! دشمنلرمی بکا کولدرمه » دنیلور .

بعضاً التماس ایچون اولور . نته کیم : « اقداش ! سن بواشی یاپمه ! » دنیلور .

بعضاً تحذیر ایچون اولور . نته کیم سوز دیکله مین اوشاغه : « سن بنم سوزمی دیکله مه ! صکره کورر سین » دنیلور . بعضاً عجزه نسبت ایچون اولور . نته کیم *الذکر کل آثر لک تویم دنیلور* . امر ونهی صیغه لری قواعد عثمانیه ده مفصلاً مذکوردر . اکثریا فعل التزامی صیغه لری دخی امر مقامنده ایراد اولنورلر . ندا حرف ندا ایله مخاطبک توجه واقبالنی طلب ایتمکدر ، که « سنی چاغریورم » ، « بکباق » دیمک یرینی ط-وتار . کلامک ابتدا سننده کلان « آه » ، « ای » ، « هی » حرف لری ندایه موضوعدر ؛ فقط بعضاً آنلردن ندا معناسی مراد اولمیوب دیگر اغراض ایچون استعمال اولنورلر .

مثلاً : سکا متوجهاً عرضحال ایدن کیمسه یه : « بچاره » دیدیککده ندانک معنای حقیقیسی مراد اولمیوب آنجق مخاطبه دردنی سویلمک اوزره میدان ویرمک و « سویله ! دکریم » دیمک معناسی قصد اولنور . ومعنای ترحمی « انشا » دیمک اولور .

بعضاً دخی خطاب وندایه صالح اولیان شیلره ندا اولنهرق



تحسّر، «تخیر» و «تأسف» کی معنایں قصد اولنور۔ بوصورتلر دم  
خی ندا «انشاء ایقاعی» قیلندن اولور۔

بیت مؤلف :

ای باد صبح! سویله دلاک یاره حالی  
شرح ایت نیازنامه حسرت مآلی

او غرار ایسه که استانبوله لطف ایله ای صبا!  
اول یاره صور! اونوتدیمی وعد و صالتی؟

قی بو قیلدندر .

بمضاً جملہ خبریہ دن اعلام و اخبار قصد اولنمیوب دیگر  
غراض مخصوصه مراد اولنور .

مثلاً: مجرد، مخاطبی علمہ ترغیب ایچون «یلن ایلہ بیلمین  
دکدر» و تعجب مقامندہ: «شاشارم سنک بوایشکه» و اظهار  
ضعف و تذلل ایچون: «ن پیر اولدم» دینلور۔ و مجلسده قدومنه  
تظار اولان بر ذات حقندہ حضاردن بری دیگرینه بیان تأسف  
تحسّر ایچون: «فلان ذات گلدی» دیر۔ ایشته بونلر هپ جملہ  
بریه اولدقلری حالده اخبار مقصود اولمیوب بررغرض مخصوص  
یچون ایراد اولندقلرندن، هپ «انشاء ایقاعی» قیلندندر لر۔  
صیغہ عقد، «شہادت»، «قسم»، «سبحان الله»، «معاذ الله»  
«اللهه صغندق» دخی بو قیلدندر .

تعالی الله زہی ہایون ہاماسیہ  
کہ تصویر دل اراسی یترا ککنجہ دنیاہ

تندہ کی تعجب وکی .

وبعضاً ادبه رعایهٔ امر صورتندن احتراز ایله صیغهٔ امر یرنده جمله خبریه قوللانیلور و بوضورتده «انشاء طلبی» قییلندن اولور. نته کیم: «لطف ایدیکنز» یرنده «لطف ایدرسکنز» دینلور.

## فصل سادس

الفاظک عطف و ربطنه داثر در

«واو» لسان عربیده اولدینی کبی لسانمزدده دخی حرف عطف اولوب مطلقاً جمع ایچوندر. شویله که: آنکله مسند الیه اوزرینه برشی عطف اولندقدده ایکیسینک علی اطلاق برمسندده اشتراک رینی مختصراً افاده ایلر. نته کیم: «خالد و ماجد کلدی» دینلدکده بر جمله ایله ایکیسینک ده کلدکاری افاده اولنش اولور. واکر «معیت» معناسی افاده اولنق استیلور ایسه: «برلکده» یاخود: «برابر کلدیلر» دینلور. اکر معطوف علیهم مقدم کلدیکی افاده اولنق ایستیلور ایسه «خالد و متعاقباً ماجد» یاخود «صکره ماجد کلدی» دینلور. و بعضاً «متعاقباً» یرنده: «درعقب»، و: «صکره» یرنده «بعده» کبی دیگر لفظلر قوللانیلور. و بعضاً معطوف علیه تأکید اولنور. نته کیم: «خالد و ماجد ایکیسیده کلدی»، یاخود «خالد و ماجد وناشد اوچیده کلدی» و یاخود «هپ کلدیلر» دینلور. مسند اوزرینه برشی عطف اولندقدده ایکی وصفک برذاتده علی الاطلاق اجتماعنی مختصراً افاده ایلر. نته کیم: «فلان افندی

کاتبدر» و «شاعر در»، یاخود «کلدی» و «کیتدی» دنیلور.  
 و بعضاً بر «واو» ایله ایکی کلمه دیگر ایکی کلمه اوزرینه عطف اولنور.  
 نته کیم: «خالد افندی قلمه و برادری مکتبه کیدیور» دنیلور.  
 عطف بختنده موصوف ایله ذی الحال «مسند الیه» حکمنده  
 وصفت ایله حالده «مسند» حکمنده در.

متعلقات فعل اوزرینه «واو» ایله عطف دخی فعلک تعلقنده  
 معطوف ایله معطوف علیہک اشتراکی افاده ایلر. نته کیم:  
 «بن فلان و فلانی سورم» دنیلور.  
 بعضاً اختصار ایچون واو عطف حذف اولنور. نته کیم:  
 «خالد، ماجد، ناشد افندیلر کلورلر» یاخود «فلان افندی  
 کلدی، کیتدی» دنیلور.

ذکاتی یوق، ضرر ایتمز، توکنمز، اکسلمز  
 اولورمی آدمه خولیا کی حساب فرح

بیتی دخی بوقییلنددر.

بروجه مشروح واو ایله عطفک مقبول اولمسنده معطوف  
 ایله معطوف علیہ بیننده جهت جامعه بولنمق شرطدر. جهت  
 جامعه معطوف ایله معطوف علیہی ذهنده جمع ایده جک برعلاقه  
 و مناسبتدر، که «تضایف»، «تمائل»، «شبه تمائل»، «تضاد»،  
 «شبه تضاد» و «تقارن فی الخیال» قسملرینه منقسم اولور.  
 مثلاً: اقل ایله اکثر بیننده «تضایف» وارددر، که برینک  
 تعقلی دیگرینک تعقلنه توقف ایدر.



و «زهره» ایله «مشتی» بیننده «تمائل» وارد، که یکدیگره شبه و نظیر اولان برنوع ییلدزلر اولوب ایکیمنه بردن «سعدین» دنیلور.

و بیاض ایله صفت یکدیگره میان رنمکلرایسه ده بینلرنده «تمائله» بکزر برمناسبت وارد. کذلک شمس و قمر بیننده دخی «شبه تمال» وارد.

بیاض ایله سواد بیننده ایسه «تضاد» و ارض و سما بیننده تضاده بکزر «تقابل» وارد.

«تقارن خیالی» یه کلنجه: بونک اسبابی متفاوتدر واحوال و عاداتک اختلافیه مختلف اولور.

مثلا: کاتبه کوره کاغد، قلم و قلمتراش بیننده جهت جامعه خیالیه وارد، که بولردن بری ذکر اولنسه دیگری کاتبک خاطرینه کلور؛ اما بربرک خاطرینه کلز. حال بوکه اوستوره ذکر اولنسه بربرده مقراض و جنیزی تخطر ایلر. برمنوال مشروح، کله لر بیننده جهت جامعه بولنور ایسه یکدیگری اوزرینه عطفلری مقبول اولور. والا اولماز. نته کیم: «شمس و قمر عالمی تنویر ایدر» دنیلور. «دوه و دوه قوشنک اودلری یوقدر» دنیلور. اما «طاوشان اودهی. و کونش محدندر» یاخود «بالق و کرتشکله حیواندر» دنیلسه یاقیشیق آلاز؛ زیرا معطوف ایله معطوف علیه بیننده برعلاقه و مناسبت بولنماز. کذلک «فلان افندی شاعردر و کاتبدر» دنیلور؛ زیرا شعرایله

کتابت صاحب‌الریس نک خیال‌سده مقارن و مجتمع اولدقلری جهته ندر  
مناسبت درکاردر. اما : «فلان افندی شاعر در و قیصه بویلددر»  
دینلمک مقبول دکلدر؛ زیرا شعرایله قصر قامت بیننده مناسبت  
یوقدر. معطوف ایله معطوف علیه بیننده ذاتاً مغایرت بولمق  
شرطدر. والا «عطف الشی علی نفسه» لازم کاور؛ فقط بعضاً  
متحد المعنی اولان ایکی کلمه دن بری دیکرینی تفسیر ایچون آنک  
اوزرینه عطف اولنور. «تاب و طاقت» کبی. محرک :

یوق حالی عرض ایلسکه تاب و توانم  
جودت! سر شورنده بوم درد سفر وار

یتبده کی «تاب و توان» دخی بوقیلدندر.

کلمه لر کبی جمله لر دخی بعضاً و او ایله یکدیگری اوزرینه عطف  
اولنور. جمله لرک عطفنه «وصل» و عطفسز ایراد اولنلرینه  
«فصل» دنیلور. یکدیگره وصل اولان جمله لر بیننده دخی برمنوال  
متسروح جهت جامعه بولمق لازم کاور. مثلاً: «زید شاعر در  
و عمرو کاتبدر» دنیلدکده اگر بیلرنده محبت، صداقت، یا  
عداوت کبی برعلاقه و مناسبت و ارایسه مقبول اولور. یوق اایسه  
مقبول اولماز.

مسند الیه لک، یاخود مسندلرک، و یاخود قیدلرندن برر  
قیدک اتحادی دخی ایکی جمله بیننده جهت جامعه اولور. نته کیم:  
«ناظر افدینک کتخداسی کاتبدر. ورئیس افدینک کتخداسی  
شاعر در» دنیلدیکی کبی.

ایکی شی بیننده فی نفس الامر جهت جامعہ بولمق عطفک  
صحتی ایچون کافی اولمایوب بلکه مقامه کوره اوجهتک مقصود  
وملتفت الیه اولسی شرطدر .

بناءً علیه لایچینه دائر محاوره جریان ایدرکن « لایچیم طاردر  
وخانه طاردر » دنیسه مقبول اولماز . اما طار شیرک تعدادی  
صره سنده « مهرم طاردر و لایچیم طاردر و خانه طاردر  
وزقانی طاردر » دنیسه مقبول اولور .

کذلک « سردار اکرم صالی کونی دشمن اردوسنی بوزدی  
ودرزی اول کون بنم جبه می دیکدی » دنیسه مقبول اولماز .  
اما صالی کونی وقوعاتنک ضبطی قصد اولنور ایسه اووقوعاتک  
بیانی صره سنده بوکلام دخی مقبول اولور .

اما جمله لرك نه حالده وصلی و نه حالده فصلی لازم کلور؟  
شویله که: صفت، یا حال اولمق کی بروجهله بر محله مربوط اولان  
جهله مفرد حکمنده اولدیغندن بو ارتباطده دیگر جمله نك آکا  
تشریکی قصد اولنور وینارنده جهت جامعہ بولنور سه جمله  
ثانیه وصل اولنور .

مثلاً: « اوطالب که همتی زیاده در و غیرتی فوق العاده در،  
از وقت ظرفنده فیضیاب اولور » دنیلور .

اگر جمله ثانیه نك جمله اولایه تشریکی ایستلمز ایسه  
فصل اولنور . مثلاً: « مدیر افندی دیمشکه طلبه ساعت بشده  
مکتبه کلیدر . خواجه افندی بوتنبهی بکنمیور » دنیلور، که



«وخواجه افندی» دیو وصل اولنسه، بوجمله دخی مدیر افندینک مقول قولی اولمق لازم کلور؛ بوا یسه مقصده منافیدر .

برمحله مربوط اولیان جمله لره کانتجه: ایکی کلام بیننده جهت جامعه بولنماز ایه کلام نائینک وصلی جائز اولماز. نته کیم: «فلان افندی اوزون بویلدیر و فلان افندی اویقوده در» دنیلسه مقبول اولماز.

اگر کلامین بیننده جهت جامعه بولنور ایه کلام ثانی وصل اولنور. نته کیم: «کولش باندی و آی پارلادی» دنیلور؛ فقط اولکی کلامک بالاسنده برقید بولنوبده کلام نائینک آنده تشریکی جائز اولماز ایه فصلی لازم کلور. مثلاً: «دون فلان افندی کلدی. برادری آرتق کیدز» دیو کلام ثانی فصل اولنور؛ زیرا وصل اولنسه «دون برادری کیدر» دیمک اولور.

برده ایکی کلامدن بری: خبر، دیکری انشا اولور ایه ایکنجی سینک فصلی واجب اولور. نته کیم: «سن کل، بن کیدیورم» «بن کیده جکم، برادرم کلسون» دنیلور.

### مؤلفک

تقریر ایده مم سوز دل و درد دروم  
سویلمه بنی خاطر زارمده کدر وار

بیتی دخی بوقیلدندر .

کذلک سؤال مقدره جواب اولان جمله استینافیه دخی فصل اولنور. مثلاً: دیدیکه: «اللهه امانت اولکنز» دیدم که:

« الله سلامت ویرسون » دنیلور که اولکی کلامدن جوابنده  
 « نه دیدیکیز » دیو سوال وارد اولمغله کلام ثانی آکا جواب  
 اوله ورق مفصلاً کتوریلور. کذا « خالد افندی یه احسان ایتمش  
 سین . خالد افندی احسانه لایقدر »، یاخود « اسکی دوستکیز  
 احسانه لایقدر » دنیلورکی کی .

کذا کلام ثانی اولی مؤکد، یاخود آندن بدل ویاخود بیان  
 اولور ایسه فصل اولنور .

نته کیم: « بوایش بویله در . بونده شبهه یوقدر. »، یاخود « فلان  
 افندی سزه احسان ایتمش . اون بیک غروش عطیه وبرچوق  
 هدیہ اعطاسیله احسان ایلمش » ویاخود « فلان بنی آلدادی؛  
 سکا شویله بویله معارنت ایدرم » دیدی . جمله لرنده اولدینگی کی .  
 بعضاً برقاج کلامدن مرکب اولان برفقره ، دیگر برفقره  
 اوزرینه عطف اولنور؛ بوکا « عطف القصه علی القصه » دنیلور .  
 اول ایکی قصه بئینده جهت جامعه آرانور .

### مثالی

« فی الواقع قرآن کریم نه کلام منظومدر، نه ده کلام منشوردر .  
 [ایکی قسمک خارجنده برکلام لطیفدر . وسر ایا فصیح و بلیغدر]  
 « جمله آیات کریمه بلاغتجه بر درجه ده اولیوب بعضیسنک  
 « بعضیسنه نسبتله بلاغتجه درجه سی ده اعلایه فقط جمله سی  
 « معجزدر . یعنی: مثالی وجوده کتورمکدن انسان عاجزدر . »  
 [قصص انبیا]

واو ایله معطوف علیه اولان مسند الیه معطوفیه برابرجمع حکمنده د: «بناء علیه غائب صورتنده : «فلان وفلان کلدیله»، یاخود «کلدی» دنیلور، اما معطوف ایله معطوف علیه تکلم وخطاب وغیبتده مختلف اولدقلرنده غائبه مخاطب وایکسنه دخی متکلم تغلیب اولنور. مثلاً : «اووسن بوایشی یاپارسکز» ، «اووبن ، یاخود سن وبن بوایشی یپارز» دنیلور.

مخاطب اگر خالی الذهن ایسه بوجه بالا وواعطف قوللا- نیلور. اگر معطوف ایله معطوف علیه اجتماع واشتراکندن متردد، یاخود منکر ایسه «واو» یرنده «هم» حرفی مکرر اوله رق ایراد اولنور. نته کیم : مخاطب علی و حسن افندیلردن برینک کلدیکنی مصدق اولوبده دیگرینک کلدیکنده متردد ، یاخود یالکیز برینک کلدیکنی معتقد ایسه «هم علی افندی» هم حسن افندی کلدی» دنیلور. كذلك علی افندی بی آنجق کاتب ظن ایدن مخاطبه «علی افندی هم کاتبدر، هم شاعردر» دنیلور .

«دخی» و «ده» حرفلری ادات عطف اولوب «واو» یرنی طوتارلر وکذلك معناسنی افاده ایدرلر. نته کیم : «علی افندی دون بورایه کلدی . بوکون دخی ادرنه یه کیتدی» ، یاخود : «بوکونده ادرنه یه کیده جک» دنیلور .

وبعضاً جزالره داخل اولور. نته کیم : «سن کیدرسه ک» ، بن دخی کیدرم» دنیلور. كذلك : «اوکلسون، بنده کلورم» دنیلور. و «ده» حرفی بعضاً «هم» ، مقامنده قوللانیلور. «بوده کچر اوده کچر» دنیلدیکی کی .



وفعله لاحق اولدقده تراخی معناسنی افاده ایدر. نته کیم:  
 «کلدیده کیتدی» دنیلور که «کلدی، بعده کیتدی» دیمک اولور.  
 بعضاً معطوف علیه صیغه عطفیه ایله ایراد اولنوب «واو»  
 حرفندن مستغنی اولور. معطوف ایله معطوف علیه برر جمله  
 اولدقلری حالدده ایکیسی برکلام حکمنده اولور لر. نته کیم: «فلان  
 آدم شورایه کیروب چیقیور» دنیلور.

وصیغه عطفیه اکثریا مابعدینک تراخی وقوعنی اشعار  
 ایلر. نته کیم: «کلدی بعده کیتدی» دنیله جک یرده «کلوب  
 کیتدی» دنیلور.

وبومعنابی تأیید ایچون بعضاً صیغه عطفیه یه «ده» حرفی  
 الحاق اولنور. «کلویده کیتدی» دنیلور.

«یاخود» ادات تردیددر؛ یعنی: احد امرین ایچون اولوب  
 لسان عربینک «او» حرفنه معادل اولور.

«یا» دخی «یاخود» معناسندهر؛ فقط اکثریا مکرر اوله رق  
 ذکر اولنوب عربجه نک کسرهمزه ایله «اما» حرفنه معادل  
 اولور. تردید بعضاً شک ایچون اولور. نته کیم: «قارشودن بر  
 عسکر» «یاخود» برضبطیه کلیور» دنیلور.

وبعضاً تشکیک ایچون اولور. نته کیم: «بوکون سنک ایچون  
 رتبه یا نشان عرض اولندی» دنیلیدیکی کبی.

وبعضاً نخیر ایچون اولور. نته کیم: «بوآته، یا شو استره  
 بین» دنیلیدیکی کبی.

وبعضاً تقسیم ایچون اولور . نته کیم : « عدد یا چقدر ، یا تکدر » دنلور .

بسم الله الرحمن الرحيم

کبار و عده منہ در جہتی کیتی وعدہ و صا

وہی کہ جس نے یہ لکھا ہے کہ "یا قود" یا "یا قود"

بسم الله الرحمن الرحيم

ادات تردید ایله تعدد ایدن مسند الیه احد امریندن عبارت

اوله رق معنی مفرد اولضله میسندی دائماً مفرد اوله رق ایراد

اول نور . امثلہ سابقہ دہ اول دینی کی .

فقط بودخی غائب صورتند در. اما معطوف ایله معطوف

علیه تکلم و خطاب و غیبتجه مختلف اولدقلری تقدیرده هر برینک

مسندی، آبروجہ ذکر ایله: «عطف الجملة على الجملة» قییلندن

اولہرق ایراد اولنور .

نته کیم: «بو مکتوی بن، یا برادرم، یا خود سن یازار سین»

دینلور. كذلك « بن یازیم ، یا او یازسون » دینلور. وكذلك

« ياسن ياز، يا برادرک يازسون » دینلور .

اما «شومكتوبى بن ياسن يازارم» دینلمز. كذلك «برادرم

ياخو دىن يازە جىغم» دىنلىمىز. و كىذلك «سەن ياخو دىرادر كىياز» دىنلىمىز.

ادات تردید مقام استفهامده دخی احد امرین ایچون

اولور. نتہ کیم : « قلمہ معاون یا خود ممیز کلیدی؟ » دینا کده:

«ایکیندن بری کلدی می؟» دیمک اولور جوابنده «اوت»

یاخود «خیر» دینلور .

واکر اصل فعلک ثبوتی، یعنی: ایکسیندن برینک کلدیکی؛

متکلمک معلومی اولوبده برینک تعیننی طلب ایلر ایسه ادات تردید یرنده « یوخسه » قوللانیلور .

مثلاً: « معلومکی یوخسه میز می کلدی » دینلور. بو وجهله استفهام « قننی » مقامنه قائم اولوب « فلان کلدی » دیو ایکیسندن برینک تعیننی لازم کلور. بوصورتده « یوخسه » لفظی عربجه نك «ام» متصله سی مقامنه قائم اولور .

کذاک طلب تصدیق مقامنده دخی « یوخسه » قوللانیلور. نته کیم: « ممیز افندی کلدیمی؟ یوخسه کلدیمی؟ » دینلور جوابنده: « کلدی » یاخود « کلدی » دینور. « فلان افندی خانه سنده میدر؟ یوخسه دکلیدر » دینلور « خانه سنده در » یاخود « دکلدر » دیو جواب ویریلور. بومثلاًو مقاملرده « یوخسه » لفظی « یوق بلکه » دیمک اوله رق ام منقطعه مقامنه قائم اولور .

« یوخسه » لفظی فی الاصل « یوق ایسه » دیمک اوله رق « والا » مقامنده قوللانیلور. بوصورتده قاف ایله یازلق مناسب اولور. نته کیم: « بنم سوز می دکله یوقسه سنی تأدیب ایدرم » دینور. وبعضاً بوجه بالا «ام» حرفنه معادل اولور. بوصورتده «خا» ایله یازیلور .

وبعضاً اختصار اچون « یوخسه » لفظی حذف اولنور. نته کیم: « ممیز افندی کلدیمی؟ کلدیمی » دینلور .

« بلکه » ادات اضرا بدر؛ یعنی: حکمی معطوف علیهدن صرف ایله معطوفه نقل اچوندور. نته کیم: « هوانک برودنه نظراً جانب



شمالده یاغمور ، بلکه قار یاغمش اواق کرکدر « دینلور . کذلک  
« برودنک شدتنه نظراً بویکجه طاعلره قار دوشه جک ، بایکه  
دوشمشدر » دینلور .

« حتی » قویدن ضعیفه ، یاخود ضعیفدن قوی یه انتقال  
ایچوندر . نته کیم : « فلان قلمک کاتبلی حتی ملازملی بیله بوندن  
اعلی یازارلر » و « فلان محکمه نك بمیزلی حتی باش ممیزی بیله بویله  
براعلام یازامازلر » و کذلک « افندی یتدی ، حتی او یودی » دینلور .  
« ایمدی » ، « لکن » و فتح همزه ایله — « اما » دخی جمله لری  
یکدیگره ربط ایدرلر . ایمدی تفصیل ایچوندر که بر کلام مجملی  
تفصیل ایچون ایراد اولنان کلامک اوزرینه داخل اولور . و بر  
کلام مجملی شرح و ایضاح ایچون ایراد اولنان تفصیلاته اکثریا  
« شویله که » عبارده سیله بدأ اولنور .

« لکن » استدراک ایچوندر ، که بر جمله نك ابهام ایلدیکی  
خاطره یی دفع ایچون ایراد اولنان جمله نك اوزرینه داخل اولور .  
« آنحق » « فقط » لفظلری دخی بعضاً بو مقامده استعمال  
اولنورلر . « اما » دخی بونلره قریب بر معناده استعمال اولنور .  
شویله که : بر کلامده مبهم قالان برشیی ایضاح ایچون کتوریلان  
جمله نك اوزرینه داخل اولور .

« الحاصل » ، « ایمدی » « تفصیل اجمال » ، « لکن » دفع

« ابهام » ، « اما » ایضاح مبهم ایچوندر .

« زیرا » و « چونکه » ماقبلنک سبب و علتی اولان کلامک اوزرینه داخل اولورلر .

وبعضاً سبب و علت اولان جمله « که » اداتیله ماقبلنه ربط اولنور.

بوکون شادم، که یار آغلار بنچون

مصر اعنده اولدینی کبی .

وسبب و علت اولان کلام اگر مقدم کتوریلور ایسه مابعدی

آکا « بوسیدن ناشی » یا « بوجهتله » و یا « بناء علیه » کبی بر عباره

ایله ربط اولنور. و بعضاً بر دلیلدن صکره صراحة ذکر اولنان

نتیجه سنک اوزرینه « اویله ایسه » عباره سی ادخال قیلنور.

وسبب و علت اولان جمله مابعدنده کی جمله یه قید اولوبده

ایکیسی بر کلام اعتبار اوله جق اولدینی حالدله اولکیسی : صیغه

صله اوله رق : « اولدیغیچون » و یا « اولدیغندن » و یا « اولدیغنه بناء »

کبی بر صورت ایله جمله ثانییه ربط اولنور .

وبعضاً جمله اولایه : « دیو » لفظی علاوهمسیله ثانییه ربط

اولنور. و بو « دیو » لفظی بعضاً « تعلیل »، بعضاً « ترجی » مقامنده

مستعمل اولمغله عربجه نك : « لعل » حرفه معادل اولور. و « دیو »

بعضاً مابعدینی مفسر و مبین اولور . مثلاً : « صدوره یازیلان

تذکره یه « سماحتلو » دیو باشلانور » دنیلدکده « دیو » « دیه رک »

دیمک اولوب باشلامق فعلنی بیان ایلر .

وبعضاً جمله اولی صیغه عطفیه اوله رق ایراد اولنور .

اولوب ترنم بلبل غرام تسخیر

چن پرلرینه لازم اولدی عرض لقا


کبی .

و بعضاً جملهٔ ثانیهٔ نك جملهٔ اولایه الجذاب و ارتباط  
منویسی واضح و روابط افطیه دن مستغنی کوریلهرک فصل  
اولنور .

اکثراً ارسال مثل طریقله ایراد اولانان جمله لر دخی  
بوقیلدن اوله رق فصل اولنور . نته کیم :

تحمیل ایلز زور هوایه پرده عصمت  
کریانجاکئی کل دست بیداد صبادندر

بیتمده کی مصرع ثانی ارسال مثل قبیلندن اوله رق مصرع اوله  
اوقدر کوزل مربوط و منعذبدر، که ادات ربطه محتاج دکلددر .



## فصل سابع

ایجاز و اطناب حقنده در

معنای مقصودی عبارةٔ متعارفه دن اقل اولان عبارتله  
ادا ایلمک ایجازه، آندن اکثر عبارتله ادا ایلمک اطنابه در .  
عبارةٔ متعارفه اوساط ناسک معاملات و محاوراتنده استعمال  
ایده کلدکاری عادی عبارتله در، که مراد لری آنجق اصل معنایی  
دلالت وضعیه ایله افاده در . مقتضیات احواله رعایت دکلددر .  
بناءً علیه فن بلاغتجه عبارةٔ متعارفه ذاتاً مزیت یوق  
ایسه بلغادن بری مخاطبک حانه رعایت عبارتله متعارفه مساوی  
الفاظ ایله افاده مرام ایلر ایسه مقتضای حاله رعایت بولنه جفی



جهتله بلیغ اولور . و بوکا « مساوات » دینلور .

ودها مختصر بر عبارت ایراد ایتدکده اگر عبارت سی اصل معنایی افاده یه وافی ایسه « ایجاز » دینلور و آز لفظ ایله چوق معنا افاده ایدلمش اوله جفی جهتله عندالبغا یک مقبول اولور . اگر وافی دکل ایسه « اختصار محل » دینلور و عندالبغا مردود اولور .

و عبارت متعارفه دن ده از یاده الفاظ ایله افاده مرام اولندقدده اگر زیاده سی فائده ضمننده ایسه « اطناب » دینلور بو دخی عندالبغا مقبولدر .

و اگر زیاده سی فائده سزایسه « تطویل » دینلور و عندالبغا مردود اولور . مثلاً : « کذب و دروغ » ایکسی دخی بر معنایه اولدیفی حالده « یالان » ذیله جک یرده « کذب و دروغ » ذیلسه تطویل قیلندن اولمغه مقبول اولماز .

کذلک مبانی الانشائک خطبه سننده « اول منشیء اسالیب مشاعر و حواس و مرتب صحائف تکوین اساس » عبارت سننده مشاعر و حواس بر معنایه اوله رق تطویلده هایدی بوکا « عطف تفسیر » دیلم . اما « اساس » کلمه سی مجرد سجع ایچون کتورلمش بر حشو اولدیفی جهتله مقبول اوله ماز .

ایجاز یا بلا حذف اولوب « ایجاز قصر » دینلور ، یا خود حذف ایله اولوب « ایجاز حذف » دینلور .

ایجاز قصر : « قصاصده حیات واردر » کلامی کپدرکه بوندن

مراد «انسانك نه وقت قاتل اولور ايسه قتل اولنه جغنى بيلمسي  
« قتلہ جسارت ایتہ منی بادی اولور. بوجہ تله پک چوق کیمسه لر  
« قتلدن قور تیلور و قاتلک قتلی آنلرک موجب حیاتی اولور. »  
دیمکدر. ایشته اول کلام موجزده حذف بولمادیغی حالده بوقدر  
چوق معنالی مفید اولور.

### مصرع طحمره

شأنه زلف سخندر اعتراض

دخی بوقیلدندر، که « زلف طرانداجه کوزللاشدیکی کبی سخن  
دخی اعتراض کوردکجه تصحیح اولنه رق کوزللاشور » دیمکدر.  
ایجاز حذفک انوعی چوقدر. بعضاً جمله ک بر جزئی حذف  
اولور. مثلاً: « فلان قریه اها لیسندن صور! » دنيله جک یرده،  
« فلان قریه دن صور! » دنیلور. « مکتب فنون رشديه » یرنده  
« مکتب رشديه » و « طریق رجال عامیه » یرنده « طریق علمیه »  
تعبیرلری دخی بوقیلدندر. فصول سالفه ده دخی بومثللو ایجازلرک  
امثال کثیره سی سبق ایتشدور.

وبعضاً جمله شرطیه حذف اولنور. نته کیم: « یارین بزه  
کل، سکا اکرام ایدرم » دنیلور، که « اگر کلور ايسه ک، اکرام  
ایدرم » دیمک اولور. وبعضاً جمله جزائیہ حذف اولنه رق یرینه  
دیگر بر جمله اقامه اولنور. نته کیم: « سکا معترض وار ايسه  
اسلاف ادبیه نیجه معترضلر وارایدی » دنیلور، که « سکا معترض  
وارايسه قید ایتہ، زیرا اسلاف ادبیه نیجه معترضلر وارایدی »  
دیمک اولور.

اطنابده دائماً برنکته آرانور. از جمله بعضاً «ایضاح بعد  
الابهام» ایچون اولور. نته کیم: «انسان قوجه قجه ایکی خصلتی  
تازه لنور. آنک بری: حرص، دیکری: طول املدر» دنیلور.  
بوکلامک اختصاری استیلورایسه «حرص و طول املی تازه لنور»  
دینامک لازم کلور؛ فقط ساممک نظر دقتی جلب ایله سوزی  
کرکی کبی اصفا ایلمسی ایچون ابتدا مبهم اوله رق ایراد اولوبده  
بعده ایضاح اولمشدر. «ایکی شیئک قبل الزوال قدری بیلنمز.  
بری: صحت، دیکری، امنیتدر» فقره سی دخی بوقیلنددر.

وبعضاً برلفظ اعمک ذکرندن صکره آنک مشتملاتندن  
اولان براخصک ذکريله اولور. بودخی اخصک فضل و مزیتته  
تنبيه ایچونددر. شویله که: «اعمدن خارج بشقه برنوع» ایمش کبی  
ادعا ایدلمش اولور.

نته کیم: انواع حیواندن بری انسان اولدیفی حلاله سائر  
انواعه نسبتله فضل و مزیتی اولدیغندن کویا جنس حیواندن دکل  
ایمش کبی آنک اوزرینه عطف اولنه رق «حیوان و انسان» دنیلور.  
وبعضاً معنای مقصودی تقریر و تأکید ایچون بر قییدک  
علاوه سیله اولور. و بوکا «تتمیم» دنیلور.

نته کیم: «کوزمله کورددم. بک افندی مسافرینی اک زیاده  
سودیکی آته بندردی» دنیلدکده «کوزمله» و «اک زیاده  
سودیکی» لفظلرینک علاوه سی کبی.

وبعضاً لنگته سوزک تکراريله اولور. نته کیم: تأکید انذار



ایچون « بویله ایتیکنز! صکره کوررسکنز! صکره کوررسکنز! »  
 دنیلور. اما بلا سبب تکرار اولنور ایسه تطویل قیلندن اولمغله  
 مردود اولور .

وبعضاً بر جمله یی تأکید ایچون آنک معناسنی مشتمل اولان  
 بر جمله الحاق اولنور. و بوکا « تذیل » دنیلور نته کیم: « مستحق قیلرینی  
 بولدیلر. انسان، ایتدیکنک جزاسنی چکر » دنیلور.


بعضاً دخی کلامده خلاف مقصدی ابهام ایدر برشی بولمغله  
 آنی دفع ایچون برسوز علاوه اولنور .

نته کیم: « احبابی یاننده قوزی کیدر؛ اما اعدایه قارشو  
 آرسلاندر. » دنیلور، که اولکی جمله ده خلقنک ملایمتی جباتندن  
 اولمق احتمالی وارد خاطر اولمغله آنی دفع ایچون جمله ثانیه  
 علاوه اولمشدر .

وبعضاً دفع ابهامدن بشقه بر نکته یه مبنی سوز آره سنه بر جمله  
 ادخال اولنور. بوکا « جمله » معترضه » دنیلور .

نته کیم: « استانبول شهری — الله تعالی دها زیاده معمرور  
 ایتسون — عالمک فهرستیدر » دنیلور کده مسند الیه الیه مسند  
 آره سنه جمله دعائییه ادخال اولمشی کی.

نور



## باب ثانی

طرق افاده بیانده اولوب بر مقدمه ایله بش فصلی مشتملدر

### مقدمه

بالاده بیان اولندی بی اوزره حقیقت معنای موضوع لهنده مستعمل اولان لفظدر . ومعنای حقیقیسی متعدد اولان کله یه « لفظ مشترك » دنیلور . « کوز » لفظی کبی، که لسان ترکیده « انسانک آلت بصری » و « صو منبی » معنالرنده مشترك اولوب استعمالده قرینه معینه ایله بومعنالردن بری تعین ایدر . « چالمق » دخی بوقییلدندر، که « چاک چالمق » و « مال چالمق » معنالرنده مشترکدر .

فقط بر معنای لغویدن بر علاقه و مناسبتیه مبنی بر معنای شرعی یه و یا عرفی یه نقل ایله وضع اولنان کله یه « منقول » دنیلور، که بر جهته « حقیقت » و بر جهته « مجاز » اولور .

مثلاً : « صلات » لفظی لغته « دعا » معناسنه اولدینی حالده اصطلاح شرعه « نماز » معناسنه وضع اولنش اولغله دعا معناسنده استعمال اولندی بی حالده لغته نظرأ : « حقیقت » و اصطلاح شرعه نظرأ : « مجاز » اولور .

« دابه » لفظی دخی لغة « یریوزنده کیزن حیوان » دیمک اولدینی حالدہ عرفاً : « فرس » معناسنه نقل اولنمغله اولسکی معناده استعمال اولدینی حالدہ لغة : « حقیقت » و عرفاً : « مجاز » اولور و « فرس » معناسنده استعمال اولدینی حالدہ لغة : « مجاز » و عرفاً : « حقیقت » اولور .

کذلک « صاریق » صارمق فعلندن مشتق بر صفت اوله رق علی الاطلاق « صالمش اولان شی » دیمک اولور . اما عرفاً صورت مخصوصه ده باشه صاریلان و « عمامه » دنیلان بزه تخصیص اولنمشر .

و مناسبت کوزدلیه رک بر معنادن دیگر معنایه نقلاً وضع اولنان کلمه یه : « مرتجل » دنیلور . و هر قننی معناده استعمال اولنسه آکا موضوع اولدینی جهتله « حقیقت » اولور . بر مناسبت ملاحظه اولنمقسزین چوجقلره وضع اولنان اسمار کی .

اما وضع و علاقه اولنمقسزین بر لفظک معنای موضوع لهندن بشقه بر معناده استعمالی صحیح اولماز . مکرکه غلط اوله رق استعمال اوله . نته کیم : بر کتابه اشارت اولنه رق « طوت شو اتی » دنیلدیکی کی .

و بر لفظ بلا وضع بر علاقه یه مبنی موضوع لهک غیری بر معناده مستعمل اولدینی حالدہ اگر موضوع لهک اراده سنه مانع قرینه بولنماز ایسه : « کنایه » دنیلور . و اول وجهله قرینه مانعه بولنور ایسه : « مجاز » دنیلور . و بعضاً مقید اوله رق : « مجاز لغوی »



دخی دنیلور، که : «مجاز عقلی» مقابلی اولور.

مجاز عقلی اسنادده «مجاز» دیمکدر. اما علی الاطلاق «مجاز» لفظی ذکر اولندیغی حالده «مجاز لغوی» مراد اولور. ایشته بونک علاقه سی مشابیهت ایسه : «استعاره» و بشقه بر مناسبت ایسه : «مجاز مرسل» دنیلور.

بونلرک هر بری بر رقصده بیان اولنه جقدر. و «تشبیه» بین الادبا کثیر الاستعمال اولان استعاره نک منبی علیی اولدقدن بشقه تشبیهاتده پک چوق لطائف بیانییه بولمغله ادبایک آت اویناندقلری بر میدان مسابقه در. بناء علیه تشبیه ایچون دخی بر فصل مخصوص یازیله جقدر. من الله توفیق.

علمای بیانییه بونده متفقلدر، که مجاز وکنایه حقیقتدن واستعاره تشبیهدن ابلغدر.

## فصل اول

مجاز عقلی بیاننده در

«مجاز عقلی» بر فعلی ماهو لهنه، یعنی: عند المتکلم حتی اولان ملابسنه اسناد ایتیموبده ماهو لهک غیری اولان ملابسنه اسناد ایتیمکدر.

فعله فاعلی ملابس اولدیغی کبی زمان و مکان و سببی دخی ملابس اولور. و بونلرک فعله ملابسده فاعلی ایله اشتراکلی

مجاز عقلینک علاقه سیدر؛ فقط بونده دخی قرینه مانعه بولنمق شرطدر.  
مثلاً: برمتدین کیمسه: «موسم بهار اوتلری انبات ایلدی»  
دیدکده «مجاز عقلی» اولور؛ زیرا آنک عندنده اوتلری انبات  
ایدن باری تعالی حضر تلیدر، فقط وقتی بهار اولمغله صانکه  
اوتلری اول موسم انبات ایدیور کبی تخیل ایده رک «انبات»  
فعلنی زمانه اسناد ایلر. اما بوسوزی بردهری سویلمش اولسه  
«مجاز» اولیوب «حقیقت» اولور.

مجاز عقلینک یا ایکی طرفی حقیقت و یا ایکی سیده مجاز لغوی،  
یا خود بری: حقیقت، دیگری: مجاز لغوی اولور. نته کیم: مثال  
مذکورده ایکی طرفی دخی حقیقتدر. و: «زمانک نوجوانلغی  
بری احیا ایلدی.» دیدیکمزده ایکی طرفی دخی مجاز اولور؛  
چونکه نوجوانلق انسانک حرارت غریزه سی زیاده و قوی  
اولمقدن عبارت اولدینی حالد بوراده مجازاً «قوه نامیه نک  
زدیادی» معناسنده مستعملدر. حقیقه: «احیا» دخی: «حیات  
ویرمک» معناسنه اولوب حس و حرکت ارادیه یی مقتضی و بدن  
و روحه محتاج اولور؛ لیکن بوراده مجازاً: «قوه نامیه یی بالتهمیج  
نواع نباتات ایله یره حسن و رونق ویرمک» معناسنده مستعملدر.  
«موسم بهار یری احیا ایتدی» دیدیکمزده مسند الیه طرفی  
«حقیقت»، مسند طرفی «مجاز» اولور. و: «زمانک نوجوانلغی  
وتلری انبات ایلدی» دیدیکمزده مسند الیه «مجاز»، مسند  
«حقیقت» اولور.

كذلك « سردار اکرم دشمنی منہزم ایتدی » دیدیکمزد،  
طرفینی حقیقت اولدینی حالدہ « مجاز عقلی » اولور؛ چونکہ  
حقیقت حالدہ دشمنی منہزم ایدن سردارک عسکریدر،  
کندوسی آمر ومدبردر؛ فقط بوفعلده دخل عظیمی اولدیغندن  
اول فعل سینه اسناد قیلمدن اوله رق آکا اسناد اولور.  
« محبتکز بنی بورایه قدر کتوردی » و « ملاقاتکز بکا  
مسرت ویردی » جمله لری دخی بوقیلمدنر .

« فلان آدم عین عدالتدر » ، یاخود: « فضیلت مجسمه در »  
و یاخود: « فضیلت اودر » جمله لری دخی كذلك « مجاز عقلی »  
قیلمدنر؛ چونکہ عدالت اول آدمک ایشلدیکی ایشله محمول  
ومسند اولور؛ ذاته حمل واسناد اولنه ماز؛ فقط چوق فضیلت  
ایلدیکی جهتله کویا عدالت تجسم ایتمش کی تخیل اولنه رق آکا  
اسناد اولنور .

— اگرچه بومثلو ترکییلرده مضاف محذوفدر؛ یعنی: « اهل  
فضیلت » یا: « صاحب عدالت » دیو تأویل اولنمق دخی قابل  
ایسه ده بوتقدیرجه مطلوب اولان مبالغه فوت اولوب عادی  
سوز حکمنه کیرر .

### تذیل

بروجه بالامضاف حذف اولنوبده مضاف الیه آنک مقامنه  
اقامه اولندیغی حالدہ: « مجاز حذفی » دینلور. یرینه کوره بودخی  
بر طریق مسلو کدر؛ فقط متکلمک غرضنه عائد بر مسلو کدر .



نته کیم: برشیئی اوکرنمک ایچون: «اهل قریه دن صور»  
 دینله جک یرده: «قریه دن صور» دینلسه «مجاز حذفی» اولور.  
 اما برکیمسه خراب و اهاالیسی نایاب اولان برقریه نك اوکندن  
 چکر ایکن نصیح و ایقاپ یولنده رفیقنه، یاخود عبرت و تنبیط  
 یولنده کندو کندویه: «شو قریه یه صورکه اهاالیسی نه اولدی»  
 دیسه مجاز حذفی یه حمل اولنه ماز.

کذلک بروجه بالا «فلان آدم فضیلتدر» دینلسه، مبالغه  
 حصولی ایچون مجاز عقلی یه حمل اولنمق مناسب اولماز.

## فصل ثانی

مجاز مرسل بیانده در

«مجاز مرسل» معنای موضوع لهک اراده سنه مانع قرینه  
 اولدینی حالد مشابیه تدن بشقه برعلاقه یه مبنی معنای موضوع  
 لهک غیرایسنده مستعمل اولان لفظدر.

«علاقه» موضوع لهک غیری اولان معنائک معنای موضوع  
 لهه ذهنده فی الجمله لزوم و اتصالیدر. یعنی: بومعنای حقیقیدن  
 اول معنای مجازی یه ذهنک انتقالی مصحح اولان برمناسبتدر.  
 لسان عثمانیده مشابیه تدن بشقه مشهور اولان علاقهلر  
 شونلر در: «آیت»، «مظهریت»، «حلول»، «سببیت»، «جزئیت»،  
 «عموم»، «اطلاق»، «کونیت»، «اولیت».

«آلیت» معنای حقیقینک معنای مجازی به آلت اولمسیدر .  
 نته کیم : آلت تکلم اولان عضو معلومه موضوع : « لسان »  
 لفظی لغت معناسنده استعمال اولنور . و : « لسان عرب » ،  
 « لسان ترك » دینلور .

«مظهریت» معنای حقیقینک معنای مجازی به محل ظهور  
 اولمسیدر . نته کیم : « قول » قوت و قدرتک محل ظهوری  
 اولدینندن « قدرت » معناسنده استعمال اولنور و « سنک قولک  
 اوزوند » دینلور .

«حلول» معنای حقیقی ایله معنای مجازیدن بری دیگره  
 محل اولمقدر . مثلاً : « منغلی یاق » دینلور و ذکر محل واراده  
 حال طریقيله « ایچنده کی کور » اراده اولنور . « بو آتشی اوته کی  
 اوطه یه کوتور » دینلور و ذکر حال واراده محل طریقيله « ایچنده  
 آتش اولان منغل » مراد اولنور .

«سببیت» معنای حقیقی ایله معنای مجازیدن بری دیگره  
 سبب اولمقدر . نته کیم : « برکت یاغیور دینلور » و ذکر سبب  
 واراده سبب قبیلندن اوله رق برکتدن « یاغیور » قصد اولنور .  
 « آتش باصدی » دینلور و سبب و علت اولان آتشدن « حرارت »  
 قصد اولنور .

«جزئیت» معنای حقیقی ایله معنای مجازیدن بری دیگرینک  
 جزئی اولمقدر . نته کیم : ذکر جزء واراده کل قبیلندن اوله رق :  
 « طرناغمی کسدم » ، « صقالی کسدردم » دینور .

«عموم» معنای حقیقی ایله معنای مجازیدن بری دیگرندن  
 اعم اولمقدرد. نته کیم: «حیوان» دینلوبده خصوصیت وجهله  
 «آت» اراده اولنور. اما عامک خاص ضمنتده تحقیقی اعتباریله  
 برفردی مراد اولدینی حالده «حقیقت» اولور. مثلاً: «بر  
 حیوان کوردم» دینلدکده حیوان افرادندن برفردی ضمنتده  
 تحقیقی اعتباریله معنای موضوع لهنده استعمال اولمغله «حقیقت»  
 اولوب «مجاز» اولماز. *عالم، ارعالم اولمغله*  
 «اطلاق» معنای حقیقی ایله معنای مجازیدن برینک «مطلق»  
 ودیکرینک «مقید» اولمسیدر.

«کونیت» بر شئی حال سابقک اسمیله تسمیه ایتمکدر.  
 نته کیم: «یتیملره ماللرینی ویریکز که سن رشده بالغ اولدیلر»  
 دینلور و «مقدما یتیم اولان یکتیلره ایتام صندوقلرنده محفوظ  
 اولان ماللرینی ویریکز» دیمک اولور.

«اولیت» بر شئی صکره بولنه جنی حالک اسمیله تسمیه  
 ایتمکدر. نته کیم: «آتش یاق» دینلور و «آتش اوله جق  
 کموری یاق!» دیمک اولور. کذلک «بغدایلر بتدی» دینلور  
 و «بغدا ی اوله جق اکیئلر بتدی» معناسی اراده اولنور.

«مجاز مرسل» بعضاً دخی لفظ مرکب اولور. نته کیم:  
 «اقرانم منقرض اولدی». «قدریمی بیلن قالمدی» دینلور. وسبیت  
 علاقه سیله «محزونم، مکدرم» معناسی قصد اولنور. صیغ عقود



کبی « انشا » معناسنده مستعمل اولان سائر « جمله خبریه له دخی بوقییلنددر .

ذکر اولان علاقہ لر بعضاً مشابہت ایله مجتمع اولور. بناءً علی برلفظ برجہتله « مجاز مرسل » و دیگر وجهتله « استعاره » اولور مثلاً : « آنک حالی بویله سویلیمور » دینلد کده سویلمکده « دلالت » معناسی مراد اولور و سویلمنک دلالتہ سبب اولدیغی ملاحظہ اولنور سه : « مجاز مرسل » اولور و اگر افهام مراد دلالتک نقطه تشبیهی ملاحظہ اولنور سه : « استعاره » اولنور

## فصل ثالث

تشبیه بیاننده در

« تشبیه » بر شئیہ مزید اختصاص و تعلقی اولان وصفده دیگر شیئک مشارکت و مماثلتہ دلالت ایتمکدر .

بوایکی شی تشبیهک طرفینیدر، که بری : « مشبه » ، دیگرى « مشبه به » در . وایکینسک مشارک اولدقلى وصفه : « وجه تشبیه » و « وجه شبه » دنیلور. ارکان تشبیه درتدر : « مشبه » « مشبه به » ، « وجه شبه » ، « ادات تشبیه » در .

لسان ترکیده ادات تشبیه « کبی » حرفیدر. و بعضاً بومقامده « صانکه » و « کویا » کبی لفظلر قوللانیلور .

تشبیهده طرفینک ایکیسی دخی مذکور اولق شرطدر

بررسی مطوی اولورایسه : « استعاره » اولور ؛ نه کیم : تفصیلی  
فصل مخصوصده کلور .

اما طرفیندن بری قرینه یه بناء حذف اولنور ایسه مذکور  
حکمنده اولمغله یه تشبیه قیلندن اولور . مثلاً : « فلان نصلدر ؟ »  
دین کیمسه یه جواباً : « آرسلاندر . » دینلده کده : « او کیمسه آرسلان  
کیدر » دیمک اوله رق « تشبیه » قیلندن اولوب « استعاره » اولماز .  
« وجه شبه » مذکور اولور ایسه « تشبیه مفصل » دینلور .  
ومتروک اولور ایسه : « تشبیه مجمل » دینلور و مبالغه یی مفید  
اولور . مثلاً : « زید شجاعته آرسلان کیدر » جمله سنه نسبتله  
« زید آرسلان کیدر » دییلده کده وجه شبهک : « شجاعت »  
اولدینی ظاهر در . و بعضاً خفی اولوب آتی آنجق خواص آکلار .

در امر تو امکان تغیر نهفتند

کویکه مثالی ز قضا و قدر آمد

بیت فارسیسنده اولدینی کی

ینه تشبیه مجملده بعضاً طرفیندن برینک « یا خود ایکسینک  
وجه شبهی اشعار ایدن وصفی ذکر اولنور .  
نه کیم :

مسافات حیاتی قطع ایچ و ن کردونه مهره

سپهرک مهر و ماهی چرخ ایشی ایکی تکرلکدر

بیتده « عمر » عربیه تشبیه اولدینی کی « مهر و ماه » دخی ایکی

تکرار که تشبیه اولنوب دوز، مصمت و مدور اولق دخی «وجه شبه» در که «چرخ ایشی» وصفی آنی اشعار ایدر.

عاقبت کوکلم اسیر ایتدک او کیسه مولرله سن  
هی نه جادوسین، که آتش باغلاتدک مولرله سن

بیتی دخی بوقیلندندر، که خارق العاده ایش کورمک «وجه شبه» اولوب «یانار آتش کی اولان کوکلی مولرله باغلامق» وصفی دخی آنی اشعار ایلر.

وجه شبهده اتم و اشهر اولان طرف «شبهه به» قیلنور.  
بهادر آدمی آرسلانه و حجتی شمسه تشبیه کی.

بعضاً مبالغه ایچون امر بالعکس اولور. و «شبهه به» قیلنان طرفک اتمیتی ایهام ایدیلور. بوا یسه ادعائی براتمیتدر. ایشه بوکا «تشبیه مقلوب» دینلور. آرسلانی بر بهادره، شمسی حجت باهره یه تشبیه کی.

غنبر آمیز اسرار نسیم صبا

عجبا یار کا کلنجی طرار

بیتی بوقیلندندر، که «بوی» غنبره، «شمیم» کا کل یاره تشبیه اولنمشدر.

الحاصل، کرب حقیقه، کرب ادعاء وجه شبهده اتم و اشهر اولان طرف «شبهه به» قیلنور و ناقص اولان طرف «شبهه» قیلنور آکا اطلاق اولنور.

بیتی دخی بوقیلندندر



اما ایکی شینک برامرده جمعی قصد اولنور ایسه تشبیهدن  
صرف نظر اولنهرق « تشابه » و « تساوی » یولنه کیدیلور .

سرمو فرق یوقدر بینمزده زلف دلبرله  
سیه بخت، پریشان روز کاررز، خانه بردوشز

بیئیه :

بیلمز اولدم ساقیا ! درد فراق یار ایله  
میمیدر بویا سرشک چشم کریانمیدر ؟

بیئیده اولدینی کی .

طرفینک وجه شهیده اشتراکی یا « تحقیق »، یاخود « تخیلی »  
اولور . مثلاً: بر بهادر آدمی شجاعته آرسلا نه تشبیه ایتدی کمزده  
آنلرک شجاعته اشتراکلی « تحقیق » اولور؛ زیرا « شجاعت »  
ایکیسند دخی موجود و محققدر . اما عاشقک محققی سیاهلقده  
زلف یاره تشبیه اولدقدن آنلرک سیاهلقده اشتراکلی « تخیلی »  
اولور؛ زیرا سیاهلقک مشهده وجودی محقق اولیوب بلکه  
مخیل و مأولدر؛ چونکه بخت منحوسک و کدرلی کونلرک سیاهلق  
ایله توصیفی مشهور و شایع اولمشدر . نته کیم: « آق آقچه قره  
کون ایچوندر » دینلور .

« وجه شبه » بعضاً امر واحد اولور . یوزک حرته کله ،  
وبر آدمک جرأته آرسلا نه و علمک هدایتده نوره تشبیه کی .

و بعضاً متعدد اولور . بر قوشك حدت نظر و كمال حذرده  
غرابه، و انسانك حسن طلعت و نباهت شانده شمسه تشبیهی كی .  
بو صورتلرده طرفین دخی بعضاً « مفرد مطلق » اولور .  
امثله سابقده اولدینی كی .

و بعضاً « مفرد مقید » اولور . غره فرسی بیاض صبحه  
تشبیه كی، كه بر منیرك آندن زیاده اولان بر امر مظلم ایچنده  
ظهوری وجه شهیدر .

و بعضاً « وجه شبه » واحد حكمنده مركب، یعنی : متعدد  
شیلردن منتزع بر هیئت و کیفیت اولور .  
بو صورتده طرفین دخی بعضاً مفرد و بعضاً اول وجهله  
مركب، یعنی : برر هیئت منتزعه اولور .  
نفعینك آت مدحنده اولان :

جهان سرعته کویا فلکده کاسه سبی

سرمیخی ثوابت نعل زریندر یکی آبی

یقتده اولدینی كی، كه آنك طرناغی « مشبه » ، و فلك « مشبه به »  
اولوب ایکیسی دخی مفرددر . بر مقعر جرمك اطرافنده كچوك  
پارلاق جرملر ایله بر شكل مقوسدن منتزع اولان هیئت دخی  
« وجه شبه » در .

مؤلفك :

كمش سروری تماشا ایتسون اول بحر اشكده

کوزمده چوق خیال قد سیم اندامی قالمشدر

ییتی بو قیلندردر .

بویله مرکبک مرکبه تشبیهی بعضاً بر صورتده اولور ، که طرفینک اجزاسی دخی یکدیگره تشبیه اولنه بیلیر ایسهده اصل لطافت وحسن تأثیر هیئته تشبیهنده اولمغله اجزاتک یکدیگره تشبیهی مقصد اصلی اولماز. سالف الذکر مثالدرده اولدینی کی . بعضاً بر صورتده اولور که اجزاتک یکدیگره تشبیهنده حسن واطافت بولماز .

نته کیم : «مشری» نک آرقه سننده «مریخ» ک کورنشی بر امیرک اوکنده مشعله ایله ضیافتدن عودت ایدیشه تشبیه اولندقدده هیئت منتزعه نک هیئت منتزعه یه تشبیهی مستحسن اولور ایسهده مریخک رأساً ضیافتدن عودت ایدن امیره تشبیهی چندان مستحسن اولماز .

کذلک فضوائینک :

سبزه اوزره کزدربر کل بر کنی بادصبا  
صانکه سبزه آسمندر کوب سیار کل

بیتمده : ورق کلک سبزه اوزره سیرندن منتزع اولان هیئتی کوکده کوکبک سیرندن منتزع اولان هیئته تشبیهی ، مستحسن ایسهده منفرداً سبزه نک گوگه ، کلک کوکبه تشبیهی کوزل اولماز .

احاطه ایتدی تن زردی سرشک کدر  
میان جویده قالدیم مثال نیلوفر

یتی دخی بوقیلدندر ، که هیئت منتزعه نک هیئت منتزعه یه تشبیهی مستحسن ایسهده یالکیز تن زردک نیلوفره تشبیهی چندان مستحسن دکلدر .



بعضاً ایکی ضدك ضدیتده اشتراک برینه بناءً نفس تضاددن  
وجه شبه انتزاع اولنه رق تملیح یاتمکم واسطه سیمله تناسب  
منزله سنه تنزیل قیلنور. نته کیم: مزاج و لطیفه سیاقنده، یا خود استهزا  
مقامنده قور قاق بر آدم حقنده: «آرسلان کیدر» و بخیل کیمسه  
حقنده: «حانم کیدر» دینلور.

تشبیهك طرفینی بعضاً متعدد اولور. شویله که: یا مشبهلر  
بر برینه و مشبه بهلر دخی آیروجه بر برینه مربوط اوله رق  
ایراد اولنور لر. ایشته بوکا «تشبیه ملفوف» دینلور.

حسد قلب عدو لطف ایله اولماز زائل

سنکده مضر اولان آتسه آب ایتمز اثر

ییتده اولدانی کبی که قلب عدو طاشه، حسد آتسه و لطف  
صویه تشبیه اولنمشدر.

پاک طینت گوشه غربتده خوار اولسونمی هیچ

کوهر آغوش صدقندن دور اولور قیمتلنور

بیتیمه:

یار ایچون اغیاره منت ایتدیکم عیب ایله

باغبان برکل ایچون بیک خاره خدمتکار اولور

بیتی دخی بوقبیلدندر.

یا خود هر مشبه به، کندو مشبهك یاننده کتوریلور. بوکا  
دخی «تشبیه مفروق» دینلور. «صاچی سنبل، کوزی نرکس،  
قدی سرو» کبی.

وا کر یالکنز مشبه به متعدد اولور ایسه «تشبیه جمع» دینلور.

بخت قیسی ظلمت لیلی جمال لیلی  
باشنه جمع ایلیوب اول شوخ کیسو قویعش آد

بیتمده اولدینی کبی .

دیلله اوغرادیم درده بن بو عالمده

نه بلبل اوغراد ی نه طوطی شکر گفتار

بیتی دخی بو قییلندر .

وجه شبه اعتباریله تشبیه ایکی قسمه تقسیم اولور. شویله که:

«وجه شبه» اگر تدقیق نظره محتاج اولمق سزین بادی رأیده

ظاهر اولور ایسه: «تشبیه قریب مبتدل»، و خلاقی تقدیرنده:

«تشبیه بعید غریب» دینلور .

مثلاً: شمسک استداره واستارده مدور آینه یه تشبیهی

«قریب مبتدل» دره اما آخشام اوستی شمسک ید مرتعشده کی

آینه یه تشبیهی «بعید غریب» در، که بونده وجه شبه هیئت

منتزعه در؛ یعنی: مستدیر و مستیر اولان حرمدہ ضیانک حرکت

سریعه سی و صانکه دائره سنک اطرافنه طاشاجق کبی کورنمی

خصوصاً لرندن منتزع اولان هیئت و کیفیتدر. بونده تفصیل

بولمغله بادی رأیده ظاهر اولیوب تأمله محتاج اولور .

کذلک روزکار ایله آشاغی یوقار و تمایل ایدن قیرمزی

شقایق زبرجددن مصنوع قارغیلر اوزرینه آچیلمش یاقوتدن

پیراقلره تشبیه ایتدی کمزده: «بعید غریب» اولور، که بونده دخی

«وجه شبه» بر هیئت منتزعه خیالیه در .

و كذلك اوق دمرنلری انیاب اغواله تشبیه اولندقدده وجه شبه «وهمی» اولمغله «بعید غریب» اولور. و بعضاً «قریب مبتدل» ی ابتدالدن تخلص ایده جک وجهله تصرف اولنور .

ای آفتاب ! یار ایله دعوای حسنی قور  
رفع نقاب ایدوب سنی بر کون حجاب قور  
بیتنده اولدینی کی، که وجه حسنک آفتابه تشبیهی «قریب مبتدل»  
اولدینی حالده: «رفع نقاب» ایله: «حجاب» سوزی آنی ابتدالدن  
جیقار مشدر . تشبیهدن غرض اکثریا مشبهه عائد اولور .  
بودخی یا مشبهک حالی بیاندر، یعنی: نه حال و صفته اولدینی  
تعریفدر . بو صورتده مشبهه بهک وجه شبه ایله اعرف واشهر  
اولسی لازمدر . بر آنک نه رنگده اولدینی تعریف ایچون رنگی  
معلوم اولان آته تشبیه اولمنسی کی .

سیاه بخت و پریشان و خانه بردوشز

بو روز کارده مانند طره دلدار

بیتی دخی بوقبیلنددر .

یا مشبهک مقدار حالی بیاندر، یعنی: حال و صفتهک ضعف  
وقوتجه و نقصان و زیادهجه درجه و مقدارینی تعریفدر . بو صورتده  
دخی مشبهه بهک وجه شبه ایله اعرف اولسی و فقط درجه  
و مقدارجه متساوی اولملری لازمدر .

نته کیم: بر شیدک مقدار صفرتی بیان ایچون لیمونه، یاخود  
کهر بایه تشبیه اولنور . یاخود «قنار به صاریسی» دیو تعریف قیلنور .



موبو دقتلر ایتدم قیل قدر فرق ایتدم  
قاسلرک بالله بکم دوشکده کی سموردن

. بیتی دخی بو قبیلدندر .

ویا سامعک ذهن و خیالنده مشهک حال و شانی تقریر  
و نقویه در .

بو صورتده مشبههک وجه شبهده هم اعرف، هم اتم اولمسی  
لازمدر. بو دخی اکثریا معقولی محسوسه تشبیه ایله اولور، که  
انسانک محسوس ایله الفتی و طبیعتک آکا میلانی زیاده اولدیغندن  
معقول آکا تشبیه ایله خیالده تجسم ایتدیریلور . نته کیم: سعی  
و عملندن فائده کورمین کمنه حقنده: «بوزاوستنه یازویازار» دینور.

کاسه فغفور ابریز اولسه هیچ ویرمن صدا  
ثروت افزایش بولنجه اغنیا خسته لنور

. بیتی دخی بو قبیلدندر .

یاخود وقوعی استبعاد اولنان حکمک دیگر حکمه تشبیه  
ایله امکان وقوعی بیاندر. بو صورتده مشبههک معروف و مسلم  
اولمسی لازم کلور .

امتیاز ثابت و سیار مشکلدر خیال

ظن ایدر سکان کشتی ساحل دریا بورر

بیتمده اولدینی کبی، که ثابت و سیار مشاهداتدن اولمغله یکدیگدن  
تمیز اولناملری مستبعد و امکانسنز بر حکم کبی کورندیکی حالد  
مصرع ثانی ایله بیان و اثبات اولمشدر .

چراغک حسنی انکار ایدنلر روز روشننده

سمزار ایچره کورسونلر فروغ شمع کلناری

یتی دخی بوقیلدندر . یاخود مشبهی سامعک ذهنده ترین  
وتحسیندر . بوصورته دخی مشبه بهک حکمی یعنی : وجه شبهک  
آکا ثبوتی معروف و مسلم اولق لازم کلور .

وصف دندانی که دل محزون سویلر  
سویلز سویلز اما در مکنون سویلر

بیتنده اولدینی کبی، که دندانی «درومکنوز» تشبیه ایله تحسین  
قلمشدر .

نسیم اول دکلو نازک طرح ایدر آب اوزره امواجی  
که لوح سیمه استاد ایده من اوله قلمکاری  
یتی دخی بوقیلدندر .

ویانقییحددر . وبونده دخی مشبه بهک حکمی معروف و مسلم  
اولق لازمدر . نته کیم : «بال» ی «قوصموغ» تشبیه کبی .  
ویاخود مشبهی بر امر غریبه تشبیه ایله استظرافدر یعنی :  
تعجب اولنه حق بر حاده تحیل ایتدر مکردر . یاوب آتش کسلمش  
اولان کموری مظالغهری آتشدن اولان دریای مسکه تشبیه کبی .  
بوی کل تقطیر اولمش نازک ایشلمش اوجی  
بیری اولمش خوی بیری دستمال اولمش سکا  
یتی دخی بوقیلدندر .

وبعضاً تشبیهدن غرض مشبه به عائد اولور . بودخی ایکی  
نوعدر . نوع اول «تشبیه مقلوب» در، که بالاده بیان اولمشدر .  
نوع ثانی مشبه بهک اهمیتی بیاندر . ایشته بوکا «اظهار  
مطلوب» دنیلیر . قارنی آج اولان کیمسه نک «بدرتابان» ی اشراق

واستدارده «بیاض پیده» به تشبیه ایتسی کبی .  
 ایشه بو اغراضی مفید اولان تشبیهلر مقبول، اولمیانلر  
 مردود اولور .

ادات تشبیه کلنجه : آنک حذفی، مبالغه‌یی مفید اولور .  
 و بوکا : «تشبیه بلیغ» دیلور . مثلاً : «زید آرسلا در» جمله‌سی  
 «زید آرسلان کبدر» جمله‌سندن ده‌ها مبالغه‌لیدر؛ چونکه بونده  
 زید آرسلان تشبیه اولنور؛ آنده ایسه آرسلانک افرادندن  
 بر فرد اولدینی ادعا قیلنور . بوجه‌تله استعاره کبی مبالغه‌یی مفید  
 اولور . شوقدرکه استعاره‌ده بر مرتبه ده‌ها مبالغه بولنور .  
 شوبله‌که استعاره‌ده مشبه‌مشبه‌هک افرادندن اولمق ادعاسی دخی  
 کیر و براغیلهرق آنک افرادندن اولدینی مسلم اعتبار اولنور .  
 مشبه‌هک مشبهه اضافتی دخی تشبیه بلیغ قیلنلندر .

غزال مهر ایدر آورده هر شام و سحر جولان

کهی صحرای مغرب کاه دشت خارستانی

یتنده مشبه‌به اولان غزالک مهره اضافتی کبی .

## فصل رابع

استعاره بیاننده در

«استعاره» مشابَهت علاقه‌سیله و قرینه مانعه‌ایله معنای موضوع

الیهک غیریده مستعمل اولان لفظدر .

وبعضاً مصدر اولهرق مشابَهت علاقه‌سیله «برلفظی معنای



اولمق ایچون بنا ایدیورلر « دینلور، که غایت بر فعله مرتب اولمقده  
عرضه تشبیه اولنه رق «استعاره اصلیه» اولوب اکا تبعاً: «ایچون»  
حرفی دخی «خراب» اولمق فعلنک فاتی اولان مضای خصوصیده  
استعمال اولنه رق «استعاره تبعیه» اولور .

اما علملرده استعاره جاری اولماز. مکرکه بر وصف ایله  
مشتهر اوله رق اسم عام حکمنده اوله. «حاتم» کبی که «جود» ایله  
مشتهر اولدیغندن «حاتم» لفظی بمضاً: «سخی آدم» معناسنه  
مستعار اولور .

شوده معلومک اولسون: استعاره اگر «تشبیه تملیحی»، یا  
«تهکمی» یه مبنی اولور ایسه «استعاره تملیحیه ویا» تهکمییه «دینلور.  
نته کیم: مزاح، یا استهزا مقامنده: «حاتم» دینلورده «برنجیل  
آدم» مراد اولمق کبی .

«استعاره مکنیه» یه کلنجه: برشی ذهنده دیگر شیئه تشبیه  
وارکان تشبیهدن یالکیز مشبه ذکر و تصریح فقط مشبه بهک  
لوازمندن بر شیدنک ذکر بله اول مضمیر ضمیر اولان تشبیه  
رض اولنور ایسه «استعاره مکنیه» اولور. واثباته استعاره  
تخیلییه دیرلر .

«استعاره تخیلییه» دائماً «استعاره مکنیه» نک قرینه سی اوله رق  
آندن منفک اولماز و «مجاز عقلی» قیلندن اولمقله مجاز لغوینک  
اقسامندن عد اولنه ماز .

«استعاره» نک قرینه سندن بشقه مستعار لهک، یا مستعار منهک

ملایمی اولان برشی ذکر اولنماز ایسه: «استعاره مطلقه»  
دینلور. بالاده مذکور مثالدرده اولدینی کبی.

واکر مستعارلهاک ملایمی ذکر اولنور ایسه: «استعاره  
مجرده» دینلور. نته کیم: «بوکون قهوه خانه ده مسلح بر آرسلان  
اوتوره یوردی» دینلد کده قهوه خانه «قرینه» و مسلح «تجرید» اولور.  
واکر مستعار منهک ملایمی ذکر اولنور ایسه: «استعاره  
مرشحه» دینلور. نته کیم: «بر بحر عمیق ایله مباحثه ایتدم»  
دینلد کده مباحثه «بحر» دن «برعالم» اراده اولندیغنه قرینه  
و «عمیق» «ترشیح» اولور.

کذلک: «آنک لسان حالی بویله سویلیور» دینلد کده  
لسانک حاله اضافتی «استعاره تخیلیه» و حالک انسان متکلمه تشبیه  
اولندیغنه «قرینه» و «سویلماک» «ترشیح» اولور.  
کذلک:

لال اولور البت زبان خامه پیچیده موی

قیلجه غمدن طبع ارباب سخن هلتنلور

ییتنده: «خامه» انسان متکلمه تشبیه اولنوب «زبان» ک آکا  
اضافتی تخیلیه وقرینه در. «لال» دخی ترشیحدر.

«ترشیح» تناسی تشبیه مبنی اولمغله مطلقه دن ابلغ اولدینی  
کبی مطلقه دخی مجرده دن ابلغدر.

«استعاره مرکبه» برهیئت منتزعه یه دال اولان عباره در، که

«تشبیه تمثیلی» یه مبنی مشبه اولان هیئت منتزعه ده مستعمل

اولور بونک «وجه شبه» ی دخی مرکب اولدیغندن «استعاره تمثیلیه» دینلور .

نته کیم: بر خصوصده متردد اولان کیمسه حقننده: «بر آدیم ایلرو کیدیور» و «بر آدیم کیرو چکیلیور» دینلور، که اول کیمسه نک برایشی ایشلمکه نیت وهان آندن فراغت ایلمسندن بر هیئت انتزاع اولنوب وبر شخصک بر آدیم ایلرو کیتمسيله بر آدیم کیرو چکلمسندن دخی بر هیئت انتزاع ایله هیئت اولی آکا تشبیه قیلنوب هیئت ثانیه به دال اولان عباره هیئت اولاده استعمال اولنمشدر . «وجه شبه» دخی گاه اقدام و گاه احجامدن مترع اولان هیئتندر .

«استعاره تمثیلیه» نک استعمالی شایع و منتشر اولور ایسه «مثل» اولور. و لسانمزده: «ضرب مثل» دینلور. و: «ضروب امثال» دیو جملنور. «آپاغکی یورغانکه کوره اوزات!» مثلی کبی. وجه شبه اعتباریله استعاره ایکی قسمه تقسیم اولنور . شویله که: اکر وجه شبهی ظاهر اولور ایسه: «استعاره عامیه» و «استعاره مبتدله» دینلور. «رجل شجاع» مفاسنده مستعمل اولان «آرسلان» کبی .

واکر خفی اولور ایسه: استعاره خاصیه «و» استعاره همیه «دینلور» .

«کل رعنا» پی «دایه» یه تشبیه کبی .

و بعضاً «استعاره عامیه» ده بر نوع تصرف ایله «غرائب» حاصل اولور .

ماهه چکدم شب هجران علم شعله آه  
آه کیم اولدی اول ماه خبردار هنوز  
یبتنده اولدینی کبی .

استعاره نك حسن و مقبولیتی متضمن اولدینی تشبیهك فصل تشبیهده بیان اولنان جهات حسننه رعایت اتمکله و استعاره یه من جهة اللفظ تشبیه رایحه سنی آدرما مقله اولور . شوقدرکه تشبیهك الفازه مؤدی اولیه جق مرتبه جلی اولسی دخی لازم کلور . و وجه شبهه پك خفی اولان یرده تشبیه جاری اولور ایسه ده استعاره جائز اولماز .

مثلاً : «فلان آدمک آرسلان کبی آغزی قوقار» دینور ،  
اما : «آغزی قوقار بر انسان کوردم» دیوبده «آرسلان»  
معناسی قصد اولنسه : «لغز» قیلندن معدود اولور . بناء علی  
ذلك هر تشبیه جاری اولان یرده استعاره جاری اولماز .  
و «علم» ایله «نور» و «شبهه» ایله «ظلمت» کبی وجه  
شبهاری قوی اولمقله متحد کبی اولان شیرده استعاره تعین  
ایدوب تشبیه کوزل اولماز .





## فصل خامس

کنایه بیاننده در

«کنایه» لغت عربی شده تصریحک خلافیدر. اصطلاح علم بلاغته اول لفظدرکه معناسنک ملزوم ومتبوعنده استعمال اولنور. و بو ملزوم اولان معنی دهنده آکا لازم اولور.

واشبو معنای مراده دلالت ایدر «قرینه معینه» بولنور؛ فقط معنای حقیقینک اراده سنه مانع اولماز.

و بعضاً مصدر اوله رق اولوجهله لازمی ذکر ایدوبده ملزومی اراده ایتک معناسنده قولالانیلور. و لفظه «مکنی به» و مضایه «مکنی عنه» دینلور.

«مکنی عنه» یاذا ندر. نته کیم: قلبدن کنایه اوله رق «محل حسد» وانساندن کنایه اوله رق «ایکی آیانی اوزرنده یورر، طرناقاری کنش بر حیوان» دینلور.

جوشش اشکه دل پر خون بر مجرا ایکی

مصرعی دخی بوقیلندبر، که «مجرا» بوراده «کوزدن» کنایه دره. یاخود «صفت» در. نته کیم: «کریم» و «سخی» معناسندن کنایه اوله رق: «قبوسی آچیق»، «سفره سی میدانده» و «ایله» معناسنه اوله رق «قبا قولاق»، «قالین قافالو» دینلور.

حسام وار نم؛ قصاب ایله قانی بجاقلی یز

مصرعی دخی بوقیلندبرکه بوراده: «قانی بجاقلی» «خضم الد»

دیمکدر یا خود «نسبت» در یعنی: صفتی موصوفه اثباتدر. نته کیم:

صراردی بکزی حسدن بنله یاری کوروب

رقیب روسیه بر غریب دنک اولدی

بیتی بوقیلنددر، که «بکزی صراردی» «مکدر اولدی» دیمکدر  
کنایه در .

عباره کنایه اگر صفات موصوفی مذکور، یا مقدر اولماز  
ایسه «تعریض» قیلندن اولور .

«تعریض» برجتهی کوستروبده دیگر جتهی قصد ایتمکدر.

ننه کیم: شوکا بوکا بد معامله ایدن بر شخصک یاننده: «انسان

کامل آنجق ناسه حسن معامله ایدن کیمسه در» دیرسین و «سن

انسان کامل دکلین» دیمکی قصد ایدرسین . موصوف اولان

مخاطب ایسه عبارده «مذکور» اولدینی کی «مخدوف» دخی دکلدر.

«کنایه» تلوح، رمز، ایما و اشارت قسملرینه دخی تقسیم اولنور.

شوبله که: اگر لازم ایله ملزوم آرمه ننده واسطه لر وق

اولور ایسه: «تلوح» دینلور. نته کیم: «رمضانده آنک مطبخنده

یومیه شوقدر چکی اودون صرف اولنور» دینلدر که بو

عبارده دن «مطبخنده چوق یمک پیشدیکنه» و آندن «اکله نک

ومسافرینک کثرتنه» و آندن صاحب خانک «مضیاف و کریم»

اولدیغنه انتقال اولنور .

واکر واسطه آز اولوبده لزومده خفا اولور ایسه «رمز»

دینلور . نته کیم : «قالین قفالو» ترکیبندن «ایله» معناسنه انتقال برآز فکر ایله حاصل اولور.

واکر لزومده خفا دخی بولماز ایسه «ایما و اشارت دینلور . نته کیم : «لطف و کرم آنک خانه سنده در» دینلور . و : «صاحب خانه اهل لطف و کرمدر» دیمک اولور . کذلک : «کرم دیدکاری شی آنک قوناغنه قونمش و اوراده یا صلا نوب قالمش» دینلد کده کرمک اول قوناغنه قونمش اوراده وجودندن کنایه در اوراده وجودی دخی صاحب خانه یه ثبوتندن کنایه اولور و «کرم» بوراده مسافره تشبیه اولنمغله «استعاره مکینه» دخی واردر .



## باب ثالث

صنایع بدیعیه حقننده در

«صنایع بدیعیه» کلام بلیغک وجوه تزیین و تحسینی» دیمک  
اوله رق ایکی قسمه تقسیم اولنور .

قسم اول : معنایه عائد اولان محسناتدر .

قسم ثانی : لفظه عائد اولان محسناتدر .

بو ایکی قسمندن هر بری بمنه تعالی برر فصلده تعریف  
قیلنه جقدر .

صنایع بدیعییه ماحق بعض محسنات اولانله آنلر و برده  
متأخرین شعرا بیننده متداول اولان « صنعت تاریخ » دخی  
بشقه جه برر فصلده ایراد اولنه جقدر .

## فصل اول

محسنات معنویه حقننده در

۱ - «صنعت طباق» که «مطابقت» و «تضاد» دخی دینلور،



بینلرنده تضاد و دیگر وجهله تقابل بوانان شیرلی جمع ایتمکدر.  
 بیاض ایله سیاهی و دوست ایله دشمنی بریرده جمع ایتمک کبی.  
 بارینی کردن احبابه ایدنلر تحمیل  
 نقدراولسه سبکروح اولور البته ثقیل  
 بیتی ایله مؤلفک :

ایدن وصلت دمنده فکر هجران آغلسون کولسون  
 دوکنلر اشک شادی بویله هرآن آغلسون کولسون  
 و :

لی جان تازه لر بیمار جسمی جان آلور جودت  
 اوشوخه دل ویرن دلخسته هرآن آغلسون کولسون  
 بیتلری بوقبیلدندر. طباقک برقسیمیده «مقابله» دنیلان صنعتدر، که  
 متوافق مغالری ایراد ایلدکن صکره صره سیله مقابللری  
 ذکر ایتمکدر .

دله صفای عشقک دیده غمکه پرئم  
 براوده عیش و شادی براوده یأس و ماتم  
 بیتنده اولدینی کبی، که متوافق اولان: «عیش و شادی» ایراد  
 اولدقدن صکره مقابللری اولان: «یأس و ماتم» کتورلمشدر.  
 ۲ — مراعات نظیر — که صنعت تناسب و تلفیق دخی  
 دینلور — متناسب شیرلی جمع ایتمکدر .

«قلم، قلمتراش»؛ «حقه، مقراض»؛ بریرده ذکر ایتمک کبی.  
 کیدرمی سینئه اهل محبتدن خیال یار  
 نیجه منفک اولور صورت هیولای مرایادن

بیتندہ کی «صورت» ایلہ «هیولا» و «مرایا» بوقییلندرد .  
 ابوت ایلہ بنوت کبی متضایفین بر یرده مجنوع اولمدقلری  
 جهتله بینلرنده صنعت طباق بولنور ایسهده متلازم اولدقلری  
 اعتباریله دخی بینلرنده: «مراعات نظیر» واردرد .  
 بعضاً بر لفظک مراد اولمیان معناسی اعتباریله «تناسب» بولنور .  
 ایشته بوکا: «ایهام تناسب» دینلور، که «مراعات نظیر» ملحقدر .  
 نته کیم :

عجمی طوتسه ال اوستنده نرکی دلدار  
 ازلدن آملرنده کوز آشنالنی وار  
 بیتندہ: «کوز آشنالنی» «معارفه» معناسنه اولوب آنجق کوزله  
 معنای لغویسی اعتباریله «نرکسه» مشابہت و مناسبتی معلومدر .

کلزار دهر ایچنده نسیم صبا کبی  
 خلقک اسوب صاوردینی بادهوا ایمش

بیتندہ کی: «هوا» لفظی دخی بوقییلندرد .  
 «تشابه اطراف» صنعتی-که کلامی ابتداسنه مناسب اولان  
 شی ایله ختم ایتمکدر - «مراعات نظیر» دن معدوددر .  
 نته کیم :

خلق ایدر دادوستد بز پر تلاش و بی نصیب  
 چارسوی عالمک بر اوکمدق دلایلز

بیتندہ اولدینی کبی، که: «دادوستد» ایله «چارسو» و «بی نصیب»  
 ایله «اوکمدق دلال» متناسبدر .

ینه بوقییلدن اوله رق برده: «ارصاد» واردرد، که: «تسہیم»

دخی دینلور. بوده بر صنعتدرکه کلامک اولنده برسوزبولوب  
حرف «روی» معلوم اولدینی حالدۀ فقره نك، یاخود بیتک آخرینه  
دلالت ایلر .

نثرده «فقره» شعرده «بیت» منزله سنده اولوب «حرف  
روی» دخی فقره ده، یاخود بیتده تکرر ایدن حرفدر.  
مثلا :

اول مستعین اسم جاللم که دفعة  
فتح کلامه قدرتمی مستعان ویرر

بیتده: «حرف روی» نون اولدینی معلوم اولیجق ، مصرع  
اولده کی: «مستعین» لفظی «مستعان» دلالت ایلر.

۳ - «صنعت مشاکله» برشیئی صحبتده بولندینی برشیئک  
اسمیه ذکر ایتمکدر .

نته کیم: برقوناغه یالین آیاق کلان بر فقیره: «نه درلو یمک  
ایسترسین پیشوره لم» دینلمسی اوزرینه: «بکا برچفت آیاق قابی  
پیشیریکنز» دیمسی کبی .

کذلک آخاج غرس ایتمکده اولان برچفتلک صاحبنه برمسافر  
کلهرک : «حانم طایی کبی غرس ایت» دیوبده: «انعام واحسان  
ایت» معناسنی مراد ایلمسی دخی بوقییلندر .

۴ - «عکس» کلامک برجزئی: دیگر جزئک اوزرینه تقدیم  
اولندقدن صکره بر عکس اوله رق ایراد اولنمقدر . «عادات

السادات العادات « وباری تعالی اولودن دیری و دیریدن اولو  
اخراج ایلر » عبارله لرنده اولدینی کی .

بی نقاب و بانقاب عرض جال ایلردی یا  
که هلالی بدر و که بدری هلال ایلردی یار

بیتی دخی بو قییلنددر .

۵ - « رجوع » بر سوزی سویلد کدن صکره لنکته آنی  
نقض ایتمکدر .

چشم امعان ایله باقدنجه وجود و عدمه  
صحن جنت کورینور آدمه صحرای عدم

غلط ایتدم نه رواجنه تشبیه ایتدی  
بشفه در نعمت آسایش مأوای عدم

طوته لم آنده ده اولمش نعم کونا کون  
اويله محتاج تناولیدر آلا ی عدم

کی .

کوش ایت کوکل بیان میان سویلرم سکا  
یوق بلکه رشنه دل و جان سویلرم سکا

بیتيله :

ایدنلر دور جاناندن بی جاننده بولسونلر  
غلط دیدم دکل جاننده جاناننده بولسونلر

بیتی دخی بو قییلنددر .

۶ - « جمع » متعدد شیلری بر حکمده جمع ایتمکدر .

هشفه دوشمش ابتدا بر نای، بر بن، بر کوکل  
داغ، داغ ابتدا بر نای، بر بن، بر کوکل



و :

هم کوکلی ، هم عقلی ، هم صبری آلهک  
ای شوخ جفا پیشه ! بکا سن نه لر ایتدک  
پیتلرنده اولدینی کبی .

دل آتش ، دیده آتش ، سینه آتش ، روی یار آتش  
مصرای دخی بو قیلنددر .

۷ - « تفریق » ایکی شئیك پیتنده کی فرق و تفاوتی بیان  
ایتمکدر .

مثالی

بلوطك وقت ربیعه کی احسانی  
کریمك یوم سخاده کی احسانه اصلا بکزه ض  
کریمك احسانی بر کیسه آلتون  
بلوطك احسانی بر قطره صو در  
جمله سنده اولدینی کبی .

۸ - « لف و نشر » صنعتی که متعدد شیار ذکر اولندقدن  
صکره هر برینه عائد اولان حکملر ایراد اولنمکدر ، ایکی قسمدر .  
قسم اول « مرتب » قسم ثانی « غیر مرتب » در .  
« لف و نشر مرتب »

سوز عشقك سینه ده سودای زلفك قلبه  
نارددر کلخنده کویا مارددر کنجینه ده

پیتنده اولدینی کبی .

« لف و نشر غیر مرتب »

فکر زلفک دلاوه، تاب سوز عشقک سینه ده

ناردر کلخنده کویا مار در کنجینه ده

پیتنده اولدینی کبی .

۹ - « مذهب » کلامی متکلمینک اصولی وجهله ، یعنی :

طریق برهانی مطلوبه دلیل کتورمکدر .

۱۰ - « حسن تعلیل » بر اعتبار لطیف غیر حقیقی ایله

وصف ایچون بر علت مناسبه ادعا اولنمقدرد ؛ یعنی : نفس

الامرده علتی اولمیان معنی آکا علت اولوق اوزره اعتبار

قلمقدرد .

بو وصف ایکی قسمه منقسم اولور . شویله که : یا بر صفت

نابته اولوبده علتک بیانی قصد اولنور ، ویا ثابت اولوبده

انبائی مراد اولور نتهکیم :

اولدی رخساریکه تقاید ایله کل خار ایله خور

مصراعنده کلک رخسار یاره تقلیدی خار ایله خور اولسنه

حسن تعلیلدر ؛ اما کللرده خار بولنمنسک علت حقیقیه سی

حکمت بالغه صمدانیه ایجابندن اولوب بین الناس معلوم اولان

امور عادیه دن دکلدر .

پریشان اهل عالم آه وافغان ایتدیکمندرد

پریشان اولدیم خلق پریشان ایتدیکمندرد

پیتی دخی بو قیلدندر، که شاعر آه وافغانی خلقک پریشانلغنه

فتح خیبر اوله لی ایلامشدر کیمنسه  
زور بازو ایله بر بویله حصاری تسخیر

بیتی کبی .

واکر عقلاً دخی محال ایسه : « غلو » دینلور . بر قصر  
عالینک ستایشی حقنده نفینک :

دکل مهر و بیاض صبح افنده سیر ایچون سقن  
فلک باش قالدیرنجه خاکه دوشدی تاج ودستاری

بیتی کبی .

« غلو » مقبول اولماز؛ مکرکه صیغه شرطیه یا تشبیه کبی  
بروجهله صحت وامکان راده سنه تقریب و تعدیل قیلنه . نته کیم  
قصیده مذکورهنک :

صانورلر بر کل زر دوزدر بر نطع خاراده  
رخامنده کورنلر عکس خورشید پر انواری

بیتمده : « صانورلر » تعمیری ایله مبالغه صحته تقریب قیلنمشدر .  
وکذا برآت مدحنه دائر اولان :

شکست اتمز حبابن ایتسه جولان روی دریاده  
طوقنسه برقی نعلی نرم ایدرکن سنک خارایی

بیتمده کی : « غلو » دخی فرض اوزرینه مبنی اوله رق سیغه شرطیه  
ایله برمرتبه تعدیل اولنمشدر .

یاخود مکرکه برکوزل خیال بولنه؛ او حالده دخی : « غلو »  
« مستحسن » اولور .

نازی آٲ ایتشدیه بر فواره رسم ایتش خیال  
ایشته اوسودر آتلمش قامتک اولش سنک  
یتنیده اولدینی کبی .

ویا خود «هزل» مقامنده ایراد اولنه؛ اوسالده دخی «غلو»  
«مجاز» اولور .

نته کیم : «نه عجب یارین عشرت ایتکه نیت ایتسه، دوندن  
سرخوش اولورم» دینلدیکی کبی .

بوصورتلردن ماعدا غلورلر مقبول اولماز . هله نفعینک :

بم اول ناظم اندیشه که سمسار قضا

ایده من قیمت عقد در نظم تقدیر

کبی اشنع غلورلی قطعیاً مردود ومنکر در .

مبالغه مقبوله قیلندن عد اولنغه شایان برصنعت دخی :  
بر غرضی تقیضنه بکزر تعبیر ایله تأکید ایلمکدر .

ایشته بونک بر قسمنه : «تأکید المدح بمایشبه الذم» دینور، که  
«ذم یوللو مدح» دیمکدر .

نته کیم : «بوقایجک قصوری یوقدر؛ فقط محاربه لرده چوق  
قوللانلمش اولدیغندن اوزرنده پک چوق قان لکسی وار»  
دینلده اکر قلیجده قان لکسی عیب صاییلور ایسه ایشته  
بو قلیجک اوعیبی واردر؛ لکن قان لکسی قلیجده عیب  
صایيله ماز . اويله ایسه بوقلیجده عیب تصور اولنماز «دیمک  
اوله رق مدحی مؤکد اولور .



حسنه هیچ دیه جک یوق اما  
نکمی اوق کی ایشلر جانه  
بی بی دخی بوقیبلدندر .

دیگر بر قسمنه دخی: «تأکید الذم بما یشبه المدح» دینورکه:  
«مدح یوللو ذم» دیمک اولور . «فلان آدم فاسقدر اما جاهلدر»  
«کنساهنه کیر میه یم؛ اوروج یدیکنی کوردم اما نماز قیلدیغنی  
کوردم» عبارهلری دخی بوقیبلدندر .

۱۲ - «تجاهل العارف» بر نکته یه بناء معلومی غیر معلوم  
سیاقده ایراد ایلمکدر . نته کیم:

بر نهاییجه تبسمده می صیغمز جانا  
سویله بالله دهنگ تا اوقدر تنکمیدر

بیتمده قم جانانک کچوکلکنی مدحده مبالغه ایچون استفهام  
طریقنه کیدلمشدر . كذلك :

شبمیدر بو یاسواد آه پنهانمیدر  
شمع مجلس شعله داغ نمایانمیدر  
بیتمده: «توله» «تخیر» نکته سنه بناء استفهام یولی اختیار ایدلمشدر .  
۱۳ - «ادماج» بر معنایه دیگر معنی تضمین ایتدیرلمکدر . نته کیم:

صدر کده سنی ایلیمه حق دائم و باقی  
هب عالمک ایتدکری شمدی بودعادر

بیتمده شاعرك غرضی ممدوحی اولان صدراعظمه دعادر؛ فقط  
جمله دعائییه آنک اصلاح احوال عالمه سببیتی ایله مدحنی دخی  
تضمین ایللمشدر؛ چونکه عالمک او یله دعا ایتمسی البته فائده لرینه

مبنی اولمق لازم کلوب بو ایسه مدوحك آ کا سیدییتی متضمن اولور .

وبعضاً بو ایکی معنی بر غرضه عاذا اولور . شویله که : بر غرض ایچون سوق و ایراد اولنان معنی ینه اول غرضه دائر اولان بر معنای زاندى مستتبع اولور . ایشته بوکا « استتباع » دخی دینلیر .

نته کیم : « اول بهادرک رؤس اعدا اوزرینه صاعقه سیفی بش بلوت جولان ایتدیرر » ترکیبی اول بهادرک شجاعته مدحنی مفید اولور ؛ فقط بش بلوتدن مراد بش یارماق اولوب یارماقلرک بلوته تشبیهی ایسه ، سیخا و کرم ایله مدحنی دخی مستتبع اولور . حال بو که ایکی معنی بر غرضه ، یعنی مدحه عاذا اولور .

۱۴ - « توجیه » صنعی که « محتمل الضدین » دخی دینلور .

سوزی ایکی مختلف معنایه محتمل اوله رق ایراد ایلیمکدر .

نته کیم : « یک چشم درزی بکا بر جبه دیکمش » کاشکی ایکی کوزیده سیاه اولیدی « دینن کیمسه جبه دن نمون اولوبده درزینک کورر کوزی کبی دیگر کوزینک دخی کورر اولسنی تمنی ایلیمک ، یاخود ناخشنود اولوبده کورر کوزی حقننده بددعا ایتک معنالرینه محتمل اولور .

« توریه » ، که : « ایهام » دخی دینلور . بر لفظک قریب وبعید ایکی معناسی اولوبده قرینه خفیه یه اعتماداً معنای بعیدی اراده اولنمقدرد .

اشمو توریه صنعتی لفظک تعداد معناسنه مبنی اولوق ایلمسه ساه  
 علمای عربیه آنی محسنات معنویه دن عد ایلمشله ؛ لکن  
 توریه بی حاوی اولان عباره بشقه لسانه ترجمه اولنسه اکثریا  
 بو صنعت ضایع اوله جفته نظراً آنی محسنات لفظیه دن عد  
 ایلمک مناسب اولور. مثالاری بروجّه آنی ایراد اولنور.

بیت

کل کولسه دائم آغلسه بلبل مجب دکل  
 زیرا کیمینه آغله دیمشله کیمینه کل

دیگر

میان ناز کی مویه بکزد رسم اگر  
 گروه اهل صفا « اوله در بلی » دیرلر

دیگر

هر یانه بوی کا کلنی تار مار ایدر  
 قالمز صباه ایتدیکی بو روز کاردر

شیخ الاسلام مکی زاده عاصم افندینک وفاتنده وقعه  
 نویس اسعد افندی مشیخته متبی و مترقب ایکن عارف حکمت  
 بک افندی شیخ الاسلام اولدقده اسعد افندینک سویلمش  
 اولدینی :

بو بیت یادکار اولسون جهانیه	تخلفه درونم غمله طولدی
بکا لایق ایکن جاه مشیخت	خدانک حکمتی عارف بک اولدی

قطعه سنده کی حکمت دخی بو قبیله ندر .



## فصل ثانی

### محسنات لفظیه حقنیده در

«صنعت جناس» ایکی لفظك معنای مختلف اولدیغی حالده تافظده تشابه لریدر. بونك قسام عدیده سی واردر. نته کیم:

بروجه آتی تعریف اولنور:

«جناس تام» ایکی لفظك وجوه اربعه ده، یعنی: نوع و عدد و ترتیب حر و فده و هیئتده، یعنی حرکه و سکونده متفق اولملریدر.

«شیر شیر خوار» کبی.

جاهله جاهله رفعتی کلور عالمده  
علم افراز مهارفدر اولان صاحب توغ

و :

باغده می ایچیلوب ناله لر ایلر نیلر  
سسی چیمماز عجبابلبل او یورمی نیلر

و :

اولمه جفایی صائمکه دوراندن اوکرنور  
بی مهر و بی وفائی دور آندن اوکرنور

بیتلرنده کی «جاهله»، «دوراندن» جناسلری دخی بو قییلندر.

اگر وجوه اربعه مذکورده دن یالکیز برنده اختلاف بولنسه، «جناس تام» اولمیوب بشقه براسم ایله تسمیه اولنور.

شویله که: اختلاف اگر هیئتده ایسه: «جناس محرف» دینلور. «جبة البرد جنة البرد» عبارده سننده کی «برد»، «برده



لفظطری کبی که با حرفی اولکیسندده مضمووم وایکنجیسندده  
مفتوحدر .

«جاهل یا فطرط یا مفرط اولور» عبارده سندده کی مفرط و مفر  
دخی بوقییلدندر، که اولکیسی فاء سا کنه وراء مخففه وایکنجیس  
فاء مفتوحه وراء مشدده ایله در .

واختلاف اکر ترتیب حروفده ایسه: «جناس قلب» دینلور  
«روزکار زورکار» کبی .

واختلاف اکر عدد حروفده ایسه «جناس ناقص» دینلور  
ساق ایله مساق کبی .

مؤلف فقیرک بر قصیده سندن :

آسمان پایه ، هاسایه هایون کوکب

مصر اعننه کی: «هما، ایله «هایون» دخی بوقییلدندر. اختلاف

ا کر نو عده ایسه، یعنی: ستجاس لفظطریک یالکیز بر حرفی نو  
مختلف اولوبده بو حرفلر بیننده قرب مخرج بولنورسه: «جناس  
مضارع» دینلور. «دام» ایله «طام» کبی .

اما بینلرنده قرب مخرج بولنماز ایسه: «جناس لاحق

دینلور. «ستار» ایله «سیار» و «ستاره» ایله «سیاره» و «جبة البرد  
و «جنة البرد» عبارده سندده کی «جبه» ایله «جنه» کبی .

قصیده مذکورده دن :

آب لطفکله زمان ایتدی زمینی سیراب

تاب قهرکله قضا دشمنی ایلر تهید

باقی دخی بوقییلدندر .

واختلاف اگر نقطه جهتیه اولورسه: «جناس مصحف»  
دینلور. سوق ایله شوق کی.

مؤلف فقیرک :

لب نکارده بن بنجه پک نشاط ویرر  
که نقطه نقش ایله جودت اولور سراب شراب  
یتی دخی بوقیلدندر.

«صنعت اشتقاق» دخی جناسه ملحقدر. «کاتب» ایله  
مکتوب «قون» ایله «قائل» کی.  
«شبه اشتقاق» صنعتی دخی كذلك جناسه ملحقدر. «خال»  
ایله «خالی» لفظلری کی.

۲ موازنه، فاصله لک وزناً متساوی اولمیریدر.

عالمه جام صفا صوندینی دم با که فلک  
بر قدح صوندی کیم ویرمیه بیک درلو کسل  
تنده کی: «فلک» و «کسل» کی.

«فاصله» نثرده فقره لک، ونظامده مصراع لک صوک کلمه لریدر.  
اگر فاصله دن بشقه دیگر جزو لک جمله سی، یا خود اکثری  
زنناً مقابله لری کی اولور ایسه: «مماثلة» تسمیه اولنور.

مشیر سلطنت عقل مصور

پناه مملکت عدل مجسم

نده اولدینی کی.

۳ - «سجع» فاصله لک بر حرف اوزرینه متوافق اولمیریدر.  
نثرده سجع نظامده قافیه کیدر. و اوچ قسمه منقسمدر.

شیوایه که فاصله لر و زناً مختلف اولور لر ایسه : « مطرف » دینلور .  
 نته کیم : « طلبه : علم بلاغتی ا کمال ایتدیله ، علم حقوقده  
 دخی ایجه کسب کمال ایتدیله ، دیدیکم زده « ا کمال » « کمال » کبی .  
 شعر دن نظیری مؤلفک سالف الذکر قصیده سنک مطالعی اولان :

حمد لله که بکا یاور اولوب بخت سعید  
 ایلدی چرخ ایله سرنامه صلی تجدد

بیتیدر .

واکر فاصله لر و زناً دخی متوافق اولور لر ایسه : « سجع  
 متوازی » دینلور .

نته کیم : قصص انبیانک : « آدن صکره سائر ناس آنلردن  
 اورده دی و نیجه قوملر و صنف صنف انسانلر تورده دی »  
 عباره سنده کی : « اورده دی » ، « تورده دی » کله لری کبی .  
 ینه قصص انبیانک : « گروه مشرکین بر حمله ده اهل اسلامی  
 بتورمک اوزره مدینه سنوره اوزرینه یوریدی ؛ خاق خوف  
 ودهشت یوریدی » عباره سنده کی : « یوریدی » ، « یوریدی »  
 کله لری دخی بوقییلنددر .

شعر دن نظیری دخی :

آفرین ای روز کارک شهنسوار صفدری  
 عرشه آص شمدنکیرو تیغ ثریا جوهری

بیتیدر .

اگر فاصله لرده اولدینی کبی ماقبللرنده کی اجزانک اکثری  
 سجعاً و وزناً مقابللری کبی اولور سه : « سجع مصرع » دینلور .

«فلان افندی زبده امثال واقراندر؛ و برادر سر بلندی  
عمده افاضل واعیاندر» عبارسنده اولدینی کی .

سجع هر حالده کلام بلیغه زینت ویر؛ فقط فاصله لر متحد  
المال اولیوب هر برینک بشقه بشقه مغالری اولق شرطدر .  
والاجرد سجع ایچون برنوع تکرار دیمک اوله جفنه مبنی تطویل  
قیلندن اولور. مثلاً: «بزه پک چوق احسان ایتدی ولطف  
بی پایان ایتدی» دینلسه مقبول اولماز .

۴- «صنعت تشدید»- که «النزام» و «لزوم مالایلزم» دخی دینلور-  
شعرده حرف روینک، ونثرده آنک مقامنه قائم اولان حرفک  
تکراری قافیه وسجع ایچون کافی ایکن آندن فضله برشی النزام  
اولنمقدر .

مثلاً: «کرم» و «وهم» کی کله لرده قافیه وسجع ایچون یالکیز  
میمک تکراری کافی ایکن: «کرام» و «بنام» کی کله لرده میمک  
ماقیلنده کی الفک دخی تکراری النزام اولنورسه «لزوم مالایلزم»  
قیلندن اولور .

براهل همت ار بول ای دل مهجور ار نلردن !  
که اولسون منزل و صلاک یوانی کوستر نلردن  
یتتی بو قیلندیر که آخر کله ده یالکیز نونک تکرار یله قافیه حاصل  
اوله بیلور ایکن درت حرفک دها تکراری النزام اولنمشدر .

خون عاشقه دلا انکشت جانان شاخ شاخ  
کوستر بحر کف قدر تده مرجان شاخ شاخ

یتتی دخی بو قیلندیر .



سامینک دخی بویولده بر مشهور غزلی وارد در، که مطالعی بود در.

جوشش اشکه دل پر خون بر مجرا ایکی

حیف کیم کهر دل مشعون بر در یا ایکی

«محسنات لفظیه» نك اصل حسنی معنی لفظه تابع اولیوب

بلکه لفظك معنایه تابع اولمیدر؛ چونکه معنی طبیعتنه براغیلور

ایسه کندوسنه لایق اولان لفظی ایستر؛ و آنک ایستدیکی

لفظ کتوریلور ایسه لفظ و معنی ایکیسی ده کوزل اولور. اگر

تسجیع ایچون تکلف ایله عباره تصنیع اولنور و معنی لفظه

تابع قیلنور ایسه لفظ و معنی حلیه حسن و قبولدن عاری قالور.

### فصل ثالث

صنایع بدیعیه نك لواحق حقنده در

«تلمیح» بر قصه یه، یا خود بر مثل مشهوره اشارت اولنمقدرد.

نته گیم : سلیمان فهم افندینک :

بزه عرض جمال ایتزمی بلقیس امل آخر

فهیم خاتم داغ محبتله سلیمان

بیتنده [سلیمان] «علیه السلام» ایله [بلقیس] قصه سنه اشارت اولنمشدر.

اختر مطلبم آفاق فلکده طوغماز

کونده بیک شی طوغورر ایله حبلاى عدم

بیتنده: «الليلة حبلى» مثل مشهورینه ایما قیلنمشدر.

تلمیح ده: مقصده دلالت خفی و بسید اولور ایسه «الغاز»  
ملحق اولور و سددن خارج قلور.

«اقتباس»: کلامه قرآن کریمدن، یا خود حدیث شریفدن  
برشی تضمین اولاندور.

مؤلف فقیرک بر بهاریه سندن:

ترانه لب هر جویبار «فاعتبروا»

زبان بلبلك اورادی یا اولی الابصار

بیتنه و دیگر بر بهاریه فارسیه سندن:

شنو ز جو ومن الماء کل شیء حی

شنو ز صوت سبوان ربنا له فور

بیتنه اولدیفی کی.

«تضمین» بر شاعر کیندو شعرینه آخرک شعرندن بر شی

تضمین ابتدا یرمکدر. شو شرطله که غیرک شعرى اولدیغنه تنبیه

اولنه. مکرکه بین الادبا معروف بر شعرایسه تنبیه حاجت قلماز.

نته کیم: نفی بر بهاریه سنک:

بحمدالله زمانکده بقول صبریء شاکر

کریسان فلک مهجور دست آه شکوادر

بیتنه [صبری] نك اسمنی تصریح ایده رک بر مصراعنی تضمین

ایلمشدر.

ایشته میدان هنر! کیتیمه لم شیرازه

مصراع مشهورینی سروری تضمین ایله :

رومده آکه سروری کلیمزنی قارشو  
ایشته میدان هنر ! کیتیمهلم شیرازه

دیدیکی کی .

مؤخرأ فهمی دخی :

حلب آنده ایسه بونده بولنور اندازه  
ایشته میدان هنر کیتیمهلم شیرازه

دیو تضمین ایلمشدر .

كذلك بالاده ذكر اولندیغی اوزره .

فكر زلفك دلد، سوز عشقك سینهدده  
نار در کاخنده کویا مار در کنجینهده

بیٹك مصراع ثانیننی تضمین ایله :

سوز عشقك سینهدده سودای زلفك قلبده  
نار در کاخنده کویا مار در کنجینهده

بیٹی یا پلمشدر .

اما بر شاعر دیگر شاعرك اشعارندن مصراع، یا خود بیت  
کی برشی آلوده کندو شعری کی اعلان ایدر، یا خود بعض  
الفاظنی تبدیل ایله مضمونی چالوده کندو شعرینه قاتار ایسه  
سرقت صاییلور. بوا یسه مذموم و مقدوحدر .

سرقت شعر ایدنه قطع زبان لازمدر  
بویله در شرع بلاغته فتاوی سخن

واکر خلف سلفك شعرینی اخذ و اصلاح ایله آنی دها

اعلا صورتده نظم ایلر ایسه مقبول اولور .

وبعض متشعرین ، که :

فُهیمَا شاعران بو الهوسده قالمیش انصاف

قناعت ایلز مضمونه دیوانی چالار چاربار

مؤداسنجه دیوانلردن بکندیکنی آلوده کندو نامنه اعلان

ایدلر ؛ شعردن معدود اولمدقلری جهتله موضوع بختدن

خارج قالورلر .

وبعضاً ایکی شعرک بر برندن خبری اولمقسنزین بر مصراع ،

یاخود بر بیت ایکسینک دخی خاطرلرینه سنوح ایلز بوکا :

«توارد» دینلوب سرقت صایلماز . هله نارینخلرده بوتوارد چوق

دفعه وقوع بولمشدر . نته کیم فصل آتیده امثله سی ایراد اولنه جقدر .

شعرای عجم بعضاً اشعار عربیه یی کندو شعرلرینه تضمین

ایله «ملمع» طرزنده شعر یاپارلر .

ننه کیم : حافظ شیرازی یزیدک :

ادر کأسا وناولها

الا یا ایها الساقی

بئنی بر مصراع اولق اوزره تضمین ایله :

الا یا ایها الساقی ادر کأسا وناولها

که عشق آسان نمود اول ولی افتاد مشکها

مطلعی سویلمشدر .



« ملمع » بر مصراعی بر لساندن و دیگر مصراعی دیگر  
 لساندن اوله رق نظم اولنان شعر در .

هیچ کیسه دکل سر قدردن آگاه  
 لا حول ولا قوة الا بالله

بیت مشهوری ایله مؤلف فقیرک بر ملمع غزلندن :

جودت اوله لی چشمکه مفتون جانا  
 لانوم له طول ایال بالله

و دیگر بر ملمع غزلندن :

هوای زلفیدر افصای آرزو جودت  
 سواد طره نماید مرشب معراج

بیتلری کی .

عروض فارسی اکثر با عروض عربی به مخالف دوشر .  
 مثلاً: بحر رمل ایله بحر هزج عروض فارسی اصولنجه هریتی  
 بعضاً سکنز و بعضاً آلتیشر جزءدن مرکب اوله رق استعمال  
 اولنور. اما عربیده ایکیمی دخی سکنز جزءدن مرکب اوله رق  
 استعمال اولنماز . بناءً علیه بوجه بالا یزیدک ایکیشر جزءدن  
 مرکب اولان ایکی مصراعندن حافظ شیرازی بر مصراع باعشدور .  
 شعرای روم اوزانده عروض فارسی اصولنه تابع اولدقلرندن  
 لسانزده فارسی ایله ترکیدن « ملمع » شعر سویلمک سهلدر .  
 اما عربی ایله ترکیدن ملمع شعر سویلمک جای نظر و دقتدر .  
 مثلاً: بحر رملدن بر ملمع سویلمه جک اولدیفی حالد هر

مضراعی او چر جزءدن ترکیب اولنور ایسه هم فارسی، هم عربی عروضه توافقی ایلر. واکر دردر جزءدن ترکیب اولنور ایسه عربی عروضه مخالف اولور و شعرای عربدن بری کورسه آنی ناموزون صانور.

مع مافیه ملمع شعرلرده بو مثللو اختلافلر معفودر. اما کاملاً عربجه شعر سویلنه جک اولور ایسه اوزان عربیه توفیق اولمق لازمدر.

بناءً علیه بعض معربینک قصیده طعنانیه کی هریتی سکنر جزءدن مرکب اوله رق بحر رملدن سویلدکاری عربی شعرلره شعرای عرب اشعار عربیه نظریله باقازلر.

بعض متأخرین ادبایالکز مهمل، یعنی: نقطه منحر فلردن شعر سویلمک کی صنعتلر اختراع ایتشلردر. نته کیم:

اولکه اوله هوادار مدح اهل کرم

اولور عرائس الهام کردکاره حرم

بیتنده هیج نقطه لی حرف یوقدر.

بوده بر هنردر. لکن اسلاف ادبا بومثللو خطه عائد اولان

صنعتلری محسنات بدیعه دن عد ایلمامشلدردر.

شعراى متأخریندن بعضیلری «الغاز» و «تعمیه» یولنده

منظوم کلامار سویلمشلدردر. لکن بونار دخی محسنات بدیعه دن معدود دکلدردر.

«الغاز» لغز سویامکدر. «لغز» بیامجه دیمکدر، که برشیدک  
علائم و اوصافی ذکر ایله آکا سائر اشیادن متمیز اوله جق  
صورته و رمز یولنده دلالت ایدن کلامدر.

«تعمیه» کلام موزونده برذاتک نامنه رمز وایما ایله دلالت  
ایتمکدر. اول کلامه دخی «معما» دینلیر.

بنده یوق صبر و سکون، سنده وفادن ذره  
ایکی یوقدن نه چیقار، فکر ایده لم بر کره  
بیتمده [نابی] نامه ایما اولنمشدر.

صنعت تاریخ اربابی دخی بر مصراعک حسابجه نقصان، یا  
زیاده سنه رمز وایما ایتمکه «تعمیه» دیرلر.  
نته کیم: فصل آتیده کلور.



## فصل رابع

صنعت تاریخچه دائردر

متأخرین ادبانک اختراع ایتدکلی برده: «صنعت تاریخ»  
واردر، که بروقه بی مشعر اولان مصراعک، یا خود بیتک بحسب  
الجمال عدد حروفی اول وقعه نک تاریخ وقوعنه مصادف اولمسیدر.  
بودخی صنایع بدیعیه دن معدوددر. اوائلده بوصنعت یوق ایدی.

صکره لری بر وقعه یه تاریخ اولمق اوزره برکله ، یاخود بر عباره بولنمق بین الادبا دأب و عادت اولمشدر .

شویله که : ۷۹۱ سنه هجریه سنده فوت اولان حافظ شیرازینک وفاتنه تاریخ اولمق اوزره « خاک مصلی » ترکیبی بولنمشدر ، که ابجد حسابیله عدد حروفی سنه مزبوریه موافقدر .

۸۰۳ سنه سنده تیمورک سیواسی تخریب ایتدیکنه « خراب » کله سی تاریخ دوشمشدر .

و فاتح سلطان محمد خان ثانی حضر تلرینک ۸۵۶ سنه سنده روم ایلی حصارینی بنا ایتدیکنه « بنیان محمد خان » ترکیبی و ۸۵۷ سنه سنده استانبولی فتح ایتدیکنه « بلدة طيبة » عباره شریفه سی و ۸۷۸ سنه سنده اوزون حسنه غلبه سنه [ وینصرک الله نصره عزیرا ] آیت کریمه سی تاریخ واقع اولمشدر .

و ۸۹۸ سنه سنده ملا جامی وفات ایتدکه [ و من دخله کان آمنا ] آکا تاریخ دوشمشدر .

ویاوز سلطان سلیم خان حضر تلرینک ۹۲۲ سنه سنده سلطان غوری یه غلبه سنه تاریخ اولمق اوزره کمال پاشا زاده : « فتح ممالک العرب » عباره سنی بولوب بعده ۹۲۳ سنه سنده دیار مصری فتح ایتدیکنده دخی : « فاتح ممالک العرب » دیمشدر .

ایشته ایتدالری بویله منشور اوله رق تاریخ آرانوب بولنور ایکن ۸۵۰ سنه سنده سلطان محمد خان ثانی حضر تلری برجامع



شریف بنا ایتدکده اول عصرک علمای ادباسندن «قصیده نونیه»  
صاحی مشهور خضر بک :

جامع زید عمر من عمره

مصراعی سویلمش و آندن صکره شعرا منظوم تاریخ بولمغه  
دخی هوس ایلمش ایدی .

واستانبولک تاریخ فتیحی اولمق اوزره :

اهل دین استانبولی آلدی جدال و جنگله

مصراعی سویلنمشیدی .

طقوز یوزسنه هجریه سندن صکره کزیده تاریخلر سویلنمکه  
باشلادی . مثال اوله رق بعضیلری بروجه زیر تحریر اولنور .

اسامی	تاریخلر	سنه
نظمی :	انکروسی منهزم قیلدی سلیمان زمان	۹۳۳
لا اداری :	آصف الله کیردی سلیمان مهری	۹۴۷
لا :	سلیمان ویردی مهرین آصفینه	۹۶۲
شعی :	شاهی احیا ایلدی سلطان رومک جامعی	۹۶۶
امیری :	شاه شد سلطان سلیم کامیاب	۹۷۴
نیازی :	آلدی قبرس آطه سن شاه سلیم	۹۷۸
هاشمی :	سعادتله صفا کلدک افندم	۹۹۰
لا :	اهل سنت منزلی اولدی روان	۹۹۱
لا :	قلعه زاد عمر بانیها	۹۹۱
روحی بغدادی :	صفالر ایلدی صافی جنانه باصدی قدم	۹۹۷

الحاصل خضر بکک آچدیغی چغیر، کیده رک شعرا ایچون  
برشاهراه اولوب وقوعات مهمه ایچون بر مصراع و بعضاً بر بیت  
اولمق اوزره تاریخلر نظم ایلمکه باشلامشلا ایدی. بیک تاریخندن  
صکره بوکا دها زیاده اعتنا ایدلدی. و بروسه علماسندن سالف  
الذکر هاشمی افندی پک کوزل وعایت مصنع تاریخلر سویلیه رک  
و بو بولده سائرینه تقدم ایلیه رک صناعت تاریخره امام اولمشدر.  
بناءً علی ذلک بیک تاریخندن صکره سویلمش اولان تواریخ  
منتخبه دن بر آرمشالر کتوره لم :

اسامی	تواریخ	سنه
لا ادری :	مسجد مستحسن ارکانه	۱۰۰۲
طای :	خان محمد اولدی سلطان جهان	۱۰۰۳
طبی :	ابتدی قدری چای عزم بقا	۱۰۰۴
لا :	کتدی شمی چای دنیادن	۱۰۱۸
هاشمی :	اوق روح اسعد ایچون فاتحه	۱۰۳۰
حاتی :	کیردی آصف الله مهر سلیمان زمان	۱۰۳۵
لا :	چشمه کل عدم چکدی اجل شهلاک	۱۰۴۷
جوری :	جلوس خان محمد ایلدی آسوده دنیایی	۱۰۵۸
:	اوله عقبا ده مقام حنفی بیت جنان	۱۰۶۹
نابی :	دوشدی قنچه حصنه نور محمدی	۱۰۸۳
صدیق :	پادشاه جهان احمد خان	۱۱۱۵
سید وهی :	کلدی مفتاح روان آچدی در امیدی	۱۱۳۷

- وله : همدان کنجه روان فاتحی سلطان احمد ۱۱۳۷  
 رشید : اولدی خان محمود امام المسلمین ۱۱۴۳  
 راغب پاشا : یاپلدی موقعنده جامع الور علی پاشا ۱۱۴۷  
 روحی کایسی : کیجه ساعت ایکیده زلزله بقدی شای ۱۱۷۳  
 سنبلزاده وهی : زلالی وراء النهره دریادن روان اولدی ۱۱۹۵

منوال مشروح اوزره بیک تاریخندن صکره منظوم تاریخ  
 سویلمک صناعتی خلیجه ترقی بولدی و ۱۱۹۳ سنه سنده در سعاده  
 کلان آظنه لی سروری افندی بو صناعتک خرد لرینی بولوب  
 طوغریسی بوفنده استاد کل اولدی . عصرنده سنبلزاده وهی  
 کبی فن شعرده آندن ماهر و خواجه منیب افندی کبی ادیب  
 و متبحر نیجه ذوات وار ایکن فن تاریخده برکیمسه آکا اقران  
 اوله مامشدر .

الحاصل ، سروری بو صناعته اسلاف و اخلافه فائق اولوب  
 یالکز کندو زماننک وقایعنه قناعت ایتیمه رک ازمئه سالفه نک  
 وقایع مهمه سنه دخی کوزل کوزل تاریخلر سویلمشدر . دیوانی  
 مطالعه ایدنلرک معلومیدر .

سروری افندی کرک کندوسنک و کرک اسلاف و معاصری  
 اولان شعرانک تاریخلرندن مقبول و مستحسن اولنلرینی جمع  
 ایله بر مجموعه یه قید ایدوب وفاتنده عزت ملا دخی عصرنده  
 سویلنن تاریخلرک منتخبلرینی بوکا علاوه ایتمشدر . بعده وقعه  
 نویس اسعد افندی دخی انتخاب ایلدیکی تاریخلری آکا قاتمشدر .

حقا که اسلاف شعرا نك اك كز ياه تاريخلريني جامع بر اثر  
بي نظير در .

سروری اول مجموعه بی اصل «تواریخ منتخبه ترکیه» ایچون  
ترتیب ایلمش ایسه ده بعض تواریخ فارسیه و عربیه بی دخی قید  
ایلمشدر. حتی ۱۱۹۴ سنه سنده انشا اولنان حمیدیه کتابخانه سی  
ایچون سویلمش اولدیفی :

قد بنی دار الکتب سلطاننا عبد الحمید

تاریخی دخی اول مجموعه یه قید ایتشد . بوناریختک بالاسنده کی  
قصیده سی دخی هپ عربیدر . حالبوکه بالاده بیان اولندیفی  
اوزره بحر رملک سیکز جزءدن ترکیبی اصول عروض عربی یه  
مخالفدر . «ملع» شعرلرده بوکا بر درجه یه قدر مساع اولسه بیله  
اوزان فارسیه اوزره هپ عربی اوله رق نظم اولنان شعرلر  
مقبول اولماز . و برده : «الکتب» لفظی اوزره وقف ایتدیکنه  
مبنی عصری ادباسندن بعضیلری آکا اعتراض ایتشلر ایدی .  
بواعتراض دخی بجا و اقوادر ؛ چونکه اشعار عربیه ده کرک  
وقف ، کرک اشباع آحق بیتک آخرنده و برده مصراع ، یعنی :  
مثنوی یا مطلع ایسه مصراع اولک دخی آخرنده اولور ؛ سائر  
محللرنده جائز دکلدر . فارسی و ترکی شیوه سی اوزره عربی شعر  
سویلمک ایسه مستحسن اولماز .

تاریختک اک اعلاسی حشودن عاری و مراد اولان معنایی کمال



وضوح ایله مفید اولان مصرع آزاده ، یعنی : دیگر مصرعه  
مربوط اولمایان بر مصرع برجسته در.

سرورینک :

اولدی صالح افندی دفتردار

مصراعی کبی، که بونی استماع ایدن کیسه صالح افندی نامنده  
بر ذاتک دفتردار اولدیغنی فهم ایدر و جمیع حروفی حساب  
اوندقدده ۱۲۱۴ سنه سنده وقوعی معلوم اولور ؛ فقط بویله  
تاریخلر پک نادر تصادف ایدر.

سروری بککرجه نظم ایلدیکی تاریخلرینک ایچنده اک زیاده  
بونی بکنورمش :

سنگ سنگ سروری کلدی قرقه

مصراعی دخی بوقیلدندر، که بونی مطالعه ایدنلر ۱۲۰۵ سنه سنده  
سرورینک قرق یاشنه واصل اولدیغنی درحال فهم ایدرلر.  
۱۲۱۳ سنه سنده قهوه دن توبه ایتدیکنه دائر سسویلشمش

اولدیغنی :

قهوه دن قیلدی سروری توبه "

مصراعی دخی بوقیلدندر .

بویولده سویلشمش اولان تاریخلرک کزیده لرندن بروجه آتی  
بر آز مثاللر دهاکتوره لم :

اسامی	تواریخ	سنه
سروری :	قیلیدی ابراهیم افندی ارتحال	۱۱۹۸
وله :	ارتحال ابتدی محمد چلبی	۱۲۰۲
وله :	تزوج ابتدی عاصم بك افندی	۱۲۰۹
وله :	خان سلیم اوچ کھی ایندیردی یه	۱۲۱۵
وله :	ایلدی رحلت کلوب قدسی افندی کعبه دن	۱۲۲۱
وله :	میر عارف ابتدی عقد ازدواج	۱۲۲۲
وله :	یثری آلدی چند خان محمود	۱۲۲۷
حکمت :	وفات ابتدی جمال الدین افندی	۱۲۲۷
وله :	رفت رحتی ز عالم فانی	۱۲۲۷
ذائق :	روم ایلینه عزم و عودت قیلدی خان عبدالمجید	۱۲۶۵

هروقت بویله برجسته مصراعلر بوانه ماز؛ چونکه اکثریا معنای مراده دلالت ایدن انظلمك عدد حروفی تاریخه موافق دوشمزه. بناءً علیه حسابی طولدیرمق ایچون حشو وزائد لفظلر علاوه اولور. ایشته بو علاوه لر نقدر مقامه مناسب ولطائف بیانیه و بدیعیه یی مشتمل اولور ایسه تاریخده او قدر مقبول اولور. بویولده سویلنمش اولان تواریخ مقبوله دن دخی بروجه آتی برآز مثاللر کتوره لم :

اسامی	تواریخ	سنه
سروری :	بارك الله پادشاه عادل اولدی شه سلیم	۱۲۰۳

- وله : جان شیرینی ویردی فرهاد ۱۲۰۴  
 عینی : بحره ایام شتاده ایندی اوچ فلک جدید ۱۲۱۳  
 سروری : کجندی غالب دوده جاندن یاهو ۱۲۱۴  
 وله : دیوب الحکم الله کوچدی قاضی زاده ۱۲۱۹  
 وله : حیف کیم قیلدی محمد بک افندی رحلت ۱۲۱۹  
 وله : کوچدی مبرد نصف شتاده ۱۲۱۹

( ولادت هایون )

- طالب : قیلدی تولد مرده کیم شهزاده من عبدالحمید ۱۲۵۸

تاریخ ابتدا بوجه مشروح حقیقت دائره سنده آرانور .  
 و بولنه مازایسه : بجاز ، کنایه ، تلمیح و توریه بولی اختیار  
 اولنور . و بویولده بولنان تاریخ نه قدر رنگین و معنای مراده  
 دلالتی نه قدر واضح اولور ایسه او مرتبه مقبول و مستحسن  
 اولور . نته کیم زیرده تحریر اولنه حق مثالاردن آکلاشیلور :

( تاریخ وفات کافی )

- سنبلزاده وهبی : کیتدی کوهر ایدی کویا او معارف کافی ۱۲۰۶  
 سروری : حق بو انبار جسیجی ایده کنج برکت ۱۲۰۸  
 غالب : دوکلدی قالب مقبول و مطبوعه دوکمه خانه ۱۲۰۹  
 سروری : مقید زاده قید تندن اطلاق ایلدی روحی ۱۲۹۹  
 وله : سراپا عشقله سوزان ایکن محو اولدی یان ملا ۱۲۱۱  
 وله : ماء حیوان سمتنه آقدی بالی بازارینک ۱۲۱۱  
 وله : ایلدی اقبالی اوچ آنبارلی یه آنلر کبی ۱۲۱۱  
 وله : اوچ کی یول بولدی کسزآت کبی قوشدی یه ۱۲۱۳  
 وله : آن کبی بردن سکیردوب اوچ کی بولدی یمن ۱۲۱۳

وله : قوش کبی اوچ قطعه قالیون اوچدیلسوی ۱۴۱۳

( معادن امینی ضیا پاشانک صدارتی )

وله : پادشه معدنده بولدی مهرینه لایق کهر ۱۴۱۳

( وزارت طیار پاشا )

وله : اوچ اعلاى وزارتده هادر طیار ۱۴۱۵

وله : حق بوانبار بلندی ایده کنز البرکات ۱۴۱۷

وله : کل اوق سید سلیمان روحی ایچون فاتحه ۱۴۲۰

وله : فاتحه عثمان افندی روحنه ۱۴۲۰

وله : محفل عدلی مقر ایتسون بلال ۱۴۲۲

وله : شربتی صوندی شکر زادهیه ساقی اجل ۱۴۲۲

عارف : اولدی عدلی خان محمودک جلوسنده عیان ۱۴۲۳

( مخاصی عدلی اولدینی جلوسنده میدان چیقمشدر )

عزت : محمود خانه مولی ملکی ایده مباک ۱۴۲۳

سروری : جهاندن کوچدی بلبل خواجه قوندی عدل اعلایه ۱۴۲۷

حکمت : کعبه خلدی مکان ایلده روح مدنی ۱۴۲۷

( صدارت درویش پاشا )

عزت : قطب عالم صاحب مهر ایلدی درویشی ۱۴۳۳

( ریاست پرتو پاشا )

وله : سایه شاهانه ده آلدی ریاست پرتوین ۱۴۴۲



( ولادت ہایون )

حق : فر ویردی کلدی عالمہ شہزادہ من (عبدالحمید) ۱۲۵۸

( جلوس سلطان عبدالعزیز )

جودت : ویردی اورنگ جهاننداری یہ فر عبدالعزیز ۱۲۷۷

صفوت : قوشدی کاوی زادہ بی کردونہ موتہ اجل ۱۲۶۵

( وفات والی مضر )

ولہ : ام دنیا قوجہ سن ابتد تلف ۱۲۶۵

بعضاً ایکی اوچ شاعرک بر تاریخده توارد ایتسدکاری  
واردر. زیرده محور تاریخلرده اولدینی کی:

( سروری . عزت )

۱۲۲۲ مصطفی خانہ بیعت ایلدی ناس

( سروری . حکمت )

۱۲۲۵ اوچدی صحن جنانه طوطی شیخ

( سروری . حکمت . رأفت )

۱۲۲۷ جانی عدن ایلسون قدرت بکک رب قدیر

( حق . شناسی )

۱۲۶۱ یاپدی خان عبدالمجید یم هم جسر جدید

بعضاً بر بیتک مجموعی بر تاریخ اولور. نته کیم : سرورینک  
(۱۲۰۶) سنه سنده سویلدیکی :

سهمله میدانده آلدی منزلی

دیکدی طاش سلطان سلیم کامبین

بیتی کبی .

وبعضاً بر بیتک هر مصراعی برر تاریخ اولور. نته کیم  
سرورینک :

قرقلری هر حالده مولی معینی ایلیه

سنی قرق اولدی جناب شه سلیمک بوسنه

بیتک هر مصراعی ۱۲۱۵ عددینه مساوی اوله رق بشقه بشقه  
برر تاریخدر .

تاریخ یا « تام » اولور، که جمیع حروفی داخل حساب اولور.  
بالاده مذکور تاریخدر کبی .

یاخود یالکیز نقطه لی حرفلری حساب اونوب « تاریخ معجم »  
و « تاریخ مجوه » دینلور .

ویاخود یالکیز نقطه سز حرفلری حساب اونوب « تاریخ  
مهمل » وساده دینلور .

تاریخ معجمه مثال :

سروری

بر صبی رشید مکتبده ابتدی ختم تلاوت فرقان  
شو حدیث اولدی جوهرین تاریخ خیر کم من تعلم القرآن

۱۲۱۰

سروری

کروبی الشیم عاشر افندی مفتی عالم  
که وقتک قطبیدر ذات شریفی فضل و تقواده  
سروری جوهر کلدن ایدن تاریخن استنباط  
موفقدر مجرد عقل عاشر نقل فتواده

۱۲۱۳

سروری

کنایه وار ایسه عفو اوله معجمه دیدم تاریخ  
نصوحی زاده قیلدی توبه قرب حقه عزم ایتدی

۱۲۱۸

تاریخ مهمله مثال :

طالب

فر ویرر مهر الله غالب کبی پاشا صدره

۱۲۳۹

بعضاً مصراع تاریخك عدد حروفی بر قاج ناقص یا زیاده  
 كلكده مقامه مناسب تعمیه ایله ضم یا تنزیل اولنور .  
 بویله تعمیه ایله سویلنمش اولان رنکین تاریخلردن بر قاج  
 مثال كتورهلم :

### سروری

بایله یازدی قلم ثبت ایدیچك تاریخن  
 قشلهده ایتدی بنا والده سلطان حمام

۱۲۰۹

اشبو مصراع تاریخك عدد حروفنده ایکی نقصان اولوب  
 باحرفك عددی اولان ایکی ضم ایله اكال اولنمشدر .

### سروری

شكل كرداب كلور فكره یازاركن تاریخ  
 سوردی یلكن كورك اعدایی قپودان پاشا

۱۲۰۴

بومصراع تاریخده بش نقصان اولمغله شكل كردابده اولان  
 وبشه دال بولنان (۵) رقمی ضم ایله اكال قیلنمشدر .



### سیر و لاهی

شه عالم آلهجه بهمنك تاجن دیدم تاریخ  
عجمدن کلدی مفتاح روان باب هایونه

۱۱۳۷

بو مصراع تاریخك ایکی زیاده سی واردر . بهمنك تاجی ،  
یعنی : حرف اولی اولان با حرفك اخذ و تنزیلی ایله تسویه  
اولنشددر .

### سروری

دل کان رشکله قوپدقدمه دیدم تاریخن  
آلدی مهر کرمك معدنی یوسف پاشا

۱۲۱۳

بو مصراع معدن امینی یوسف پاشانك صدارتی تاریخی  
اولوب بر زیاده سی واردر . کانك قلبی اولان الفك تنزیلی ایله  
تسویه قیلنمشدر .

بعضاً بر مصراعك عدد حروفی مراد اولان سنه نك تمام  
ایکی قاتی اولوب «دوتاء» دنیلور . تاریخ تام کبی مقبول دکادر .  
فقط بر مصراعك هر نصفدن برر تاریخ چیقار ایسه مصنع  
و مقبول بر تاریخ اولور . نته کیم : سرورینك

بر جمعه کون شوکت ایله سلطان عثمان اولدی شاه

مصرای ایکی تاریخی مشتملدر . شویله که : « بر جمعه کون شوکت ایله » عباره سنک عدد حروفی ۱۱۶۸ اوله رق سلطان عثمانک جلوسنه تاریخ اولدینی کبی « سلطان عثمان اولدی شاه » جمله سی دخی بشقه جه بر تاریخدر .

کذلک مصرای تاریخنک حروف معجمه ومهمله سندن بر تاریخ چبقارایسه توارخ مصنعه دن معدود اولور . نته کیم : سرورینک

موقفین سروری معجم ومهمل دوتاریخه  
مربع وفق کشور مصطفی خاندن مکارمله

بیتنده کی مصرای تاریخنک حروف منقوطه سی (۱۲۲۲) اولوب ساده حروفی دخی او قدر اولغله ایکیسی دخی سلطان مصطفای رابعک جلوسنه بر تاریخدر .

توارخ مصنعه نک انواع کثیره سی واردر . از جمله بریسیده بودر ، که بیتک ایکی مصرای بر تاریخ اولدینی حالد هرمصرای عنک احاد و اعشرات و مائی یکدیکره مساوی اولدیده نقل یکدیگر اصولی ایله آتی تاریخ دها پیدا اولور .

توارخ مصنعه نک بر نوعیده اخراج و ادخال اولیدر . نته کیم : (۱۱۴۲) سنه سنده اشرف خان افغانی عساکر عثمانیه ایله وقوع بولان محاربه سنده منهزماً فرار ایتدکده تاریخ مصنع اوله رق مشتاق « اشرف ازتیغ پادشاه کریخت » مصرای

سویلمشدر . حسابی بو وجهله در که « تیغ پادشاه » ترکیمنک  
عدد حروفی (۱۷۲۳) اولوب آندن (اشرف) اسمنک عددی  
اولان (۵۸۱) طرح اولندقدده (۱۱۴۲) قالیر.

کذلک (۱۱۴۴) سنه سنده واقع اولان مصالجه یه تاریخ  
اولق اوزره مسرود خان : « جدل رفت از میان شهریاران  
اتحاد آمد » دیمشدر . حسابی بو وجهله در.

شهریاران ۷۶۷

جدل ۱۰۳۸

۷۳۰

اتحاد ۴۱۴

۱۱۴۴

تواریخ مصنعه نك بر نوعی دخی لفظاً و معنی تاریخى مشتمل  
اولان مصراع یا خود بیتدر . زیرده کی تاریخلر کی .

اسامی	سنه
هاشمی . خان محمد ایلدی داد ایله بیک اوچده جلوس	۱۰۰۳
هادی . باقی افندی کیتدی عقبایه بیک سکرده	۱۰۰۸
هاشمی . یول اولدی اسکداره بیک او توزده آق دگزطو کدی	۱۰۳۰
لادری . صدر عالی آلدی بیک یوزبرده اردل ملکنی	۱۱۰۱
دری . بیک یوز اونده بولدی دنیا راحت صلح و صلاح	۱۱۱۰
سروری . بیک ایک یوز اون آلتیده آلوب مصری بنام اولدق	۱۱۱۶

سرورینک :

بیک ایکوز اون سکرده ثانیا  
اولدی عصمت بک افندی صدر روم

بیتی دخی بو قیلندرد .

### ( استطراد )

تاریخلرک حسابنده تلفظه اعتبار اولمیبوب خطه اعتبار اولنوره  
مثلاً: دعوی کبی یا ایله یازیلوبده الف ایله او قونان کله لر  
یا ایله حساب اولنور .

و «مفتی الانام» عباره سنده یا ایله همزه وصل تلفظ اولمیدینی  
حالده یا و همزه حسابه ادخال قیلنور .  
فاتحه کبی آخرنده تاء تأنیث اولان عربی کله لر حال وقفده  
ها کبی بش حساب ایدیلیر .

«فاتحه شریفه» ترکیبنده «فاتحه» نک آخرنده کی «هاء رسمیه»  
بش حساب اولمیدینی کبی اوزرنده کی همزه دخی بشقه جه  
بر اوله رق حساب ایدیلیر .

«مفتی عالم» عباره سنده (باء) حسابه داخل اولمیدینی کبی  
همزه دخی بشقه جه حساب ایدیلیر .

نساء کبی آخرنده الف ممدوده اولان کلمات عربیه نک  
همزه سی لسانمزد لطفاً و خطاً ترک اولنهرق « نساء » یازیلیر  
واویله جه او قونور؛ فقط موصوف یا خود مضاف اولور ایسه



همزه اعاده اولنور و «نساء حسان» و «نساء زمان» دنیلیر.

جزء کلمه سی اکثر یا عربیده (واو) ایله «جزء» یازیلیر  
ایسدهد ايسانمزدده یالکیز همزه ایله «جزء» یازیلیر.

«ایکی یوز» لفظنی ترکیب ایدرک بر (با) ایله «ایکیوز» یازمق  
یازمق جائز وشایع ایسدهد تاریخلرده اصلی اوزره ایکی (یا) ایله  
یازمق اولی کورلمشدر.

«افندی یه» «شمدی یه دك» لفظلرینی دخی «افندیه»  
«شمدی دك» یازانلر وار ایسدهد اصلاری اوزره یازمق راجحدر.  
«قائم مقام» ایکی میم ایله یازیلیر. فقط بر میم مشدده ایله  
«قائم مقام» یازمق دخی جائز اولور.

«یک» از قدیم یا ایله یازیله کلمش ایسدهد صکره لری یاسر  
اوله رق «بك» یازمق متعامل اولمشدر.

«اوقومق» مصدرینک امر حاضر ی و او ایله «اوقو»  
یازیلیر؛ فقط اسلافدن بعضیلری یا ایله «اوقی» یازمشلردر.  
مورخلر دخی حسابلرینه نصل کلیرسه اويله یازارلر.

«قلیدی» یا ایله یازیلیر؛ فقط مورخلر بعضاً تعدیل حساب  
ایچون یاسر اوله رق «قلدی» یازارلر. «کیتدی» لفظی دخی  
بو قبیلنددر. شوقدرکه اسلاف مورخینک اکثری بونی یاسر  
یازمشلردر. «ینه» بر یا ایله اولوب آنجق اشعارده بعضاً وزن  
ایچون یایی مد ایدرلر وایکی یا ایله «ینه» یازارلر.

«آینه» ایسه بالعکس ابکی یا ایله اولوب بعضاً اشعارده  
بر یا ایله «آینه» یازیلیر.

لسان عربیده «صلوة» «ذکوة» رسم عثمانی اوزرد و او ایله  
یازیلیر ایسه ده لسان عثمانیده الف ایله «صلات» «ذکات» یازیلیر.  
عربیده «مصرع» الف ایله اولوب جمعی «مصاریع» کلیر؛  
فقط شعرای ایران الفسز اوله رق «مصرع» قوللانمشلر.  
بز دخی ابکی وجهله استعمال ایدرز.

لسان عربیده همزه ابکی قسم اولوب بری: «همزه وصل»  
دیگری: «همزه قطعی در.» «همزه وصل قطعی و همزه قطع»  
وصلی جائز دکلدر. شعرده اولسه دخی محل فصاحت اولور.  
فارسیده هر همزه نك وصلی جائزدر. شعرای روم دخی  
بوخصوصده شعرای فرسه اقتفا ایتمشلردر. نته کیم: مؤلف فقیرک

کلدی خوابکه وصله ایوب ناز بکا

نلر ایتدی نلر اول غمزه بی غماز بکا

بیتک مصرع ثانینسند کی همزه لر ایله

کیجه لر غمزه یار ایدردم جودت

شعلاء آهم اگر اولسه غماز بکا

بیتک مصرع ثانینسند «اگر» حرفنک همزه بی وصل اولمشدر.

بعض شعرای روم همزه کبی عینی دخی وصل ایدرلر.

نته کیم: فهیمک

صبح صادق کبی صادق اولیجق یار بکا  
روز روشن اولور عینله شب تار بکا  
پیتنده «عینله» لفظنک عینی همزه کبی وصل ایدلمشدر.

بی نقاب و بانقاب عرض جمال ایلردی یار  
مصراعنده کی «عرض» کلمه سنک عینی دخی وصل ایتک لازمدر.  
والا نقابک الفی حذف اولنق لازم کلور بو ایسه هیچ جائز  
دکلدر. عارف حکمت بک افندی کبی فضلالی ادبا عینک اوילה  
همزه کبی وصل اولمنسی اصلا تجویز ایتزلردی. بونی تجویز  
ایدن شمرادخی نثرده تجویز اولمیان نیجه شیلر ضرورت  
شعریه مبنی تجویز اولنور. علی الخصوص، تانیخلرده بر مرتبه  
دها انساع کوسترلک لازم کلور دیرلرایدی «کل اناه ایترشح بمافیه».

## خاتمه

اوج مقامده، یعنی: ابتدا، تخلص و انتهاده سوزک فصاحتنه  
بک زیاده دقت واعتنا اولنمیدر.

چونکه ادبا مقصده شروعدن مقدم، «تغزل» یا «تفخر»  
یا خود زمانه دن «تشکی» یا «تشکر» کبی بر مقدمه ایله کلامه  
ختم ویررلر.

ابتدا سامعک قولاغنه طوقونه جق سوز افصح، و معناسی  
اوضح اولدینی حالده، آلت طرفنی کمال اهمیت ایله دکلر.

والا آلت طرفی ہر نقدر کوزل اولسہ چندان قولاق آصماز  
 بناءً علیہ حسن ابتدایہ زیادہ اعتنا اولنمق لازمکلور۔ والکاعلاسی  
 مقصدی مشعر اولان سوزلر ایله ابتدا ایتمکدر۔ ایشتہ بوکا  
 «براعت استہلال» دنیلور۔ مبادیدن مقصدہ بر مناسبت ایله  
 کچیلور ایسہ «تخلص» دنیلور۔ واکر مناسب آرائمقسنزن  
 کچیلور ایسہ «اقتضاب» دنیلور، کہ قدماک مسکیدر۔ بعضاًدخی  
 «بعدنا» یا «بعدازن» یاخود «مقصده کلہلم» کبی بر سوز ایله  
 مقصدہ کچیلوب بو دخی تخلصہ قریب بر اقتضابدر۔

متأخرین ادبا حسن تخلصہ پک زیادہ اعتنا واهتمام ایتشلردر۔  
 چونکہ مخاطب مبادی بی دکلر ایکن مقصدہ مترقب اولور۔  
 بو جہتلہ کریز گاہ نہ قدر کوزل اولور ایسہ۔ کلامدہ اوقدر  
 تحسینی جالب اولور۔ «اتہاء کلام» ایسہ، سامعک الک صکرہ  
 قولانغندہ قالہ جق سوز اولنغلہ، کوزل اولدیفنی حالدہ اوست  
 طرفک قصورلرینی اورتر۔ وانہماک احسنی کلامہ تمام اولدیفنی  
 مشعر اولہ جق وجہلہ ختام ویرمکدر۔

(الحمد لله الذی هدانا لهذا وما كنا لنهتدی لولا ان هدانا الله)

﴿ صولک ﴾



بشنجی دفعه طبع اولونان بلاغت عثمانیه کتابتک فهرستیدر .

صفحه

۳ دیباجه

۱۰ مقدمه

۲۹ لاحقه

باب اول — کلامک مفتضای حاله مطابقی حقنرددر

۴۱ مقدمه

۴۳ فصل اول — احوال مسند الیه بیانندهدر

۶۱ فصل ثانی — احوال مسند بیانندهدر

۶۷ فصل ثالث — متممات جمله بیانندهدر

۸۱ فصل رابع — اسناد خبری بیانندهدر

۸۶ فصل خامس — انشا بیانندهدر

۹۶ فصل سادس — الفاظک عطف وربطنه دائردر

۱۰۹ فصل سابع — ابجاز واطناب حقندهدر

باب ثانی — طرق افاده بیانندهدر

۱۱۴ مقدمه

۱۱۶ فصل اول — مجوز عقلی بیانندهدر

۱۱۹ فصل ثانی — مجاز مرسل بیانندهدر

۱۲۲ فصل ثالث — تشبیه بیانندهدر

۱۳۳ فصل رابع — استعاره بیانندهدر

۱۴۰ فصل خامس — کنایه بیانندهدر

باب ثالث — صنایع بریهه حقنرددر

۱۴۳ مقدمه

۱۴۳ فصل اول — محسنات معنویه حقندهدر

۱۵۷ فصل ثانی — محسنات لفظیه حقندهدر

۱۶۲ فصل ثالث — صنایع بدیهیه نك لواحق حقندهدر

۱۶۸ فصل رابع — صنعت تاریخچه دائردر

۱۸۸ خاتمه



















3 1761 07966708 5

PL  
175  
C4  
1905